

وتستمر الحياة

محمود أمين



ليبنت للنشر
والتوزيع

محمود أمين

وتستمر الحياة

١ ط ٢٠١٥/٢٢٠٨١

التقييم الدولي / ٣- ٩٩ - ٣٥١١ - ٩٧٧ - ٩٧٨

حقوق الطبع محفوظة لدى الناشر

ليليت للنشر والتوزيع

الإشراف العام / إيمان سعيد

رئيس لجنة قراءة د/ سالم ابراهيم سالم

مدقق لغوي أ/ محمد فهمي

غلاف / ضياء السيد

المراسلات : ٢٤ ش سيد درويش

كوم الدكة - إسكندرية

ت : ٠١٢٢٤٢٧٢٣٢٧

: ٠١٠٢٢٦٦١٦٣٢

Dar.lilite@gmail.com

lilitepublishing@gmail.com

لأسرتي وأبنائي

obeikandi.com

في إحدى مدن محافظة الإسماعيلية الهادئة والبعيدة عن الأجواء
الصاخبة.. كان هناك مجموعة من الأصدقاء جمعتهم الظروف والأقدار مع
بعضهم في نهاية حقبة الثمانينات وبداية التسعينات، في ظروف كانت قاسية
ليس عليهم فقط، ولكن على المجتمع المصري بأكمله ولشعب قُدِّر له على
أن يعيش على الكفاف ويرضى بالقليل من أجل أن تستمر الحياة.

”ساحة المدرسة الثانوية التجارية، جلس الأصدقاء على مقربة من السور،
مكانهم المميز الدائم والمميز“

فؤاد: إيه مفيش معاك سجاير؟.. أنا سجايري خلصت.
إسماعيل: إنت دايماً كده بتخلص سجايرك بدري... يا أخي إنت بتكلها
أمال لما تروح هتعمل إيه؟...
فؤاد: يا عم إسماعيل إنت هتقطني ولا إيه؟...
علاء: ماتديله يابني سيجاره... أنا اتخنقت منك ومنه.
إسماعيل: سيجارة مكنة أهه ياعم ولا تزعل.
فؤاد: شوف الرجولة... دى يابني بقى لا بتتباع ولا بتتشرى دى مع..
الجينات يالطخ.
إسماعيل: يا عم... إنت بتاخذ الكلام على جوه ليه كده؟ ... ما أنت
شايف.
علاء: يلاً يا جماعة الجرس ضرب.. واحنا دايماً بنتأخر وأستاذ صبحي
بتاع الإنجليزي... مش هيدخلنا... عاوزين نعدى السنة دي...
دي كلها أسبوعين ومضي الاستثمارات...
إسماعيل: أيوه يا أخي عاوزين نخلص أم الدبلوم ده بقى... الواحد حاسس
إن العيال اللي معاه... بيبصوا عليه ويبستنقصوه...
علاء: ما احنا أكبر منهم يجي بأربع خمس سنين على الأقل...
إسماعيل: نفسي أخلص بقى...

فؤاد: روحوا أنتو... أنا هخلع... غطوني انتو...

علاء: يافؤاد ما ينفعش كده إحنا الثلاثة وإبراهيم كمان بنبان في الفصل، يعني العين بتجبنا إحنا الأربعة بسرعة.

إسماعيل: والحجج كلها خلصت... تقريبًا موتنا العائلات كلها مش ناقص غير أبوك وأمك...

فؤاد: اتصرفوا، أنا عندي ميعاد في ثانوي ... ساعة وجاي...
علاء: ماشي ... هنتحاول.

فؤاد: اتكلم أنت ياعلاء ... بلاش إسماعيل ولا إبراهيم.

علاء: وانت ما تتأخرش... إنت في المستشفى خلاص؟

فؤاد: خلاص... ساعة بالكثير... سلام.

الأستاذ صبحي: جود مورنينج... (في الفصل).

الطالبة (ترد): ... جود مورنينج سير.

أ. صبحي: إيه فيه حد ناقص؟... هناخد الغياب... فين ورقة الغياب؟

أيمن: موجودة ياأستاذ صبحي...

أ. صبحي: هات علشان أمضي عليه... الرباعي فين؟...

علاء: موجودين ياأستاذ صبحي... بس فؤاد...

أ. صبحي (مقاطعًا): حد مات عنده تاني فجأة ولا إيه؟!

علاء: لا يا مستر... رجله دخلت فيها مسمار وراح المستشفى ياخذ حقنة تيتانوس.

أ. صبحي: يعني هيرجع على المدرسة ولّا لأ...؟ عموماً أنا قاعد معكم

ثلاث حصص لو مجاش...

علاء: لا أكيد جاي...

إسماعيل: شوفت ياعم صبحك... صبحك صدرنا إزاي؟

علاء: يعني هو صبحي أنا لوحدي؟

أ.صبحي: عمومًا الغياب مهم الأيام دية... طبعًا إنتو عارفين إن

الاستمارات فاضل عليها أسبوعين وتتمضي... يعني ممكن في

خلال الأسبوعين دول... ما تحضروش امتحانات نهاية السنة ...

وانتو بالذات نسبة الغياب مرتفعة عندكم قوي...

إسماعيل: ربنا يسترها ويبعد ولاد الحرام... عننا.

أ. صبحي: بتقول حاجة يا اسماعيل؟...

إسماعيل: بقول إن قلب حضرتك كبير.

أ.صبحي: أنا عاوز الالتزام... مش أكثر... أنا بددي يومين في ثانوي عام

وثلاث أيام عندكم بتمنى من ربنا... إني مجيش خالص هنا.

إسماعيل: ياريت وتاريخنا..(هامسًا).

أ.صبحي: فرق كبير قوي... خرينا في الدرس...

علاء: الولد فؤاد اتأخر عدت ساعة ونص.

إسماعيل: مش قلتك؟... يا عم انسى.

أ.صبحي: ادخل (فؤاد يطرق الباب).

فؤاد: بعد إذنك يا مستر... ادخل.

أ.صبحي: إيه أخبار رجلك؟...

فؤاد: تمام.

أ.صبحي: يعني ما دخلش في رجله مسمار ولا حاجة ولا تيتانوس. عيب

ياعلاء لما تكذب عليا..

فؤاد: لا أنا خدت حقنة تيتانوس وجيت... تحب أوريلك رجلي؟... بس

انت عارف إن احنا رجاله... ما تأثرش فينا الحاجات دي..ده

مسمار يعنى مش دانة مدفع.

أ صبحي: خش يا افندى.. خش...

علاء: يا أخي إنت بتحطنا في مواقف بايخة... وملهاش لازمة.

فؤاد: إيه ياعم علاء.. وانت مالقيتش غير القصة دي؟ أقوم أضربهولك

يعنى؟ عليّ الطلاق.. أقوم أضربهولك.

علاء: لا تضربه ولا يضربك... خلصنا.

أ.صبحي: إيه في حاجة؟... سامع دوشة من ناحيتكم..

إسماعيل: لا أبداً... مفيش... فؤاد بيسأل احنا فين في الكتاب؟... كله تمام

حضرتك .

(يمر أسبوعان، وعند ملء استمارات الدبلوم)

إسماعيل: إيه ياعلاء هنكتب إيه؟...

علاء: تكتب إيه في إيه؟

إسماعيل: في الاستثمارات دية...

علاء: ارحمني يا اسماعيل... اكتب البيانات اللي قدامك... الاسم.. تاريخ

الميلاد... السن.

إسماعيل: ماتيجي تكتبهم انتة... أنا خايف أتلخبط..

علاء: اخلص واكتب... أف عليك يا أخي إنت دايماً كده؟

فؤاد: أنا خلصت يا علاء... بص.. سلمهم للأستاذ صبحي.

علاء: إنت بتهرج... ما أنت عارف لازم نمضي قدامه.. وتأخذ الكعب هي

دي أول سنة؟.. ما أنت فاهم..

فؤاد: علشان كده الميعاد بتاع البننت... أهم.

علاء: اقعد بس لغاية.. مايجي.

أ.صبحي: هاه إيه... في حد لسه مخلصش... أو مش فاهم الاستمارات فيها إيه؟..

إسماعيل: أنا ياأستاذ صبحي.

أ.صبحي: بس يااسماعيل دي تالت سنة ليك... بقولك سبها فاضية.

إسماعيل: والنبي يا مستر عاوز أخلص.

أ.صبحي: (يمسك ورقة أحد الطلبة)... كله يركز معايا هقول نقطة... نقطة.. (وبدأ يشرح ورقة الاستمارات).

فؤاد: الله يخرب بيتك يااسماعيل على بيت صبحي.. المعاد هيضرب بعد إذنك ياأستاذ صبحي، الأخصائي كان عايزني وآدي ورقتي آه أنا خلصتها (ومدها للأستاذ صبحي).

أ.صبحي: وعمايزك ليه الأخصائي؟

فؤاد: كان فيه مشكلة كده.

أ صبحي: وانت هتجيب إيه غير المشاكل؟!.. روح يا فؤاد ومتتاخرش.

(يذهب فؤاد، ويقفز من سور المدرسة.. إلى الميعاد المتفق عليه مع فتاة

من المدرسة الصناعية)

فؤاد: وحشتيني... وربنا وحشتيني.

عبير: اتأخرت ليه؟

فؤاد: أبداً.. كنت بملى الاستمارات بتاعة الامتحانات.

عبير: يعني مارحتش.. هنا ولا هنا؟

فؤاد: أروح فين واسيبك... ياجميل.

عبير: أصلي أنا سمعت إنك بتعرف بنت تانية واسمها هدى...

فؤاد: (مستغربًا)... هدى... هدى مين؟!

عبير: هدى حسين.

فؤاد: بقى يا شيخة تصدقي الكلام ده؟.. أنا برضه أبص لوحده تانيه؟..

هو فيه حد في جمالك ورقتك.. وله لون شفائيك؟ (وينحني قليلاً ليقبلها.. وتتركه يقبلها، ثم تنسحب منه).

عبير: فؤاد.. إنت بتعمل إيه يامجنون؟

فؤاد: بعمل اللي نفسه اعمله من زمان.. من أول ماشفتك.

عبير: على فكرة أنا تأخرت لازم أمشي دلوقتي..

فؤاد: لسة الوقت بدري...

عبير: سلام.

فؤاد: هستنى تليفونك... بالسلامه يامز.

(يذهب فؤاد مرة أخرى للمدرسة)

إسماعيل: إيه عملت إيه؟

فؤاد: مانت عارف يابني... كل خير.

إسماعيل: إحكي.. والنبي احكي ياشيخ.

فؤاد: إيه الأخبار مفيش جديد؟

علاء: الجديد عندك انت..

فؤاد: لا مفيش البت وصلها كلام على هدى.

إسماعيل: أبه .. البت بتراقبك.

علاء: لأ طبعًا.. ما صحبك متسيط ومفضوح.

فؤاد: يا عم.. اللي خايفة على نفسها تبقى محترمه... ما فيه بنات تانية

كثير... الواحد مبيقربش منها بس اللي عاوز يقرب من النار

لازم يتلوع.. (ضاحكًا).

علاء: ياخوفي انت اللي تتلوع.

إسماعيل: إحكي بقى وخلص (وأخذ فؤاد يسرد ما تم في المقابلة... بص يا

سيدي..) آدي كل اللي حصل.

علاء: طيب انت ناوي على إيه.

فؤاد: ناوي على إيه... إزاي يعني؟

علاء: يعني احنا إن شاء الله هنخلص السنة دية... بعد كده.. ناوي

تخطب مين؟

فؤاد: أخطب مين إيه.. مالك؟ انت في دماغك حاجة؟.. انت يابني مش

عارف البير وغطاه؟.. إنسى.

علاء: أمال انت معلق بنت دي ليه ولأ هدى؟

فؤاد: أنا مش معلق حد.. الجد يعني إني بحب البت دي.. بس انا

معشمتش حد.. إنسى يا صحبي.. قولى فاضل أد إيه على

الامتحانات؟

إسماعيل: أستاذ صبحي بيقول خلال أسبوع كده ولا حاجة نعرف

جدول الامتحانات..

فؤاد: هاروح عند ابويا دلوقتي.. أشوف أي حاجة معاه.. عندي معاد

بالليل..

إسماعيل: يعني نجليك على القهوة ولا إيه؟

فؤاد: يابني أنا لا بحب القهوة ولا اللي فيها.. على البيت.. سلام..

(ويذهب فؤاد إلى المقهى القديم عند والده.. المتقدم في السن، الذي

يتجاوز 63 سنة بقليل)

فؤاد: مساء الخير يا با...

الأب: مساء الخير... خير؟...

فؤاد: مفيش هو انت كل ماتشوفني تقولي خير؟... (متضايقًا).

الأب: هو حد يكره الخير؟... (ساخرًا).

زبون 1: حجر معسل والنبى ياعم عبد الحميد...

الأب: خد رص حجر المعسل للمعلم حسن...

فؤاد: ياباه... مانت عارف...

الأب: عارف إيه؟!

زبون 2: 3 شاي وواحد حله يا عم عبد الحميد..

فؤاد : أنا...

الأب: انت عاوز إيه؟... عاوز فلوس... ومكسوف من القهوة اللي ربتك

وربت اخواتك... أنا نفسي تكون حاجة كبيرة... بس انت اللي

مش ناوى على حاجة... ربنا يهديك يابني (يدخل يده في

جيبيه، ويخرج جنيهين).

فؤاد: ربنا مايحرمنا منك يا حج... إنت الخير والبركة..

الأب: شوف امك في البيت لو عايزه حاجه... وشوف أخوك محمد جه ولاء

لسه، وقلها جمعه فات عليا قبل مايروح مصر ويمكن ييات

هناك..

فؤاد: حاضر...

(ويستدير الأب لعمل حجر المعسل.. داعيًا الله أن يصلح حاله، ويذهب

فؤاد لميعاده لمقابلة هدى)

فؤاد: اتخنقت بقى... الواحد مش عارف يعمل إيه... إمتى أخلص بقى؟

هدى: تخلص من إيه؟

فؤاد: من العيشة هنا... الواحد حاسس إنه بيحرت في الميه مش عارف
يعمل حاجة...

هدى: فؤاد.. أنا أصغر منك بحوالي سنتين وقربت أخلص الجامعة وانت
أهو لسه في الدبلوم... ومعملتش حاجة.

فؤاد: يعني إيه الكلام ده؟... على فكرة أسلوبك في الكلام في الفترة الأخيرة
مش عاجبني...

هدى: يعني اللي بيقولك الحقيقة وبيواجهك وخايف على مصلحتك
يبقى مايبحكش؟... الحب تضحية يا فؤاد وأنت مش
محسسنى إنك ناوي تعمل أي حاجة... أو مش ناوي تضحي
علشان حد... ولازم تتعب.

فؤاد: عوزاني أعمل إيه؟...

هدى: همه الرجاله بيعملوا إيه؟

فؤاد: عرفيني...

هدى: أول جزء في التضحية هو تحمل المسؤولية... يعني خطوبة... يعني
الجواز الطريق الطبيعي.. لأي اتنين عاوزين يشيلوا مسئولية..
ويضحوا بحجات كتير علشان يبقوا مع بعض.

فؤاد: يوه.. هو الأسبوع كله باين من أوله...

هدى: إنت لما تحس إنك مزنوق بتهرب.. على فكرة دي آخر مرة
تشوفني فيها... إظهار إني أنا اللي بحرت في الميه.. كلهم
حذروني منك.. لكني قلبي كان عايزك. لكن أنا ممكن أحط
قلبي تحت جزمتي...

فؤاد: مش بقولك.. إنتي اتغيرتي وأسلوبك في الكلام بقى مستفز (بصوت عالٍ).

هدى: سلام... (بصرامة)..

(يفكر فؤاد في الموضوع برمته بصوت عقله المرتفع، إيه يا فؤوش البت عندها حق، عندها عشرين سنة وخلص هتاخد بكالوريوس وانت حتى الدبلوم لسه بتعموم فيه ولولا دعاء أمك كنت لسه في الحضانة وبعد ما تخلصه لسه الجيش... ولسه لما تكوّن نفسك في أيام ما يعلم بيها إلا ربنا... وانت دلوقتي بتكبر... إيه يافؤوش... وبعدين ايه الموضوع بتاع ده؟.. البت فوقتك ولا إيه؟... ويفاجأ أنه أمام بيت علاء).

فؤاد: علاء ... علاء.

علاء: إيه يابني اللي جايبك؟ ... مش تكن وتذاكر شويه؟

فؤاد: أكن إيه؟.. أنا مخنوق...

علاء: شكلها طرأعتك... (ضاحكاً) نازلك.. ايه يامعلم.. ايه مولع ليه؟...
اطرأعلك ياباشا!!

فؤاد: لا ياعلاء مش دي المشكلة... المشكلة إن البنت دي بالذات كلامها بيأثر فيّ قوي.. وتحس إن كلامها مترتب... وبتظرفهم لي صح الكلية برضه والثقافة بتفرق.

علاء: مانت عارف الظروف لو كانت كويسه شويه كان زماني في الكلية وانت كمان بس النصيب...

فؤاد: مش قصدي التعليم... ما احنا بنقابل ناس متعلمه كويس.. بس الواحد فيهم يبقى خشن... حافظ وبس ... معندهوش أي خبرة

في الحياه... ولا عنده أسلوب للإقناع..

علاء: على فكرة البنت دي بتحبك...

فؤاد: وافرض إني بحبها أنا كمان... إيه اللي يحصل؟...

علاء: يحصل جواز طبعًا...

فؤاد: إنت بتخرف يا علاء؟!... مانت عارف... هو انت يابني من هولندا

ولا حاجة؟!!

علاء: أنا قصدي لما الظروف تتحسن معاك...

فؤاد: يا بني أنا أخويا... جمعة كان شغال سواق له أربع سنين... لما

جه يجوز... ضربنا في البيت طوارئ لمدة سنة ومازلنا... والكبير

مع المصوراتي مقضيها... وابويا زي ما انت عارف... بيحمد ربنا

إن البنات جت في الأول وخلص منهم بدري بدري...

علاء: يا أخي شيل همك لوحدك واخلص.

فؤاد: هو مين فينا بشيل همه لوحدته؟ مانت برضه فقري... أبوك

مايموتش إلا في امتحانات الإعدادية... كنت زمانك دخلت

سنوي... واختك متعملش حادثه هي وجوزها إلا في امتحانات

سنة أولى... بقى سنين من عمرك يضيعوا أونطه... وامك ما

تعملش عملية إلا في سنة الدبلوم الأولية؟!...

علاء: ياعم فؤاد ماتقلبش المواجه... النسيان أحسن علاج... والحمد

لله أدينا عايشين... وان شاء الله نخلص السنة دي... واعمل

معادله... واخش الجامعة...

فؤاد: عارف يله يا علاء أنا بحبك ليه؟... بحس إن عندك طموح... عارف

طريقك... عارف عاوز إيه... وعاوز تعمل إيه...

علاء: ياعم متكبرش الموضوع... قوم قوم نتعشى سوا ونذاكر كلمتين.
(ويمر أسبوعان وفي المدرسة)

أ. صبحي: الأسبوع الجاي ... تيجوا علشان تاخدوا أرقام الجلوس.

إسماعيل: إيه ياولاد... الموضوع قرب خلاص وله إيه؟

علاء: إنت مش سامع ولا إيه؟!... أومال فؤاد فين؟!!

إسماعيل: تقريبًا قال أنا رايح الحمام...

علاء: حمام إيه بس في الوقت ده لو سأل عليه أستاذ صبحي دلوقتي؟

إسماعيل: يا عم احنا مش ماضيينا الاستثمارات؟

علاء: يأخي الراجل ده محترم مش عاوزين نقل معاه...

(يطرق فؤاد الباب في هذه الأثناء)

أ صبحي: ادخل.

أ صبحي: خش يا فؤاد... على فكرة اللي ميربهوش أمه ولا أبوه ولا يتعلم

حاجة في المدرسة... الحياة والزمن يابني كفيله تعلمه كتير...

وكتير أوي...

فؤاد : ياأستاذ صبحي... حضرتك كل ما تشوفني تقطمني؟

أ صبحي: بص يافؤاد يابني... إنتو مابقتوش صغيرين. كلها أسبوعين

وتخشوا الامتحانات وربنا يكرمكوا. بس أنا عاوز اعرفكم إن

الحياة صعبة.. عمومًا... ابقوا افتكروا كلامي ده.. خصوصًا...

انتوا.

علاء: ربنا يعلم معزتك عندنا أد إيه يا مستر صبحي.

إسماعيل: أه والله يا أستاذ صبحي (جرس الفسحة... يضرب).

أ صبحي: وأنا والله بحبكم أوي... كل سنة وانتو طيبين وناجحين يمكن
ماشفكمش إلا على النتيجة... طبعًا لو عايزين أي حاجة أنا

تحت أمركم... سامعني يا علاء...

علاء: طبعًا يا أستاذ صبحي...

أ.صبحي: سلام.

الطبة جميعًا: سلام.

(يبدأ علاء بالمذاكرة، ويشجع فؤادًا وإسماعيل، وبعد أسبوعين...)

وبداية الامتحانات)

إسماعيل: إيه...

هي اللجنة بتاعتي فين؟... مش عارفها والنبى... ورهاني يا علاء...

علاء: يا أخي انت قرفتني... هات رقم الجلوس.

فؤاد: إيه يا علاء... إنت قلقان؟

علاء: طبعًا مش امتحان؟... كفاية سجاير بقى. أنا اتخنقت.

فؤاد: لا. مش مهم.. عارف أول مرة أحس إني عاوز أخلص من الامتحانات..

إحنا باين علينا كبرنا ولا إيه؟!

علاء: أكيد هو انت فاكر إن احنا لسه عيال؟!

إسماعيل: أنا عاوز آكل... جعان... والله جعان.

فؤاد: عارف ياله لو مسكتش... حطلع قرفي عليك.

علاء: ماتروح تجيب سندوتشات من عمك عبد المنعم... تاكل يا فؤاد

معاه؟...

فؤاد: لا... لا.

علاء: إهدا يانجم ماتقلقش.. وان شاء الله خير.. يلاً علشان نخش اللجان.

(وبعد الامتحان، يخرج كلاً منهم على حدة)

علاء: إيه الأخبار؟...

فؤاد: الحمد لله... إسماعيل اتأخر..

علاء: مانت عارف لازم يقعد لغاية مايقولوا قوم... أهه جاي..

فؤاد: عملت إيه ياحيلتها؟

إسماعيل: الحمد لله... عملنا اللي علينا... والباقي على الله..

(وتنتهي أيام الامتحانات سريعاً... ولكن في اليوم الأخير يجتمعون في

حديقة مقابلة للمدرسة)

فؤاد: ياه ياعلاء أول مرة أحس إني حر... حر بجد.

علاء: بيتهيألك.. عارف.. دي بقى بداية قساوات الحياة... فاكر كلام أستاذ صبحي؟ تقريباً كل يوم قبل مانام بيرن في وداني.

إسماعيل: هو أستاذ صبحي... قال إيه؟

فؤاد: اخرس ياله... إنت لسه فاكر ياعلاء؟

علاء: الراجل ده من الناس القليلة اللي بتتكلم من قلبها... على قد ما يبقى كلامه قليل بيكون صادق ومؤثر.

فؤاد: سيبك من صبحي دلوقتي... ناوي تعمل إيه؟...

علاء: هعمل إيه في إيه؟... مش فاهم.

فؤاد: قصدي بعد مانخلص... وناخذ الشهادة؟

علاء: إن شاء الله هكمل... بمجرد ما النتيجة ماتظهر وانجح إن شاء
الله بتقدير كويس... هقدم على كلية تجارة... وابن عم ابويا
كلمني على شغلانه كده في مكتب شركة سياحة في القاهرة...
فؤاد: مش عمك ده... اللي عاوز... يجوزك بنت من بناته؟

علاء: يابني أقل واحدة فيهم معاه... في كلية حقوق... وبعدين انا مش
ممکن افكر في واحدة فيهم...
فؤاد: ليه؟... إنت مش أقل منهم...

علاء: الكلام ده بيني وبينك يا صوبي... هو مش هينسى إن احنا ولاد ابن
عمه اللي كان بيعطف عليهم، وكان...

فؤاد: (مقاطعًا)... بس ده واجب عليه... مش..

علاء: بس انا هاحس إني دايماً مكسور قدامه.

فؤاد: عارف لو مكنتش عارفك كويس... وعارف إنك راجل كنت قلت
إنك معقد... وعمومًا ده قرارك.

علاء: لازم أحس مع شريكة حياتي أن احنا بدينا سوا وإن احنا بنحب
بعض...

فؤاد: يعني بمعنى أصح... إنت محبتش حد من بنات عمك الثلاثة؟

علاء: خالص... أنا أساسًا عمري ما فكرت فيهم مع إن الراجل بصراحة
بيودنا ويمكن هو الوحيد من عيلة ابويا اللي بيسأل علينا.

إسماعيل: ما تيجي ناكل أنا جعان...

فؤاد: وأنت ياباشمهندس إسماعيل... ناوي على إيه؟

إسماعيل: عاوز اروّح. أمي عمله فرخة...

فؤاد: (ضاحكًا مع علاء) ياله ... ناوي تشتغل ايه بعد ماتخلص؟

إسماعيل: مش لما نشوف النتيجة الأول؟

علاء: لو انت حليت اللي قلت عليه يبقى هنتجح... اخلص بقى

هتشتغل إيه بعد ماتخلص؟

فؤاد: أكيد... مع أبوه... كهربائي يعني مش عاوزين طيارين في البلد

اليومين دول.

إسماعيل: أيوه... بس خالي..

فؤاد: خالك مين؟

إسماعيل: أخو امي.

علاء: ياراجل... بجد؟

إسماعيل: أيوه.

فؤاد: ياأخي إنت يجيليك حداشر خال... مين فيهم واسمه إيه ويشتغل

إيه؟

إسماعيل: آه... خالي منصور بيشتغل في الإدارة الصحية... بيقول إن السنة

الجايه عاوزين ناس تشتغل في الإدارة الصحية وهو قال لامى...

ادعى لابنك علشان يتعين... وأمى إيه بتدعى ليل ونهار

وعمالة تندر... إشي رز باللبن وإشي فول نابت ومش مخليه...

علاء: (ضاحكًا مع فؤاد) أمك دية طيبة... يلاه نروح بقى اتأخرنا..

فؤاد: إيه رأيك... الفرخه عند أم إسماعيل؟

علاء: لا ياعم اروح انا واتعشى مع امي..

إسماعيل: على فين؟... طيب ويمين تلاته لتجى معايا... مانتو عارفين

امى بتحبكم قد إيه..

علاء: واحنا وربنا بنحبها وبنحب ابنها...

(يذهب ثلاثتهم إلى بيت أم إسماعيل)

أم إسماعيل: حمد الله على السلامة يا حبيبي... عملتم إيه؟

إسماعيل: آه. هنتكلم بقى... ولا تجهزنا لقمة ناكلها الأول؟

أم إسماعيل: عيني يا حبيبي... (يأكل الجميع بنهم...)

أم إسماعيل: أعملكم شاي ولأ تاكلوا برتقان؟

إسماعيل: الاتنين...

علاء: ياريت يا خالتي... شاي والنبى.

أم إسماعيل: عنيه...

فؤاد: أمك حنينة قوي...!! ربنا يخليها لك..

علاء: مانت عارف إسماعيل كبير إخوانه والتلات بنات وأخوه إبراهيم

صغير.. يعني هو راجل البيت بعد ابوه.

فؤاد: راجل... نبقى نتكلم في الموضوع ده بعدين (ضاحكًا مع علاء).

إسماعيل: على فكرة بقى أبويا عاوز يجوزني بعد ما اخلص الجيش...

مانتو عارفين سلو العيلة بتاعتنا بتحاول ما تخرجش بره...

فؤاد: يا بختك يابن اللعيبه...

علاء: إيه يا عم فؤاد ارحم الواد... لا يموت في ادينا... أديك شايف هو

السدر الحنين في الأيام الغبرة.

فؤاد: على رأيك...

أم إسماعيل: الشاي يا ولاد والبرتقان (تضع الشاي وتجلس) وانت يا فؤاد:

امك أخبارها إيه؟

فؤاد: الحمد لله... كله تمام يا خالتي.

أم إسماعيل: وانت يا علاء يا بني...؟

علاء: تمام يا خالتي كلهم بخير.

أم إسماعيل: والنتيجة بتاعت الامتحانات هاتظهر أمتى؟... عاوزين

نخطب لإسماعيل... عقبال مانفرح بيكم.

علاء وفؤاد: ربنا يطمنك عليه وتفرحي بيه وبيهم.

أم إسماعيل: وبيكم... مانتوا غلاوتكم من غلاوته...

فؤاد: (يقترّب من علاء في أذنه)... يلاً نخرج دي استلمتنا... عاوز اشرب

سيجاره.

علاء: يجعله عامر ياخالتي... ونفرح كده بنجاح إسماعيل وفرحه.

فؤاد: إن شاء الله... سلام ياخالتي.

أم إسماعيل: يااولاد اقعدوا شوية إنتوا لسة قعدتوا.

إسماعيل: كفاية كده يا أمي... اتخنفوا... كفاية خنقه بقى... سلام.

فؤاد: الولية دي... زي العسل... مش بتفكرك بمارى منيب الأفلام بتاعة

زمان؟

علاء: ناس غلابة... كل تفكيرهم... أكل وجواز... الدنيا جميلة قوي معاهم.

فؤاد: على فكرة... ساعات مابفهمكش كويس ياعلاء.

علاء: إنت ساعات... أنا دائماً (ضاحكاً): متخدش في بالك... أصل لو

قلتك... أقرا... مش هيبقى ليك نفس.. علشان كده لو حسيت

إني قلت كلام وملزقش في دماغك... قولي عيدته... وله. إنت

بقيت تتكسف؟ (ضاحكاً).

فؤاد: حلوة اكسف دي.... ماشى ياعم الفيلسوف... وبقوال الحكماء

شغوف. (يضحكان)..

ترن... ترن...

بعد مرور ثلاثة أسابيع من هذه اللقاء واللقاءات الدورية بينهما..

إسماعيل: ألو..

علاء: ألو يا اسماعيل الجرنان بتاع بالليل.... قال إن النتيجة ممكن تظهر

بكره...

إسماعيل: طيب خلاص... من النجمه هكون في المدرسة.. وانت هات

فؤاد وابقى قابلني..

علاء: هو فؤاد فين؟... متعرفش؟...

إسماعيل: فؤاد شغال مع محمد عبد الرافع بتاع المحارة... يعني يكون

في البيت على العشاء...

علاء: طيب... نتقابل على الساعة تسعة بالليل... وشوف فؤاد علشان أنا

في شوية طلبات كده... عاوز أفضيها... ومتتأخرش.

إسماعيل: طيب... سلام.

علاء: سلام

مكان يشبه الحديقة، وبه أشجار الكافور والنجيلة الخفيفة

إسماعيل: إيه اتأخرت ليه أنا مستنيك من يجي ساعة..

علاء: سمعت موضوع كده... هو فؤاد مجاش؟...

إسماعيل: لا... أنا سبت ليه خبر في البيت أول ما يجي... يعدى علينا.

علاء : مانت عارف هو مايعدش في البيت.. لازم نبلغه.

إسماعيل : تقوله على إيه...

علاء: سمعت إن الوالد أخو عبير وابن عمها عاوزين يضربوه وتقريبًا

مش لوحدهم..

إسماعيل: مين اللي قالك الكلام ده؟...

علاء: البت اتصلت بيه وبلغتني وقالتلي إنهم مش هيبقوا لوحدهم.

إسماعيل: بس انت عارف إن فؤاد ما بيخافش...

علاء: ياعم أنا عارف إن فؤاد مش بيخاف... بس ممكن يعملوا فيه

حاجه على غفله وبرضه الكثرة تغلب الشجاعة.

إسماعيل: طيب قوم ندور عليه... قلقنتني.

(همًا بالوقوف...)

فؤاد: إيه يا ولاد ماشين ولا إيه؟

(ظهر فؤاد فجأة)

علاء: إيه يا أخي قلقتنا عليك..

إسماعيل: اسمع.. خلي بالك.. البت عبر اتصلت بعلاء وقالت إن أخوها

واين عمها عاوزين يضربوك... ومش لوحدهم.

علاء: يابني... إنت لازم تخده على الحامي كده؟... طيب اصبر شويه.

فؤاد: ولا يهملك يا ابو السباع أخوك قدها وقدود... إنت قلقان ليه كده

ياعلاء؟... مايا ما اتخانقت... ضربت واضربت من إمتى بتفرق

يعني؟...

علاء: بس تخلي بالك.

إسماعيل: ما تجي ناكل كشري.... أنا جعان.

فؤاد: يلاً يانجم... معاك.

علاء: الليلة عليك يا وحش.

فؤاد: ولا حاجة يا برنس.... مفيش مشاكل يا باشا... ياله على الكشري.

يذهب الجميع... وفي صباح اليوم التالي في طريق المدرسة شبه الفارغة

أخو عبير (حسن) : إنت ياله... إنت ياخويا (مناديًا على فؤاد وهو في طريقه للمدرسة لإحضار النتيجة).

فؤاد (ينظر إليه... ويوجد معه ثلاثة أشخاص)... (متظاهراً بعدم الرد عليه).

حسن (يجري نحو فؤاد) : ... أنت بتستهبل ياله؟... مش بندهلك؟

فؤاد: هو انت تعرفني؟... (بكبرياء).

حسن: لا... بس انت اللي هتعرفني دلوقتي...

(بدأ الشجار بينه وبينهم... ويُصاب فؤاد في يده بلطشة مطوأة في يده، ويسيل دماء اثنين من الفريق الآخر وتنفض المشاجرة.. بعد تدخل المارة في الشارع).

إسماعيل: إيه الأخبار؟

علاء: نجحت يله.. نجحنا.

إسماعيل: وفؤاد عمل ايه نجح؟ ... كلنا يا حمار.. كلنا. (حاضناً): هو ما

بيقعدش في البيت؟.. اتأخرت ليه؟

إسماعيل: يمكن راح الشغل.

علاء: أنا خايف يكون.. يالاً نوصله البيت... بسرعة.

(لم يتجاوزا شارعين بجانب المدرسة... تقابلا مع فؤاد... وهو رابط يده بشاش أبيض، ويعرج وبعض قطرات الدماء على التيشيرت الذي يرتديه).

علاء: إيه يافؤاد مين اللي؟.. (يمسك يده ويطمئن عليه).
فؤاد: مفيش... اللي كنت خايف منه يا معلم.
إسماعيل: قلنا إيه اللي حصل؟
فؤاد: ياعم خلاص هما خدوا كفايتهم... المهم احنا عملنا ايه؟
إسماعيل: نجحنا... كلنا يافؤاد.
علاء: إنت هتسكت على اللي حصل؟
فؤاد: ياعم هو حصل ايه؟... خناقة وخلصت... هما بقى لو مسكتوش يتحملوا اللي يجرى لهم... (ضاحكًا)
إسماعيل: المهم إنك وضبتهم... تمام.
فؤاد: إنسى... عاوزين نهيس النهارده.
إسماعيل: هو ده الكلام..
علاء: فؤاد ... بس.
فؤاد: (خلاص... مقاطعًا)... نهيس.. هات سجاره يا اسماعيل.
إسماعيل: إيه رأيك نروح السينما النهارده؟ فيه فيلم جامد...
فؤاد: هو ده الكلام... يبقى سينما النهارده.

(ويذهب الجميع إلى السينما، وبعد أقل من شهر يذهب ثلاثتهم لإحضار الأوراق لتقديمها للتجنيد).

علاء: إيه يا اسماعيل أتأخرت ليه؟

إسماعيل: ايه يا عم مش أفطر الأول؟... وظبط هو وإحنا لسه في المدرسة؟

علاء: إنت فت على فؤاد؟...

إسماعيل: لا... بس هو عارف إن إحنا النهارده هنروح نسحب الورق.

علاء: مش عارف دماغ فؤاد دي فيها إيه... ياله... علشان مانتأخرش...

(يدخلون مكتب الكاتب في المدرسة لسحب الأوراق)

علاء: صباح الخير يا أستاذ محروس.

أ. محروس: صباح الخير يا أفندي أنت وهو... جاين بدري ليه هو الواحد

لسه اصطبج.. على الصبح؟

إسماعيل: ليه الوش الغامق ده بس؟

أ. محروس: غامق ولأ فاتح... خلصوني... عاوزين إيه؟

علاء: لا.. الأول إسماعيل هيجب سندوتشات ونفطر مع سعادتك ونشرب

شاي... ونصطبج.

إسماعيل: (مقاطعًا) بس أنا لسه فاطر.

علاء: (يغمز له) يا أخي إحنا لسه... روح وهات سجائر معاك.

أ. محروس: لو كل الناس زيكم كده بتفهم كنت ارتحت.

إسماعيل: يعني إيه؟...

علاء: روح بسرعة قبل ما الأستاذ محروس يتزحم (بعنف).

إسماعيل: حاضر يا عم بالراحة (ويذهب لإحضار المطلوب).

علاء: بس بقى يا باشا... هم ثلاث دوسيهات في السريع.

فؤاد عبد الحميد السيد - إسماعيل أحمد فهمي - وعلاء أحمد محمود
أ. محروس: عنيه... إنت تأمر... على فكرة الأستاذ صبحي بيشكر فيك
قوي وبيقول ياريت تكمل أحسن...
علاء: إن شاء الله... بس نشوف موضوع التجنيد...
أ. محروس: مش انت وحيد برضه؟!
علاء: هو فيه حاجة تضمن في البلد دي؟
أ. محروس: على قولك (ويهم بالبحث عن الدوسيهات وترتيبها).
إسماعيل: المطلوب وصل والشاي هيجي على طول... والسجاير آه.
أ. محروس: تمام... والدوسيهات بتاعتكم تمام اقعديوا أفطروا بقى (يحضر
هنا عدد من الطلبة).
علاء: ربنا يخليك يا أستاذ محروس... سلام (مبتسمًا).
إسماعيل: (هامسًا) بالسم الهاري.

(وفي هذه اللحظة يلتفت إلى الطلبة القادمين وبزمجرة يقول لهم)

الأستاذ محروس خير)

إسماعيل: يا أخي انت بتهرج؟... تخليني نغرم يجي عشره جنيه على
الصبح؟...

علاء: أحسن كده ولا مناخدش دوسيه فؤاد... ولأ الورق يبقى ناقص؟...
يابني ده بقى أسلوب من القمة إلى القاع عارف الأستاذ
محروس ده مرتبه يجي كام؟... تقريبًا (مائة وعشرين جنيه)
إيجار الشقة اللي هو فيها يجي مية جنيه يعني بيعيش طول
الشهر بعشرين جنيه... فاهمني؟

إسماعيل: مانت عارف هو أنا لو بفهم يبقى ده حالي؟
علاء: يعني هم بيقولوا اسرق بس مداري... هو ده معدوم الدخل.

إسماعيل: مين اللي بيقوله اسرق؟...

علاء: إظاهر إنك عاوز تحبسننا... نتقابل بالليل في الجنينه وابقى كلم
فؤاد... وتعالى.

إسماعيل: إنت مش جاي معايا؟...

علاء: أنا هاروح للأستاذ صبحي... سلام.

إسماعيل: سلام.

(ويذهب علاء إلى منزل الأستاذ صبحي...)

أ. صبحي: إزيك يا علاء يابني؟... اتفضل.

علاء: ربنا يخليك يا أستاذ صبحي... معلش أنا جيت من غير معاد...

أ. صبحي: البيت بيتك يابني... خير؟

علاء: الموضوع باختصار... إني عاوز أكمل... بس خايف.

أ. صبحي: بص يا علاء... مادام خايف يابني يبقى هتنجح وأهم شيء

القدرة والرغبة... إنت عاوز تبقى إيه؟

علاء : أنا عاوز أبقى رجل أعمال ناجح وأبقى خريج تجارة.

أ. صبحي: كده يبقى حددت 50% من طريقك... ومجموعك يدخلك

الكلية... تذاكر... تركز... تنجح... والهدف موجود تعرف

المشكلة دلوقتي في التربية.. إن الولاد طالعة بدون هدف مش

عارف هو عاوز إيه... أي حاجه... أي حاجه... تحس إن الهدف

والطموح عنده... مات وبقى عنده استسلام رهيب وغريب.

علاء: ما انت شايف البلد كلها...

أ. صبحي: بس ابدأ بنفسك... لو كل واحد بدأ بنفسه البلد هترجع أحسن من الأول... وأي نظام يا بني... لما يبقى فيه ناس بيحافظوا وخافين عليه هيتحسن مش شرط في يوم وليلة بس هيتحسن في وقت ما... وهيبقى تقرأ في السياسية لما ربنا يكرمك: العملة الجيدة بتطرد العملة الرديئة. ياه يا علاء فكرتني بأيام الجامعة يا بني... آمال فين زمايلك إسماعيل وفؤاد؟

علاء: أنا وإسماعيل سحبنا الدوسيهاات وهما بقى هيشوفوا موضوع التجنيد.

أ. صبحي: وفؤاد؟

علاء: وسحبنا لفؤاد.

أ. صبحي: على فكرة الولد فؤاد ده دماغه حلوه... بس عنيد ومش محدد هدفه زيك ولا زي اسماعيل.

علاء: مانت شايف الظروف... من سيء للأسوء.

أ. صبحي: على قولك بس هو يحاول... نسيت تشرب إيه؟... ولا أقولك تتغدى معايا أحسن.

علاء: (يهم بالوقوف)... ألف شكر ليك يا أستاذ صبحي... حضرتك بتفهمنا كثير قوي...

أ. صبحي: في أي وقت يا علاء لو احتجت أي حاجة أبقى تعالى قولي وطمني عليك انت وصحابك.

علاء: إن شاء الله... سلام يا أستاذ صبحي.

أ. صبحي: سلام يا بني ... وربنا معاكم.

(يخرج علاء من منزل الأستاذ صبحي وهو مقبل على فكرته تمامًا...
رجل أعمال ولبد أن ينجز هذا الحلم، والبداية: كلية التجارة... ويذهب
لمقابلة الثنائي في الموعد)

إسماعيل: إيه ياعم وشك منور... ولا أكلك واخذ الدكتوراه.
فؤاد: والله مش أقل منها... ربنا يكرمه.

علاء: مابلاش تريقة وحياء أبوك انت وهو... وخلصونا.
فؤاد: والله مابهرج ولا باتريق... أنا بتكلم بجد... إنت مش ناوي تكمل
ولا إيه؟...

علاء: ده حلمي... بس مش عارف ظروف الشغل في مصر هتبقى إيه...
فؤاد: كمل انت ومالكش دعوة... ربنا إن شاء الله هيسهل... وأنا والبغل
ده ربنا يكرمنا ونسد معاك.

علاء (ضاحكًا): ... مانتو أهلي وناسي برضه... وايه الأخبار؟
إسماعيل: مفيش جديد لغاية التجنيد...

فؤاد: عاوز أخلص التجنيد ده علشان نشوف حالنا ومصالحنا بقى.
علاء: كل شيء بأوان..

(وتمر الأيام سريعًا حتى يحين موعد تجنيد إسماعيل، ويتقابل ثلاثتهم
في منزل علاء)

إسماعيل: أنا وأبويا رحنا منطقة التجنيد... وخلال أسبوعين لازم نروح
تاني علشان قالوا إن احنا دفعة شهر واحد.
فؤاد: يعنى ماعرفتش الدفعة بتعتنا هتاخذ تاجيل ولا لآ؟ ...

إسماعيل: محدش عارف ولا اللي في المنطقة نفسها. تعرفوا؟... أنا شفتنا هناك ولد معوق.

علاء: فين؟... في التجنيد؟

إسماعيل: آه والله... قال لازم يروح المنطقة ويتعمله فرز واللجنة الطبية هناك تقول الكلام ده ... والولد يقول للراجل حضرتك إنت شايفني أنا بتعب لما باجي منطقة التجنيد طيب لما اروح القومسيون هاعمل إيه؟.. معقوله والراجل يرد عليه ويقوله معلش يابني ده قانون...

علاء: قانون إيه ده بس؟... المفروض الحالات الخاصة اللي زي دي يبقى ليها قومسيون في المحافظة وخلص... ده تهريج... واستهتار بالبني آدم منا.

فؤاد: أنت قلبتهم الموضوع غم ليه كده؟... عاوزين نهيص شوية أنا سمعت إن في فرح عند أولاد الحاج عبد الباقي... ماتجي نروح نهيص شوية ونفك من الخنقة دي...

إسماعيل: معاك ياباشا...

علاء: أروح أنا علشان أوضب حالي...

فؤاد: يا عم حالك إيه وحالنا إيه... أنت هتيجي يعنى هتيجى... ده انت الوحيد اللي المفروض تبقى فرحان.

علاء : ليه يعني؟

فؤاد: يابني انت الوحيد اللي عارف إنك مش هتخش الجيش... إلا بقى... (متغمزًا)

علاء: خلاص يافؤاد هنروح الفرحة وبلاش قباحة... (ضاحكًا).

(وبالفعل يذهب الثلاثة إلى الفرحة...)

فؤاد: شفت البت اللي في النص؟... بترقص بجد.

إسماعيل: فين؟... أم اخضر إنت شايفها ياعلاء؟

علاء: ما انت عارف مليش في الرقص.

فؤاد: أيوه... البت ملبن... حته بسبوسة (بدأ في ملاغيتها من بعد).

علاء: ياعم فؤاد ارحم نفسك... هي برضه هتيجي لتلامذه لسه بيخدوا

المصروف؟... ما هي قدامها المعلمين.

(ويشير إلى الطاولات المرصوص عليها البيرة ولفافات المخدرات

المختلفة)

فؤاد: ماشي يانكدي انت وهو أنا أحسن ليه أنزل في القهوة ولا أقعد

معاكم (ضاحكًا).

علاء : طيب مش يلاً بقى نروح؟

فؤاد: يلاً يانكدي؟

(ويذهب الجميع من الفرحة ويتقابلون في يوم الذهاب إلى منطقة

التجنيد دفعة يناير)

إسماعيل: إيه الجو ده؟...

علاء: إثبت بقى تلجنتي..

إسماعيل: على فكرة إحنا لو وقفنا في الجو ده ممكن نتجمد.

علاء: نقف هنا أحسن علشان اخلص منك.

فؤاد: صحيح إحنا واقفين هنا من بدري ومحدث عبرنا.

طالب في التجنيد: إحنا واقفين بقالنا أربع ساعات.

فؤاد: وانت خريج صنایع ولا تجارة؟

طالب تجنيد: لا أنا في الأمن المركزي.

علاء: طيب من اللي قالك اقف هنا؟ (ضاحكًا).

طالب: هما وقفونا هنا الصبح وقالولنا بتوع الأمن المركزي اللي يمشي

منهم يجي بكره.. وانا مش عارف أنا في الأمن المركزي ولا إيه.

فؤاد: آه... وانت بقى مش عارف تمشي... لا تمشي ليه؟ خليك... يالآ ياعم

علاء لحسن أنا تعبان لوحدي.

علاء: اسمك اتنده يا اسماعيل يالآ بسرعة... يبقى إحنا خلاص قربنا.

فؤاد: واسمك ياعلاء اتنده أهو... يبقى اسمى أنا بعدكم.

إسماعيل: هاه... إيه الأخبار يا فؤاد؟... الشهر الجاي معايا...

فؤاد: هانيجي علشان نسمع السلاح ونلبس... وانت ياعلاء؟...

علاء: أنا ورق التأجيل بتاعي هاجي أخده بعد شهر المهم انتو...

إسماعيل: مش وقت ولا مكان حكاوي.. يالآ نروح... ونشوف امي عامله

إيه؟... أحسن الجو هنا حكاية.

فؤاد: على قولك... يالآ ياعلاء.

(يصل الجميع بيت إسماعيل)

أم إسماعيل: ازيكم يا حبايبي؟... والله وحشتوني.

إسماعيل: الغدا بسرعة يا اما.

أم إسماعيل: شوربة عدس... إنما إيه.

فؤاد: تمام... ربنا ما يحرمنا منك يا أصيلة.

علاء: والله ياخالتي تعبينك معانا.

أم إسماعيل: وانتو بقى أخباركم إيه؟... ومين بقى اللي هيدخل الجيش
ومن اللي هيتأجل؟

علاء: طبعا يا خالتي أنا تأجيل... علشان الوالد.. الله يرحمه وأنا كبير
العيلة ومفيش غيري ولد.

أم إسماعيل: الله يرحمه يا بني.

علاء: وطبعا فؤاد والأستاذ إسماعيل هيدخلوا الجيش لأن الرجالة اللي
هناك قالولهم تيجوا علشان تسمعوا السلاح وتلبسوا.

فؤاد (وهو يأكل بشرهة): من ناحية هنلبس فاحنا هنلبس (إسماعيل
وعلاء ضاحكين بصوت عالٍ).

إسماعيل: إيه يأمي مفيش حاجة حلوه بعد العدس وشربته ولا تعمللنا
شاي ولا يوسفي؟

علاء: ياريت ماتتعبيش نفسك إحنا هنمشي.

أم إسماعيل: يوه... يا بني هو ينفع؟... عيب عليك كده يا علاء.

فؤاد: خلاص ياخالتي يبقى يوسفي... (وأحضرت أم إسماعيل اليوسفي
وتركتهم).

فؤاد: أنت بقى من الشهر الجاي هتبقى في القاهرة ... يا بختك

علاء: مانت عارف هاروح على شغل وعلى دراسة يعني مفيش لف
ولا صياغة.

إسماعيل: بس لما نيحي عندك تبقى تطبطننا.

علاء: يا بني انت بتهرج؟... أظبطكم إيه هو انا هيبقى عندي وقت؟

فؤاد: وأمك هتعمل معاها إيه؟...

علاء: عاوز أخدها معايا... بس هي بتحب هنا... والمسألة مسألة وقت.. أظبط حالي واخدها معايا وتبقى قريبة من بنتها... وأنا هازورها كل أسبوع وهي هتيجي عندي..
إسماعيل: أمك دي ست طيبة... والله اللي اتحملته ما يتحملهوش
جمل... أمك دي راجل بجد.
فؤاد: هيلبخ بأه.
إسماعيل: مش قصدي والله... أنا قصدي إنها جدعة.

الكل يضحك... وبعد شهر يدخل إسماعيل وفؤاد الجيش... ويذهب كل واحد منهما إلى معسكره، ويسافر علاء إلى شركة السياحة حتى يعمل بها... يستلم فؤاد لبس التجنيد، ويتم حلق شعره وكذلك إسماعيل، ويمر الشاويش عند نوبة الصحيان مبكرًا على فؤاد.

الشاويش: إصحى يا عسكري انت وهو

(بصوت مرتفع مع دخول عدد من الصولات).

عسكري1: إيه في إيه?... مين

(ويحدث هرج ومرج وضرب).

فؤاد: هيه الساعة كام دلوقتي؟

عسكري2: الساعة خمسة ونص الصبح.

الشاويش: قوم يا عسكري... انت وهو بلاش دلج.

فؤاد: الحزام يا شاويش مش نافع... واسع.

الشاويش: إيه ياخويا?... إيه يا حبيبي?... حزام?... اسمه آيش ارقد

ياعسكري يامستجد ارقد.

فؤاد: يا حاضرة الشاويش.

الشاويش (بنبرة صارخة): ارقد يا عسكري...

(يرقد فؤاد في وضع الضغط... ويرى جميع العساكر تلبس في سرعة،

وفي حركات بلهوانية)

الشاويش: تعالي يا خفيف... اسمه إيه بقى؟

فؤاد: الأيش يافندم... (بنبرة صارخة)... آيش يافندم.

الشاويش: كمل لبس بقى يا حبيبي.

فؤاد (يقوم بلبس السترة ولكن الجزمة): ... الجزمة يا شاويش شكلها

واسعة قوي.

الشاويش : الجزمة؟.. الجزمة؟... إنت باين عليك مش ناوي تطلع من

هنا... لف يا خفيف..لف.

فؤاد: ليه بس؟... أنا قلت حاجة غلط؟

الشاويش (بصرامة): ... لف يا خفيف... اسمها البيادة... لف.

(يتمتم فؤاد بالسب على الشاويش ويلف... وهذا أول يوم يقضيه فؤاد

في مركز التدريب)

(يذهب علاء إلى الشركة مع ابن عم والده)

العم سليمان لعلاء: بص بقى يا بني الشغل هنا سهل خالص... بس

عايز صبر... هنا لازم تعدي الأمور... لو عاوز تاكل عيش

يعني تسمع الكلام وحاضر وطيب انت هنا مرافق مع سواق

العربية فاهم يا علاء؟

علاء: فاهم يا عمي... إنت خايف ليه كده؟

العم: أنا عارفك وعارفك إنك طموح ممكن تتكلم أو تتفلسف على حد
وتقوله الجامعه والمذاكره والبلد... هنا يابني مش زي البلد
الي انت كنت عايش فيها هنا القاهره يابني. يعني شغلك
وفلوسك أهم حاجة...

علاء (متأففاً): ... حاضر ياعمي... فاهم... شغلي وبس.

العم: أيوه كده يابني. طمني ربنا يطمنك... تعالى بقى ندخل على
المدير ونعرفك بيه ونديله الدوسيه بتاعك.

(مطبخ المعسكر وبه جوانات من البطاطس والباذنجان والكوسة)

الصول: إنت يله إنت وهو خلصوا الأكل.

إسماعيل: إحنا لسه بنقشر يافندم...

الصول: مين الحمار الي بينهق ويرد؟...

إسماعيل: طلبة المطبخ يافندم (وهو مازال يقشر في الباذنجان).

الصول: إنت يا حبيبي فاكر نفسك في فندق؟... الأكل يكون جاهز بعد

ساعة من دلوقتي... فاهم؟

إسماعيل: يافندم إحنا لسه بنقشر ولسه هنوضب الأكل ونقى الرز.

الصول: تنقى؟... ما تنقى تقشر متقشر... الأكل بعد ساعة فاهم؟

إسماعيل: تمام ... يافندم.

(يذهب الصول... يفتح إسماعيل جوال الأرز مع صديقه العسكري

ويفرغه بكامله في آزان الطبخ ويضع باقي الأكل كاملاً في الآزان الآخر....

منفعلاً)

مدير الشركة: وإنت بقى ياعلاء بتعرف تقرا وتكتب ولا إيه؟ عشان انا
عارف خريج الدبومات.

علاء: لا الحمد لله حضرتك أنا بعرف وأقدر أتكلم إنجليزى وشوية
فرنساوى... ومقدم في كلية التجارة... هنا في القاهرة (ينظر
إليه عمه).

المدير: عظيم... شوف أنا كنت هخليك تطلع مع ميكروباص بس شكلك
وأسلوبك... هخليك تبقى على عربية صغيرة تعرف نظام
الليموزين وتكون مع سواق كويس.

علاء: تحت أمر حضرتك.

المدير: نفس النظام ونفس المرتب.. بس الخدمة أرقى وانت وشطارتك...
علاء: ربنا يخليك يافندم ...

المدير: سلم الدوسيه بتاعك في شئون العاملين وانا هاتصل بيهم.. على
بال ماقعد مع عمك شويه.
علاء: أوامر حضرتك.

(يتقابل الاثنان بعد مرور شهر تقريبًا، ويبدأ بالبحث عن علاء)

فؤاد: وله يا اسماعيل... إسماعيل.

إسماعيل: ازيك يافؤاد؟... وحشتني.

فؤاد: انزل تعالى...

إسماعيل: ما تطلع..

فؤاد: يا أخي أنا زهقان انزل..

إسماعيل: حاضر...

فؤاد: خش عليا بالحضن واحشني يا ابن الملوثة.. واحشني والله أنت وعلاء... تعالى نقعد على القهوة نفسى أشرب معسل...

إسماعيل: وأنا كمان... يآلآ بينا.

فؤاد: أخبارك إيه في مركز التدريب؟ إنما قولي... إنت خسيت ليه كده؟
إسماعيل: طلع تلاتة عين أهلي... في الطبخ الصولات تقول مش عارفين غيري؟ كل شويه طلبه مطبخ.

فؤاد (ضاحكًا): ... بس انت خاسس... يعني تطبخ وخاسس إزاي؟

إسماعيل: ما أنا بقرف من الأكل اللي بعمله علشان كده ما بكلهوش بروح أشترى بسكويت وقرص من الكانتين.

فؤاد: الله يخرب بيتك العيال يجلبها تسمم...

إسماعيل: ولا جرى لهم حاجة دي صحتهم جت على الأكل بتاعي...
المهم.. الواد علاء يأخني وحشني خالص.

فؤاد: والله... وأنا كمان.... إيه رأيك نروحله مصر؟

إسماعيل: خلاص نروح مصر ياباشا ونقعد عنده يومين نروق كده إنت تطلع على دهشور وأنا على الهايكستب من هناك.

فؤاد: على فكرة ياسماعيل إنت اتغيرت.

إسماعيل: ليه؟

فؤاد: بقيت بتفهم... وأنا كده هخاف عليك.

(ضاحكًا... ويذهب الاثنان إلى القاهرة عند علاء...)

علاء: ياولاد التعبانة... والله ليكم وحشه.

فؤاد: إنت والله أكثر عامل إيه؟

إسماعيل: واحشني ياعلاء... واحشني أكلم حد يكون يفهم (ضاحكًا).

علاء: الأول نروح نتعشى في الحسين وبعدين نتكلم.

(ويحكي فؤاد المواقف التي حدثت معه... وكذلك إسماعيل خلال

العشاء)

إسماعيل: وانت ياعلاء عامل إيه؟... إيه أخبارك بتدرس ولا الشغل خدك؟

علاء: لا أنا قدمت في كلية التجارة... وشغال في شركة السياحة على عربية

ليموزين.

إسماعيل: يعني إيه... عربية لموزين دي؟

علاء: بص يا عم الغليظ... شركات السياحة فيها أتوبيسات بتاعة السياح

لكن في سياح مهمين بيحتاجوا عربية مخصوص ليهم... أنا بقى

اللي بقى زي السكرتارية بتاعة الناس المهمة بتاعة بره...

إسماعيل: على كده فيه أجنب بيجوا مصر؟...

علاء: طبعًا... على فكرة.. إحنا تقريبًا مبنفضاش.

فؤاد: أجنب يعني من أمريكا... فرنسا... إنجلترا... مش عرب بس

يعني.

علاء: على كل لون يابتستا.

إسماعيل: على سيرت الحلو بقى... عاوز آكل أم علي.

علاء: أنا بقى هاعرفك على أم علي وأبو علي وأخت علي وبنت اخت

أم علي...

(وينتهي اليومان، ويذهب كل منهما إلى منطقة تجنديه، ويترك علاء

إلى عمله)

الشاويش (ينادي): ... فؤاد عبد الحميد السيد.

فؤاد: تمام... يافندم.

الشاويش: توزيع على التل الكبير ياخفيف... اللي بعده حسين محمود

إبراهيم.

فؤاد : تل إيه بس وزفت إيه؟ كنت فضلت في القاهرة.

(ويركب فؤاد العربية، ويذهب إلى نقطة معسكره الجديد... ويتعرف

هناك على زملاء السلاح)

إبراهيم: إزيك ياباشا؟... بني سويف.

ريمون: عامل إيه يا برنس؟ ... اسكندرية.

سعد: حمد لله على السلامة... القاهرة ... العمرانية.

إبراهيم: بص بقى يا سيدي إحنا نخلص اليوم وانت تنام معنا النهارده

وبكره تعرف مهماتك ونعرفك على البلد.

سعد: عموماً البلد هنا صغيرة ما تقلقش يعني يومين وتحفظها.

ريمون: نام وبكرة تعرض نفسك على الطابط النبتشي علشان الاستلام.

فؤاد: تصبخوا على خير...

الجنود: وانتوا من أهله..

(وفي الصباح، يتم عمل كل شيء بالنسبة له، ويعرف موقعه من

سريته، وتمر الأيام، ويأتي المساء، ويجتمع الجنود بالليل، ويبدأ حديث السمر
(بينهم)

سعد: إيه يا ولاد الساعة داخله على عشرة... إيه مش هانروح عند عم
شناوي؟

ريمون: آه أتأخرنا... بس إيه الأخبار؟ الجو في الكتبية عامل إيه؟

سعد: عامل ولا مش عامل إحنا نروح وربنا يفرجها.

سعد: خلاص يانجم نروح... ماتيجي معانا يا فؤاد...

فؤاد: على فين؟

ريمون: على قهوة المعلم شناوي.

سعد: يا سيدي ده راجل عنده قهوه... وجايب عقبال عندك دش

استقبال أمريكي... يفتح كل القنوات الثقافيه... بنروح عنده

حتى مطلع الفجر وبنرجع معتدل فرش على هنا...

ريمون: يعني من البيت للكباريه ومن الكباريه للبيت... آخر احترام.

إبراهيم: ماتضغوش على الراجل... براحتك عاوز تيجي... أو مش عاوز.

فؤاد: أنا مش هاعرف اقعد لوحدي هاروح معاكم أحسن.

سعد: مش بقولك؟... ابن حظ وفرشة.

(ويذهب الجميع إلى مقهى المعلم شناوي، ويتم التعرف سريعاً،

ويظهر فؤاد بين الشلة بخفة ظله وشهامته، ولكن بعد مرور أكثر من شهرين

يحدث شيء ما؛ فتهجم التحريات العسكرية على المقهى)

فرد تحريات: فين بطاقتكم؟

إبراهيم: مين حضرتك؟...

فرد تحريات: إحنا التحريات.

إبراهيم: التحريات مش من حقها تشوف بطايق المدنيين.

ريمون: ولأ علشان إحنا يعني في منطقة عسكرية؟

إبراهيم: تسمع؟ إحنا هانمشي...

فرد تحريات: كارنيهاتكم الأول وبطايقكم... ومحدث ها يخرج.

فؤاد: دي عافية بقى...

فرد تحريات: مش هنتكلم.. تاني... نفتش ولا إيه؟

فؤاد: بعد إذنك كده يا إبراهيم.

(ويلكم فرد التحريات بوكسًا أفقده توازنه).

(وتحدث معركة في مقهى المعلم شناوي ويتلقى أفراد التحريات علقه)

ساخنة، وحضرت التحريات في اليوم التالي إلى المعلم شناوي وسألتهم عن الأشخاص المعتدين على أفراد التحريات، وأنكر الرجل معرفته بهم وأنهم زبائن من النوع الطياري، جلس أربعتهم في المعسكر لمدة تزيد عن خمسة وعشرين يومًا لا يخرجون من معسكره يتابعون الأخبار... والكل حاول تغيير ملامحه من كان بشارب حلق شاربه والعكس، أو من حلق رأسه بالموسي، وهكذا وفي ليلة من هذه الليالي خرج أربعتهم مرة ثانية وذهبوا إلى مقهى شناوي الذي استقبلهم بحفاوة بالغة)

المعلم شناوي: أهلاً بالرجالة... غيبتكم طويلة أوي... إيه الأخبار قلقتوني عليكم؟

سعد: لا مفيش.. كل حاجة تمام... الحمد لله بس على فكرة يا معلم... اللي بيعمله ده حقه... لو معملش كده الجيش أو المجندين اللي مش فاهمين حاجة ممكن يخرّبوا الدنيا واحنا غلط برضه... بنهرب من غير تصاريح ونسهر في وسط مدنيين وخلافه... فلأزم شيء يحكم الموضوع... بس الأسلوب.
فؤاد: إبراهيم.. بلاش الكلام الكبير ده... إيه يا معلم مش هناك ونشرب وكده ولا إيه؟

المعلم: والله من بعد خنقتكم... الحكومة جت شالت الدش الكبير وجبت دش صغير... ومن ساعتها وأنا حامد شاكر تمام على كده اللي يخرّب بيته اللي دخلوا الدشاش البلد.. وإشي كامة و 2 كامة وكارت وأبصر إيه... كده أنا اشترت دماغى اللي عاوز يتفرج على حاجة كده ولا كده ميلاقيش يقوم يشرب ويمشي.

إبراهيم: أظن الموضوع ده تعبك.

المعلم شناوي: واللي خلق الخلق... بقيت بحس بطعم الفلوس.

المعلم شناوي: إيه عاوزين إيه؟ (صياح في المقهى من بعض المجندين

الموجودين في المقهى).

زبون1: مانت عارف يا معلم.

زبون2: هو احنا جاين الأوبرا؟

المعلم شناوي: كل واحد يدفع جنيته... وتشوفوا المشاريب.

زبون1: حلبة.

زبون2: عناب.

زبون3: سحلب.

(أخذ المعلم شناوي يبحث في القنوات، وبعد ذلك يرفع جلابيته

بطريقة فكاهية)

المعلم: شوفتوا بقى.. دول شوية على قد فلوسكم... اللي عاوز يشوف

أكثر يدفع أكثر (ضاحكاً).

إبراهيم: إيه يا معلم زعلت الناس... (صياح في المقهى بين الزبائن

والجنود الآخرين...)

المعلم: يابني خلاص توبه نوصحه... مفيش كامات ولا كروت.. دش عادي

وقنوات رياضية... يابني داخنا نسينا الرياضة... شوف للعبة

بتوعتنا دلوقتى واللعبة بتاعة أوروبا ومنتشات أوروبا... تعرف

إن احنا بقينا في الحضيض... من كله.

إبراهيم: على قولك... إيه يا فؤاد مالك شكلك مش ولا بد؟
فؤاد: لا.. اتصلت بيهم من يومين وشكل أبويا تعبان.. شكله تعبان
خالص... أبويا من النوع لو رقد يموت وأنا حاسس..
إبراهيم: متكلمش يا أخي ربنا يقومه بالسلامة.
فؤاد: هاقوم اتصل بيهم...
إبراهيم: آجي معاك؟
فؤاد: لا.. خليك... أنا هاتصل وهاجي على طول (يقوم بالاتصال)
فؤاد: ألو... أيوه ياجمعه...
جمعة: أيوه يا فؤاد..
فؤاد: إنت بتعيط ليه يا جمعه؟ إيه الي حصل؟ قوللي ياجمعه أوعى
تقوللي أبوك جرى له حاجه... أوعى ياجمعه.
جمعة: شد حيلك يا فؤاد... أبوك تعيش انت.
فؤاد: أبويا (باكيًا)... أبويا... (يغلق التلفون ويكون إبراهيم ملاحظًا لة
للمحل الذي أقام منه بالاتصال).
إبراهيم: فؤاد... فؤاد... استنى أنا جاي معاك... سعد.. أنا هاروح مع
فؤاد لازم حد يكون معاه قول للأولاد وابقى ظبطها انت
وهات الفلوس الي معاك... وأنا بالكثير جاي بكره...
المعلم: لا اله إلا الله ... لو عاوز فلوس ياسعد يابني خد اديها لصاحبك...
سعد: خيرك موجود يامعلم... ربنا يخليك.. هاروح انا علشان نظبط
الكلام في الكتيبة يالآ ياعم ريمون.

(ويذهب كل من إبراهيم وفؤاد إلى السرداق المتواضع لوالد فؤاد)

فؤاد: محمد.. أبويا يا محمد... محدش يقللي ولا حد يتصل بي؟ (يحضنه

محمد أخوه ويأتي إليهم أخوهم جمعة)

جمعة: خلاص يا فؤاد عيب كده ... أبوك ميت وهو بيدعى لينا... إثبت

مش كده.

فؤاد: طيب كنت أشوفه قبل متدفنوه.

محمد (باكياً): ... اقف في عزا أبوك الأول... وبعدين نتكلم.

ابراهيم: إيه ياعمنا في إيه؟ ده بتاع ربنا وبعدين ما انت عارف إكرام

الميت دفنه.

فؤاد: لا إله إلا الله...

إبراهيم: سيدنا محمد رسول الله... ده ملناش فيه وصاحب الأمانة استرد

ودعته.

(في نهاية اليوم الثاني من العزاء، يأتي كل من رفقاء العمر يجلسون مع

فؤاد بمنزله)

إسماعيل: بقول إيه ما تيجي نتمشى شويه.

علاء: إيه رأيك يا فؤاد؟... قوم معنا.

فؤاد: لا سيبوني أنا مش قادر اخرج.

إسماعيل: والنبي يا أخي لتقوم.

علاء: يافؤاد متصعبش علينا الأمور قوم بقى نتكلم بره.. يالآ..

(ويقوم من سريره، ويذهب معهم، ويمشون في طريق شبه متهاك

بأضوائه الخافتة)

علاء: مالك يا فؤاد؟...

فؤاد: يا أخي أبويا ده ماشفتش يوم حلو في حياته.. كل حياته كانت كفاح وتعب مستمر.. حتى الشغلانه اللي كان بيشتغلها كلها تعب... فاتح القهوة وهي مش سهله... وعمره ماانتظر إن حد منا يساعده.. بس الغريب في كده كنت تحس إن ضميره مرتاح... وراضي.

علاء: إنت جبت المفيد... الرضا... ماهو ده اللي يجيب راحة الضمير إنك تكون راضي... على اللي انت عملته وبتعمله... والتضحية... علشان بتحب ناس لازم تضحي عشانهم. إسماعيل: يعني إيه؟... أنا عمري مارضيت على اللي بعمله ونفسي أكون كبير أوي...

علاء: الطموح حاجة... والرضا حاجة تانية... الطموح... إنك بتحاول تكون أحسن من الوضع اللي انت فيه مع رضاك على الوضع اللي انت فيه.. مش إنك كارهه وبتلعنه... بس عاوز تبقى أحسن... وده مش عيب... العيب إنك تكون كاره أصلك ومجتمعك وناسك... ولا إيه يا فؤاد؟...

فؤاد: إنه كاره دول كلهم... ومش عارف بكره مخبي إيه. إسماعيل: إيه رأيكم نشرب كركديه؟.. تلاته كركديه والنبي يابرنس وتلت شيش .

(لعامل المقهى التي جلس الجميع عليها شبه فارغة)

علاء: ليه بس بتقول كده؟... يا فؤاد عمر مكان الفقر عيب وأدينا بنحاول.

فؤاد: ياعم علاء مانت شايف اهو... إنت بزمتك مش لو كنت غني

زمانك في كلية من ثانوي وأهلك ببصرفوا عليك مش بتشتغل
وبتصرف على نفسك وطالع أيمانك في العيشة.
علاء: على فكرة يافؤاد... أنا مبسوط باللي بعمله ومرتاح ليه كثير..
وبحمد ربنا على كده.. ومش ناقم على الحياة.. والحياة كفاح..
وعلى فكره حالتنا أحسن من ناس كثير أوى.. أنا شفت ناس
في مصر لو ما اشغلتش يوم ما تعرفش تجيب عيش حاف
لعيالها..

فؤاد: حتى لو نقت عليها هاتعمل إيه يا عيني؟... أنا بقلق لو كنت
غني من الأساس...

إسماعيل: فؤاد.. خيلنا نفكر احنا بعد مانخلص الجيش هنعمل إيه؟..
علاء عرف طريقه خلاص وفي سنة تانية واحنا اللي لسه مش
عارفين...

فؤاد: بفكر افتح القهوة بتاعت أبويا... الكبير في الاستوديو مع المصورات
وجمعة سواق والبنات طبعًا اجوازهم كل واحد في شغله.
والصغير مش في دماغه وانا صعب عليا أوي أشوف قهوة ابويا
مقفوله.. مش عارف أول مرة أحس الإحساس ده...

علاء: يعني انت خدت قرار ولأ لسه؟...

فؤاد: ده قراري دلوقتي.. بس مش عارف الظروف هتعمل إيه..

علاء: إنت مش كنت بتفكر في السفر؟...

فؤاد: عمومًا فكرة السفر موجوده.. بس اشوف الوضع إيه..

إسماعيل: أنا جعت... عاوز آكل.

علاء: أبوك مخلف خرتيت صغير.

(يضحكون، وبعدها يذهب فواد للمعسكر، وتمر الأيام وتشارف على
الانتهاء من مدة الخدمة..رديف)

فؤاد: إيه يا عم ريمون إيه الدفعة الجديدة اللي جت دي؟ ... دي
أغلبهم من الصعيد إبسط يا عم.

ريمون: آه... هنعمل إيه؟ خليههم بقى يخدوا مكانا ويدوقوا شوية.. بس
الله يكون في عونهم وعونا الجو حر أوي الصيف ده إيه موت

...

فؤاد: على قولك ربنا يعنا ويصبرنا على الشهرين الفاضلين دول لحسن
الواحد زهق خالص... وبعد أيام...

سعد: السلام عليكم... إيه يافؤاد أنت فين مشفكش من الصبح؟...

فؤاد: إنت اللي مش ظاهر...

سعد: كان في تقرير لازم أكتبه وأبعته على الفاكس للجنرال.

فؤاد: ياه ... كل الفترة دي وما اعرفش إنك بتكتب في الجرايد؟

سعد: يعني كنت هتعمل إيه؟... ما أنا جنبك آهو... الجته كلها

جنبك... وبعدين موضوع الجنرال ده... حاجة كده هواية يعني

مش مهنة... ده حتة ناس بقالها أكثر من عشر سنين بتكتب في

جرايد ومعهاش كارنيه نقابة الصحفيين.

فؤاد: وإيه كارنيه النقابة بتاعة الصحفيين ده؟...

سعد: بس يا سيدي كل عمل المفروض يعني يبقى له نقابه... ترعى

مصالح الناس المشتركين فيها وتجييب حقوقهم وترعاهم وتخاف

عليهم مقابل ده النقابه بتاخذ فلوس على كده وتدى معاشات

وتأمينات وكده.

فؤاد: طيب مالموضوع سهل...

ريمون: إيه المشكله بقى؟... ما كل شيء محلول آهو.

سعد: جاك حل وسطك... بص ياعم إنت وهو... كل نقابه بلاش كل نقابه... نقابة المحامين والمهندسين والصيدله والأطباء... لازم طبعًا يكون الشخص في خريج الكليات بتاعتهم علشان يبقى عضو نقابة أما الصحفيين... فليها شروط مختلفة عن النقابات دي لازم تكون كتبت في جرايد قبل كده ولازم تبقى خريج كلية ويكون مر عليك أكثر من ثلاث سنين بتكتب... وبتدرب في جريده.

فؤاد: طيب مانت فيك كل الشروط دي...

سعد: بص تجي بقى للعدد اللي بيتاخذ كل سنة والوسايط بقى ياعمنا
...

ريمون: حتى الصحافة فيها وسايط؟

فؤاد: الصحافة... أنا بسمع إن الصحفيين دول يعني على قد حالهم وحياتهم كلها تعب وقرف... وتركيز وكلام من ده يعني...
سعد: دي الصحافة الشريفة أو بمعنى أدق القلم النضيف لكن دلوقتي الموضوع بقى شغل سبويه وشوية علاقات وتخليص مصالح.

ريمون: إزاي بقى؟

سعد: بص ياريمون... زمان كان الصحفي بمجهوده.. معرفته.. بثقافته... أما دلوقتي الموضوع بقى تجارة وبيزنس... علشان كده متمعش عن صحفي حر زي زمان... إلا في صحف المعارضة اللي يادوب

بتتوزع وبتغطى تكاليفها...

فؤاد: يعني برضه فيها كوسه...

سعد: مش كوسه بس... المسألة مسألة عدل وتطبيق القانون حتى لو قانون وضعي.. أهم شيء تطبيقه على الكل.. بلوائح وضوابط معروفه... عارف زمان كان محمد عبده... بيقول: «رأيت مسلمين بلا إسلام، ورأيت إسلامًا بلا مسلمين». هو ده تطبيق العدل...

ريمون: ماشي يا عمنا...

سعد (ضاحكًا): هو انت يابني مسيحي؟... إنت مصري... وأنا مصري.. التطبيق هو الغلط ...

فؤاد: على كده انت بتفكر تبقى صحفي لما تخلص التجنيد؟...

سعد: هاحاول بس الموضوع صعب إنت شايف الحياة والظروف متسمحش بأي حاجة... يدوب أطلع وأخلص وأشوف الشغل ودوامات الحياة...

ريمون: أنا لي ابن خالتي مسافر كندا.. بقاله أربع سنين بيقول هناك الشباب بياخد إعانة بطالة لحد ما يوصل لسن معين وبعدين يشوف الشغل وبعدين كل حاجة عاوزهها ممكن يطلبها ويحولها على البنك.

سعد: يابني إذا كان اللي شغالين نفسهم مش عارفين يأكلوا نفسهم ولا عيالهم وبعدين انت فاكتر إن عندنا حكومات ولا بنوك ... البنوك اتعملت علشان الحتيان الكبيرة... تاخذ الفلوس وتهرب بيها بره... لكن شوف نفسك انت لو فكرت... فكرت بس

تاخذ عشرة آلاف جنيه أو حتى خمسة... تجيب العيلة كلها
تمضي وتدفع وتتحبس في النهاية...

فؤاد: طيب والحل إيه؟...

سعد: لازم نتغير... لازم ... كل شيء في البلد سواء للحسن أو للسوء يتغير
وعموماً مفيش أسوأ من كده يبقى لازم نتغير للأحسن لكن
التغيير هو اللي هيعرفنا والتغيير بتعنا يكون ناتج عنا مش
حد يغيرنا ولازم يبقى عندنا ديمقراطية... إحنا مثلاً معندناش
اتنين رؤساء على الأرض لازم واحد يكون تحت الأرض...

فؤاد: إنت بتخليني أسرح يا سعد وبتفكرني بواحد صاحبي نفس
اهتماماته وأفكاره...

ريمون: ياعم أنا أخلص التجنيد واشوف نفسي على بره... أنا عارف مش
هقدر اعمل حاجه هنا...

فؤاد: هو ده الحل اللي بفكر فيه.

إبراهيم: ونسب البلد دي ملين؟... تخرب يعني؟

سعد: الهروب مش حل... لازم نشوف بلدنا ونعرف الحقيقة فيها فين..
بلدنا فيها خير بس مش لينا... لازم يوصل لينا... كلنا وكل
واحد على قد شغله مش على قد هبشه.

فؤاد: عندك حق... أبويا (الله يرحمه) كان دايماً يقول إحنا أغنى بلد...
بس الظروف وكمات الناس اللي مسكنها مش قلبهم على البلد
ولا بيخططولها كله بيفكر يملى كرشه وجيوبه..

ريمون: إنتوا بتعلموا... وعلى بال ما تخلصوا هروح آخذ دش.

إبراهيم: ياعم متغور في داهيه.

(ضاحكًا... ويستمر فؤاد وسعد في حوارات جانبية على سرير كل منهما حتى الفجر، وبعدها بقرابة الشهر يكون موعد تسليم التعبئة النهائية لكل منهما مع نهاية خدمة العلم..)

سعد: أوعى تنسى يا فؤاد معاك العنوان بتاعي ورقم التليفون وإبراهيم وريمون.

فؤاد: عيب إنت عارف صاحبك.

ريمون: وأنت برضه معاك التليفون والعنوان.

سعد: أوعى يا ريمون تنسانا لما تسافر وأوعى حد يقولك إن مصر وحشه أو آسيه على ولادها...

ريمون: عيب يا سعد... أنا مصري وعمري ما فرقت بين مسيحي ومسلم وعارف إن دانة المدفع ولأ الدبابة عمرها ما تفرق بين المصريين ده دينه إيه وده ملته إيه.. وهم اللي بيزرعوا الكلام الفاضي ده وعارف كمان إنهم عندهم مشاكل أكثر مننا.

فؤاد: إيه الكلام الكبير ده يا ولاد؟

ريمون: أنا عارف سعد بيقصد مجموعة الأقباط اللي سافروا بره وعاملين نفسهم أوصيا علينا.

سعد: تمام يا صاحبي..

إبراهيم: ده الموضوع بقى كبير.

فؤاد: طيب ما نعرف الموضوع.. حاسس إني كيس جوافه معاكم أنا وإبراهيم.

سعد: الموضوع ياسيدى.. ويسر سعد في الحديث..

(يضحك الجميع.. يتناول فؤاد معهم الطعام، وتمر الأيام سريعًا، وينهي كل من إسماعيل وفؤاد حياته في خدمة العلم، وتأدية واجبهما العسكري... وبعدها يذهب إلى منزل إسماعيل)

فؤاد: واحشني يابن البلغه (يحضنه).

إسماعيل: ياه... أيام التجنيد عدت خلاص... الحمد لله.

فؤاد: كل شيء بينتهي حتى العمر كمان... متقلقش... المهم... أخبارك

إيه?... والغدا إيه النهارده؟

إسماعيل: لا.. النهارده أمني عامله سمك...

فؤاد: الله يرضى عليك وعلى والديك.

أم إسماعيل: إزيك يا فؤاد يابني والله زمان... وعلاء أخباره إيه?...!

فؤاد: أنا بس هارتب أموري وعلى الأسبوع الجاي هنزله القاهره وأشوفه

واحشني بجد والله...

إسماعيل: وأنا كمان هاروح معاك..

أم إسماعيل: وانت يابني ناوي تعمل إيه?...!

فؤاد: أنا بفكر في كام حاجة كده... أعملها وبعدين أشوف.

أم إسماعيل: ما تفتح القهوة بتاعت أبوك يا بني وربنا يكرمك فيها.

إسماعيل: يا أمني فؤاد مش صغير واللي نفسه فيه هيعمله... ما تيجي

تكلي معنا...

أم إسماعيل: بالهنا والشفاف (تهم بالوقوف) أنا قصدي إن القهوة من

ريحت أبوه وبرضه يشوف نفسه.. مش زي الشباب اللي

بيسافر ولا يجيب قروض من البنوك ويتحبس في الأيام اللي ما

يعلم بيها إلا ربنا ديه..

فؤاد: ما تقلقيش اللي فيه الخير يعمله ربنا ... إدعي لنا بس وكله
يبقى تمام.

أم إسماعيل: دا عيلكم والله وربنا يهدي عليكم الخلق وملايكة الأرض
يابني.

إسماعيل: فين الشاي يا أمي؟...

أم إسماعيل: حاضر يابني على طول أهو.

فؤاد: على فكرة أمك بتتكلم صح... بس أنا صعب عليا موضوع القهوة
ده دلوقتي.. القهوة عاوزه توضيب وشغل وعده.. واديك
شايف إحنا طالعين يامولاي كما خلقتني.

إسماعيل: طيب ناوي تعمل إيه؟...

فؤاد: مش عارف والله...

إسماعيل: بص يا فؤاد.. أنا لو عارف إنك بتحب الكهريا كنت قتلتك
تعالى اشتغل معايا... بس انا عارفك بتقلق منها... (ضاحكًا)
بس فيه واحد صاحبي هو مش صاحبي أوي هو صاحب خالي
بيشتغل في الألمونيوم اسمه طاهر.. ده يا سيدي عامل فيه
قنصل الوز... هو معاه معهد فني صناعي... أو حاجه زي كده
بس إيه راسم نفسه مهندس (ضاحكًا).

فؤاد: لخلص ياعم...

أم إسماعيل: الشاي يا ولاد...

فؤاد: تسلم إيديكي.

أم إسماعيل: ربنا يخليكم وافرح بيكم.

فؤاد: أيوه يا عمنا... إنهي.

إسماعيل: أنا ليه دلال على طاهر ده... أفهمه الوضع ... وتنزل تشتغل معاه وتشوف الموضوع إيه... وهيعلمك النظام بتاعه.

فؤاد: خلاص... كلمه... بعد مايجي من القاهرة.

إسماعيل: أول بس ماأقابه...

فؤاد: ياه... للدرجة دي المهندس بتاعك ده مشغول?...

إسماعيل: مش للدرجة دي هو بس بيحب يترسم شويه... وعمومًا هتشوفه وتعامله وهتفهمه ماانت برضه دكتور.

فؤاد: أهم حاجه ما يترسمش علينا لحسن أضربه.

إسماعيل: عيب يا معلم وهو إحنا تلامذة؟

فؤاد: عمومًا اللي فيه الخير يعمله ربنا.

إسماعيل: يبقى خلاص توكلنا على الله...

فؤاد: أهم حاجه نروح لعلاء الأسبوع الجاي الواد وحشني قوي.

إسماعيل: ومين سمعك?... ماهو واحشني انا كمان والله... بقولك إيه أنا عندي شغل بعد بكره مايجي معايا تسليني وتضيع وقت شويه.

فؤاد: لا يا عم أنا بطلت أقرد خلاص...

إسماعيل: طيب بتعمل إيه طول النهار?...

فؤاد: أهو بنام طول النهار وأقعد أقرأ شوية الكتب اللي جايها معايا على شوية جرايد.. والحاجة ربنا يبارك فيها بتظبطني شوية.

إسماعيل: نروح مصر الأول وربنا يكرمنا لما نرجع إن شاء الله يكون ربك دبرها.

فؤاد: هاروح أنا أمشى شوية حاسس إني زهقان.
إسماعيل: طيب ما تيجي معايا هتنتفك على شغل جديد... تعالى نروح
سوا.

فؤاد: لا يا حبيبي... اتكل انت... سلام.
إسماعيل: براحتك. أنا كان نفسي امشى معاك.. بس انت عارف لازم اروح
الاتفاق يا صاحبي.. سلام.

(يمضي الأسبوع، ويذهب فؤاد وإسماعيل إلى علاء... يذهبان أولاً
إلى الشركة، وبعد ذلك يذهبان إلى منزله، أو بمعنى أدق غرفته التي فوق
السطح وينتظرانه هناك)

فؤاد: ياه... الولد علاء ده ولد مكافح شوف منظر الشركة اللي شغال
فيها وشوف منظر الحتة اللي ساكن فيها.
إسماعيل: مانت عارفه من صغره... بيحب يعتمد على نفسه... بس
أنا جعت ماتيجي ناكل في أي حنة الساعة داخله على عشرة
بالليل واحنا من الساعة سته مستنينه... (يظهر علاء...)
علاء: ياه ... يا ولاد القروود... وحشتوني وحشتوني... والله.
فؤاد: إنت هتعمل فيها وردة؟... (ضاحكاً وحاضناً).
إسماعيل: يلاهوى .. هو انا كنت عتقتة؟

(ويغني ثلاثهم أغنية: مالي طب وأنا مالي وأنا مالي من الآخر أنا مالي
بطريقة حميمة، ويذهب ثلاثتهم إلى مطعم للوجبات ويأكل ثلاثتهم..)

علاء: إيه يا سمعة... اظطبط ولأ لسه؟...

إسماعيل : ياعمنا مفيش حاجة تسد معايا إلا طبيخ أمي.

فؤاد: الحمد لله... نروح قهوة بقى نشرب شاي.. وشيشه.

علاء: أوامرکم... يا بهوات.

إسماعيل: الواد علاء أسلوبه اتغير ياولاد من ساعة ما اشتغل في شركة

السياحه.

فؤاد: اتغير إيه؟ علاء زي ماهو بس التعامل مع الناس النضيفة ياخشنى.

علاء: احنا عمرنا ما نتغير يمكن علشان كبرنا شويه وخبراتنا بقت أكبر.

إسماعيل: إيه الكلام الكبير ده ياعمنا؟ ... إنت اتغيرت رسمي.

علاء: دي الثقافة ياخفيف... طبعًا دي بعيده على ودنك.

فؤاد: (ضاحكًا)... مش مهلبية... المهم طمني عليك يا علاء...

علاء: أنا الحمد لله... ماشي... الشغل صحيح فيه عقبات بس انت

عارف ما حدش لاقى شغل... وبالنسبة للجامعة أنا مستني

نتيجة الترم السادس أو بمعنى تاني أخلص ثالثه... وبدور على

شقة تكون رخيصه وقريبه من الشغل...

فؤاد: يعني انت مش ناوي تغير نشاط السياحه ده؟...

علاء: بس... بصراحة البلد فيها إيه ماشي؟... أنا بشوف مصانع بتقف

وبيعملوا قوانين ماتحميش إلا الأغنياء والناس اللي معاها فلوس

إسماعيل: يعني السياحه دي فيها مكسب؟

علاء: المكسب ده بيجي من الاستقرار في الشغل... أهم شيء إنك تبقى

مستقر في الشغل بتاعك وبتخطط وتستننى وما تستعجلش

إسماعيل: هو علاء بيكلم مين؟...

فؤاد (ضاحكًا): ... إنت تشرب معسل وما تتكلمش... يعني انت

استقرت يا علاء؟

علاء: مش أوي برضه وأديني بتعلم ولو فيه فرصه أحسن إيه المانع إني

اتطور للأحسن؟

إسماعيل: يا أخي الواحد لما بيسمعك... بيحس إنه حيوان.

فؤاد: بيحس.. يابن إنت أساسًا جيت مع البني آدمين غلط ... تعرف

يا علاء كلامك دلوقتي بي فكرنا بواحد زميلي كان في الجيش اسمه

سعد ياريت لما ارجع أبقى أتصل بيه... وافتكرك.

إسماعيل: أنا عاوز أنا.. الساعة داخله على 4 صباحًا وانت عندك شغل

يا علاء بكره...

علاء: أنا عندي شغل الساعة 11 صباحًا... الحمد لله يعني ممكن

نسهر..

إسماعيل: لا ياعم لا سهر ولا غيره أنا هنام وأنت يافؤاد؟

فؤاد: يا أخي أنا مشفتش علاء من زمان وحشني... إتخمد أنت... تعرف

يا علاء أنا كنت بحسبك مرتاح في الشغلانة بتاعتك.. ويعني

علشان قريبك وكده.

علاء: الحمد لله.. ماشي الحال.. بس ليس كل ما يتمناه المرء يدركه..

لازم من التعب.. بص يا فؤاد ما حدش مرتاح في الشغل أي

شغل لازم يبقى في تعب وشقا والأصعب لو كان عندك طموح..

بس الحمد لله أنا بحب الحاجة اللي بشتغلها لإن صعب أوي

تنجح في حاجة اتفرضت عليك أو يعني مش طموحك ومش

بتاعتك... زي الدكتور... اللي يبقى في المستشفى وفي عياده..

اهتمامه بالمريض مختلف... لو هو عاوز يبقى دكتور أو أهله
عاوزينه يبقى دكتور.. أو الهندسة علشان رغبة العيله... بس
ده مش طموحه ولا هدفه... وارجع وأقولك إنت في مصر مش
بره يعني أي شغل مش هتبقى مرتاح فيه بس أنا شغال
الحمد لله وباقدر أكيف أموري علشان أنجز والدراسة حقيقي
تعبان... بس لازم أحقق حلمي.. إن شاء الله.

فؤاد: يعني انت دلوقتي ياباشا بقى فكرك رأسمالي... أمال يابني البلد
والفكر الاشتراكي والكلام بتاع زمان... وصور الناس اللي كنت
معلقها في الأوضه إشي صيني وإشي بوليفي.. وكوبي..

علاء: كل الكلام ده موجود جوايا متغيرش... بس من قعدتي مع الناس
دي عرفت إن رأس المال هو اللي بيحرك العالم دلوقتي آه
ناس محترمة وكل حاجة بس معاهم فلوس... مش لازم تبقى
غني وتدوس على الناس.. ممكن تبقى غني وانت برضه مع
الناس الغلابة وتحقق أحلامك وأحلامهم ودي اسمها الرأسمالية
الوطنية..

فؤاد: بس ياباشا الفلوس بتغير النفوس... ولا انت مش معايا؟
علاء (ضاحكًا): مش نفوسنا إحنا... إحنا للأسف إتربيننا صح على الحلال
والحرام والعيب والاحترام والخوف من ربنا... لكن تقدر تغير
ناس تانيه... وبعدين تعالي هنا إنت فاكتر الملايين دية بالسهل
يابني أنا كان معايا عميل إمبراح كويتي بدأ بـ 25 ألف دينار
بعد الحرب وزعلان أوي إن ثروته مكملتش 10 مليون وزعلان
خالص وناقم على صدام والعرب.. والحياه...

فؤاد: ابن اللي... يديني منهم مليون بس...

علاء: على فكرة الناس دول صعب أوي وبيخافوا من الموت مش عارف ليه وإحنا بنحس إنهم مش فاهمنا ولاهم بيحسوا إن إحنا بنشتغلهم... دي مشكلة عدم التواصل معنا مش إحنا بس... دي في العالم العربي كله مفيش تواصل بنا... وده اللي حاسيت في الشغلانة دية... إنت ممكن تتكلم مع واحد أمريكي أو أوروبي من غير ماتقلق منه... حتى لو كان حرامي في بلده لكن لو عربي (سعودي - إماراتي - جزائري - مغربي) يبقى خايف منك وانت مقلق منه مفيش ثقة بسهولة...

فؤاد: يمكن علشان التلفزيون بيعرض أفلام أجنبي وما بيعرضش ليهم حاجة في التلفزيون؟

علاء: والله عندك حق... يمكن علشان منعرفش عاداتهم ولا تقاليدهم ولا فكرهم ولا بنحاول نفهم لغتهم بقولك إيه.. عاوز انام بقى لحسن أنا خلاص الشمس طلعت وانا فيست.. خالص

فؤاد: طيب سلام بقى علشان بكره هانمشي...

علاء: ماتقعدوا يومين معايا ولأ حاجه...

فؤاد: لا علشان أرتب أموري هناك.... واشوف حالي ومحتالي..

علاء: خلاص ياعم براحتك بس انت ناويت على حاجه؟

فؤاد: لسه مش عارف... كذا حاجه في دماغي وماستقرتش على شيء معين..

علاء: ربنا يوفقك... تصبح على خير...

فؤاد: وانت من أهله...

(يرجع كل من إسماعيل وفؤاد إلى بلدتهما، وبعد أسبوع من تاريخ

العودة)

إسماعيل: إيه ياعمنا إنت فين؟... بقالي يومين مشفتكش.

فؤاد: سافرت عند أختي الكبيرة في المنصورة ووديت امي وقلت بالمرّة

أشوف هناك حاجه وفعلاً لقيت شغل بس السكن هناك

مشكله والأجره غاليه..

إسماعيل: ماقدتتش عند اختك ليه؟

فؤاد: إنت لطخ ياله؟... أقعد عند واحده معاها عيلها وجوزها وبعدين

مانت عارف ماحبش أكون ثقيل على حد حتى لو كانت

اختي وبعدين ظروفهم ماتسمحش بأي حاجه ده مش يوم

ولا اتنين ولا حتى أسبوع أو اتنين ده شغل يا صاحبي والشقه

هناك إيه نار...

إسماعيل: طيب عمومًا... أنا قلت لطاهر أول إمبراح وكان مستنيك إنت

قرارك إيه؟..

فؤاد: إظاهر مفيش حل غيره... آدي الله وآدي حكمته بس انت فهمته

على نظامي؟...

إسماعيل: عيب يافؤاد هو إحنا عيال؟... بس انت إديله برستيجه قدام

الناس.

فؤاد: دي سهله... بقولك إيه ماتيجي نتمشى شوية الجنيهه وحشاني..

إسماعيل: والله وانا كمان يلاً بينا..

(يذهبان للجنيهة، وبعدها يذهب فؤاد مع إسماعيل عند طاهر، ويقوم

بالعمل معه، ويذهب إسماعيل لفؤاد بالبيت)

فؤاد:.... بقولك سجايك أخبارها إيه؟..

إسماعيل: خد... إيه العملية معاك زفت ولا إيه؟... طيب خد خلي
الفلوس دي معاك.. مشي بيها أمورك.

فؤاد: تشرب شاي معاي؟... أنا هعلق على الشاي واخش استحمى
وأنت صبه على بال مااطلع.

إسماعيل: وأنت امك فين مش موجوده ولأ إيه؟

فؤاد: لا.. راحت عند أختي الثانية بقالها يومين بس صحتها مش عجباني
وبعدين انت غريب.. لخص ياعم وقوم ياله خف نفسك.

إسماعيل: إيه الشغل مع صاحبك عامل إيه؟

فؤاد: تمام ماشي الحال بس انت عارف أنا بالنسبه ليه شيلة لإني مش
صنايعي.... وانا برضه معاه مش لاقى نفسي بقولك إيه... ما
تيجي نقوم نتمشى شويه..

إسماعيل: لا ياعم أنا ميت من الجوع هاروح استحمى وأكل وأنام أنا
تعبت أوي النهارده ماتيجي تاكل معايا.

فؤاد: غور ياله... أنا لسه صاحي وقرفان... شكلي هعقد أقرأ شويه.

إسماعيل: ياعيني محسستي أنا قاعد مع هيكل... كنت ياخوي فلحت
في المدرسة إما قلي إيه موضوع الثقافة اللي نزل عليك ده مرة

واحدة؟... ده انت كنت مابتقراش الجرنال.

فؤاد: يعني لو قلتلك هتفهم ياخفيف؟... الموضوع بدأ معايا مع سعد
في الجيش كان يستنى الضباط يخلصوا الجرايد ويجبها كلها

أصله كان صحفي مش صحفي يعني زي الصحفيين الكبار...

بس كان بيكتب وشوية شوية بقيت أقرأ معاه وبقي يعرفني

على الحاجات اللي معرفهاش... وهو ده الفرق بين العادة
والمؤهلات وبعدين لاقيت معاه شوية قصص وكتب ابتديت
أقرا فيها حسيت إن الناس اللي بتكتب القصص دي... أكنهم
عايشين معنا وفامهين إحنا بنفكر في ايه وازاي.. ودلوقتي
بقيت أقرا علشان..

إسماعيل (مقاطعاً): ... لا. إنت بقيت بتقول شعر كمان؟

فؤاد: غور ياله روح كل...

إسماعيل: هافوت عليك... بكره عند المهندس (ضاحكاً)... سلام

فؤاد: إنت وهو... سلام.

(لم يخرج من المنزل وأخذ يقرأ... ويجمع الكتب الموجودة في المنزل
بطريقة منظمة... وأحس أنه لأول مرة بدأ يهتم بهذه الأشياء الموجودة في
المنزل، هذا الكنز الحقيقي، وفي اليوم التالي يذهب إلى ورشة طاهر)

فؤاد: إيه موضوع القطاعات بقى يا هندسه؟

طاهر: بص ياعم فؤاد أي شغل ليه المواد الخام بتاعته يعني النجار
يحتاج خشب علشان صنعتة والحداد يحتاج حديد... إحنا
بقى القطاعات دي بالنسبة لينا زي الخشب والحديد.. أي إنها
المادة الخام اللي بنشكل بيها شغلنا.. أبواب.. شبابيك.. مطابخ
وبعد كده إنت قلقان ليه ياعمنا؟... كلها شهرين تلاته وتبقى
تمام في الشغلانه دي... متعرفش ليه يا أخي قلبي انفتح ليك
على طول.

فؤاد: ربنا يعلم وأنا كمان...

طاهر: بص بقى ياسيدي... اركب معايا هاوريك المقاسات تتاخذ
وتحسب القطاعات إزي..

فؤاد: العربية عاوزه شوية شغل تعبت معاك أوي ياهندسه.

طاهر: الحمد لله إحنا كنا فين... تعرف أنا بدأت الشغلانه دي ازاي؟..
أنا بعدما خلصت التجنيد اشتغلت أكثر من عشرين شغلانه
إتمرمط ... جعت.. نمت على الرصيف وفي الآخر اشتغلت الشغلانه
دي أبويا ترزي على قد حاله ومفيش غير أختي الكبيرة وأنا
وأخويا والبت الصغيرة يادوب أبويا علمني وصلني لغاية ثانوى
وجوز البت وتعب بعد كده كان لازم اشق طريقي واشتغل
علشان اصرف على البيت وعلى تعليم اخواتي.. علشان كده
دخلت معهد وكان كل طموحي اطلع مهندس... بس مكنش
عندي حل تاني.

فؤاد: ربنا يخليك ليهم... مانت الكبير برضه ياهندسه.

طاهر: تعرف يا فؤاد أخويا عادل ده مكنش بيصرف مصروفه كان
بيحوش كل الفلوس اللي كان بيخدها وكان بيدهاني علشان
أصرف منها في التجنيد وكمان لما جيت فتحت الورشة بتاعتي
برضه مابخلش عليا باللي معاه مع انه عاوز يفتح ورشة
ميكانيكيا بعد ما يخلص هندسه علشان كده ناوي أظبطه إن
شاء الله... بقلك ايه يلاً علشان وصلنا.

(واستمر عمل فؤاد مع طاهر، وفهم بعض أساسيات العمل،

والقطاعات وتركيبها، وتمر الأيام)

طاهر: إيه ياعمنا إنت مش عاوز فلوس ولا إيه؟
فؤاد: إنت بصراحة مش مخليني عاوز حاجه يا هندسه تقريبًا بناكل
سوا وسجايرنا سوا... وأديني بتعلم والحمد لله ماشيه..
طاهر: إنت برضه بتشقى معايا.. ولازم يبقى ليك رصيد برضه إنت عاوز
تبني حياتك زيي.. ولا إيه؟... عمومًا خد الفلوس دي خليها
معاك يعني تحتاج حاجة ولا محتاجه إنت برضه الناس بتبص
إنك شغال مع الهندسه. (ضحكًا)
وعموماً النهارده هنخلص شغل بدري وبكره وبعده مافيش حاجه لو
عايز تاخدهم أجازة... مفيش مشكلة... فكنس يعني.
فؤاد: تمام... يبقى هاروح القاهرة أقعد يومين مع علاء وحشني قوي ده
أنا حتى بقالي يومين ما شفتش اسماعيل.
طاهر: خلاص... وأنا برضه هاعمل شوية شغل في العربية اليومين دول
وأكن في البيت.. عاوز اقعد مع اخواتي وأبويا وأمي شويه..
محدث يعرف الأيام مخيبه إيه..
فؤاد: خلاص اتفقنا هافوت أنا على إسماعيل ولو ماجتش اليومين
الجايين تعرف إني سافرت القاهرة عند صاحبنا.
طاهر: ما تاخذ تخلي معاك فلوس بالزيادة..
فؤاد: لا.. تمام كده الحمد لله... أشوف بس اسماعيل بالليل ونتفق.
يذهب فؤاد عند إسماعيل، ويتفقان على موعد للذهاب إلى علاء)
علاء: ياولاد... إيه المفاجأة دي واللله واحشني خالص... ياه بالحضن
ياكئيب منك له..
فؤاد: إيه ياعم الحلاوة دي؟

إسماعيل: ماهو لازم ياعم الي يقعد في القاهرة لازم يحلو... بياكل عيش
فينو... (ضاحكًا).

علاء: لا يا حبيب خالتو... بياكلوا جاتوه الأيام دي... (ضاحكًا).

فؤاد: طمنا عليك الأول...

علاء: لأ.. ناكل الأول وناكل الخفيف ده... وبعدين نتكلم يالآ بينا لحسن
أنا ميت من الجوع.

(يذهب الجميع إلى محل شهير بالحسين ويجواره مقهى)

فؤاد: إيه يا عم إنت بقيت مشهور هنا والناس ابتدت تعرفك هنا..
علاء: ما كتر البكاء.... وبعدين أنا داخل على أربع سنين هنا وتقريبًا
لفيت القاهرة من شرقها لغربها دي طبيعة شغلي... ماتنساش
أنا كل يوم مع سياح شكل.

فؤاد: أكيد لما تاخد الكلية هاتفرق معاك... وربنا يتوب عليك بقى
وتبقى في وظيفة محترمة.

علاء: مانت عارف البلد كلها متعلمين.. بس المشكلة في الشغل إذا لقيت
شغل... ولو لقيت يبقى المرتب تعبان.

إسماعيل: يعني إيه؟

علاء: بص يا خفيف يعني كل واحد بيشتغل دلوقتي متعلم بس المشكلة
مش في الوظيفة اللي بيشتغلها أو بمعنى أصح بيشتغل إيه ولو
لقيت حد يشتغل في تخصصه يبقى ما بيخدش حقه...

فؤاد: الله يفتح عليك.. ده إذا في النهاية لقي شغل... أساسًا وفي بلدنا دي
اللي عاوزينه يبقى طيار يبقى واللي عاوزينه يبقى مهندس
يبقى وهو حتى معهوش إعداديه.

إسماعيل (ضاحكًا): ما بلاش موضوع الهندسه ده أصله ياعلاء شغال مع
الباشمهندس طاهر... وهو برضه مهندس من منازلهم.. زي الأخ...
(الجميع ضاحكًا).

(يذهب الجميع إلى حجرة علاء وفي جو شبه شاعري... يتكلم الجميع

عن تحقيق خطواته المستقبلية)

فؤاد: وأنت بقى يا علاء... الأخبار إيه عندك؟

علاء: كل حاجه الحمد لله.. أنا أهم شيء عندي الكلية أخلصها وبعد كده أشوف هاعمل إيه.. بس أنا الحمد لله فتحت خط مع مدير العلاقات العامة في الشركة اللي فيها وناوي يدخلني في القسم بتاعه بمجرد ما اخلص والجيش طبعًا إنتوا عارفين أنا ولد وحيد ماليش جيش طبعًا.. بس خايف أمي تعملها من ورايا... (ضاحكًا).

فؤاد: أوعى...

إسماعيل: ما تجوزهاني يا علاء... وربنا أبقى عم حلو (ضاحكًا).

علاء: وانت بقى يا عمي أخبار أهلك إيه؟

إسماعيل: أنا خالي قدملي في الصحة يجي من سنه وأديني شغال كهربائي والحمد لله ماشي الحال... وفؤاد شغال مع الباشمهندس طاهر في الألومنيوم وماشى الحال... آدي أخبارنا سواء يا عم .. مافيش جديد في البلد مانت عارف لو الطوب اتحرك عندنا إحنا ما بنتحركش مفيش حركة في البلد.

علاء: على فكرة ده نتيجة الحياة السياسية بتاعتنا... تعرفوا لو فيه فعلاً حياة سياسية وانتخابات بحق وحقيقي الاهتمام بالنقابات والعمل والعمال الحقيقيين مش الاهتمام بالمستثمرين الأونطة وتسهيل الهروب ليهم...

فؤاد: آه ... يأخى موضوع الهروب ده كتر قوي... المهم مديرين البنوك يعملوا رجاله على بتاع الألف والالتنين... ده طاهر بيقولي من قبل ماروح اشتغل معاه وهو ماشى في إجراءات قرض بعشر

تلاف جنيه مطلعين عين الي خلفوه وإمضاءات وخلافه وروح
للأستاذ في البنك والأستاذ يتنى ويتفرد عليك على عشر بواكي.
إسماعيل: تعرفوا إني لو من الراجل الكبير (رئيس الجمهورية) أخلي
رجالة المخبرات والمباحث بتاعة بره تجيب الناس دي صاحبة
وأخيرهم ما بين عيالهم وحياتهم والفلوس الي نهبوها من
البلد.

فؤاد: شوف ياله إسماعيل... إظهار إن قعدتك معنا خلتك تفهم.

علاء: (ضاحكًا)... تصدق بالله والله والولد طلع بي فهم...

فؤاد: يالاً بقى علشان تعرف تنام إنت عندك شغل الصبح واحنا هنتكل
على الله بكره أنا وابن المعتوهه ده.

علاء: تصبحووا على خير... تصبح على خير يا إسماعيل... إسماعيل...
إسماعيل.

فؤاد: ده نام... (ضاحكًا)

علاء: تصبح على خير فؤاد.

(ويغادر الجميع القاهرة المعز في اليوم التالي، ويذهب علاء لإحضار سياح من مدينة الغردقة... ويبدأ فؤاد وللمرة الأولى في ترتيب أوراق حياته، ويدور هذا الحوار الداخلي بينه وبين نفسه: إيه يافؤش إنت موقفك إيه من الدنيا دي؟ وهتعمل إيه؟ تقريباً كل واحد شق طريقه ما عدا انت... إيه الحكاية؟... مش عاوز تتحل معاك ليه؟ إنت دايماً كده تبقى رد فعل.. مش فعل؟ لا. لا. لازم تعمل حاجه مش هاينفع أسلوبك كده... طيب هاتعمل إيه؟ أديك بتشتغل.. هتعمل إيه تاني؟ لازم تعمل حاجة ليك.. وأفاق على صوت إسماعيل: فؤاد.. فؤاد. إحنا وصلنا)

فؤاد : إنت هاتروح فين دلوقتي؟...

إسماعيل: هاروح أنام طبعاً... وأظبط شغل لليومين الجايين إن شاء الله..
وإنت؟

فؤاد: خلاص هاشوفك على بكرة بالليل علشان انا كمان أظبط شغلي مع طاهر واشوف إيه الحوارات معايا وعاوز أشوف أمي. حاسس إن أنا مقصر معاها أوي من بعد التجنيد ومش أنا لوحدني حاسس.. إحنا كلنا مقصرين معاها خالص ...

إسماعيل: إيه ياله الرقة اللي في أهلك دي؟ أوعى عملي فيها حساس...
مش هصدقك (ضاحكاً) أوعى تكون هتموت ياله.
فؤاد: لا بجد مش عارف ليه حاسس إن فعلاً مقصر معاها خالص.

إسماعيل: خلاص ياعم اللي تشوفه..... سلام

(يذهب كل من إسماعيل وفؤاد إلى منزلهما...)

أم فؤاد: إيه يا فؤاد؟... حمد الله على السلامة يا بني.

فؤاد (يدخل على أمه ويقبل يديها ووجهها): ... إزيك يا أمي عامله إيه؟

الأم: ياه يا فؤاد يابني بقالك زمان ماسألتنيش عامله إيه يا أمي وعامله إيه صحتي؟.. (يقبل فؤاد يدها مرة أخرى) أنا يابني الحمد لله... عايشه بس اخوك الكبير تعبني أوي... موضوع الجيش بتاعه وموضوع شغله ده مع الناس الي انت عارفهم مش مريح قلبي... ده حتى جواز مش عاوز يتجوز.

فؤاد: يا أمي محمد مش صغير ده خلاص عدى الثلاثين.

الأم: ما هو ده الي تاعب قلبي يابني ومش مخليني أدوق طعم النوم تعرف يا فؤاد يابني لو هو متجوز أعرف هو راح فين وجاي من منين ويبقى مسئول عن بيته وعياله وقبل ما يعمل أي حاجة يبقى خايف عليهم... مش انا الي خايفه عليه... وبعدين يابني أنا مش عاوزه منه حاجة أنا عاوزاه بس يشوف مصلحته... وأديك شايف زميله... الي هنا والي هنا والي اتجوز وخلف والي اشتغل والي سافر... إلا هو... مع الشلة الي مفيش منها رجا...

فؤاد: خلاص يا أمي أنا هاروح وأقعد معاه واشوفه.

الأم: بالراحة يابني معاه... ده الله يرحمه أبوك ولا أخوك جمعه ماكنوش بيخدوا معاه حق ولا باطل...

فؤاد: ماتخفيش ياأمي... ريحي انتي وأنا هارحله الصبح واعرف أخباره

إيه... أجييلك حاجة من بره؟

الأم: لا يا بني الحمد لله... أخوك جمعة جه وجاب عياله معاه وجابلي

طلباتي... وأختك هناء كانت هنا... الحمد لله... أعملك حاجة

تاكلها؟...

فؤاد: لا ياأمي الحمد لله... ارتاحي انتي.

الأم: تصبح على خير يا بني يا...

فؤاد: وانتي من أهله.

(أخذ يفكر فؤاد مع نفسه.. وينظر إلى حجرته في البيت المتهالك الكبير، وأشعل سيجارته وهو يقول لنفسه: إيه يا معلم الدنيا مالها كده حواليك بايظة؟... الكبير اللي المفروض ياخذ بإيد العيلة كلها مش لاقينه وعلى مزاجه وعلى كيفه... وجمعه شغال سواق ويدوبك بيكفي نفسه وبيته... والصغير آهو في المعهد بتاعه وعایش حياته وبيقضيها.. على فكره أحلى حاجه في الموضوع ده إن البنات اتجوزت... ياه... ده كان هيبقى همهم كبير أوي... الحمد لله صحيح البنتين الكبار بعاد... بس أحسن من الصغيره اللي أمك شايله همها مع راجلها اللي ولا هو هنا لا هو موظف.. ولا عاوز يشتغل مع إنه معاه سبع صنایع... المهم هاتعمل انت إيه بس؟... إيه الحوارات دي كلها؟ إيه الدنيا العجیبة دي؟.. ياه أول مرة أحس فعلاً إني يتيم بجد... عاوز أكلّم أبويا بجد.. عاوز خبراته ونصایحه.. يا يآبه كلامك اللي كنت بهرب منه وأنا صغير... محتاجه دلوقتي... ياريتني كنت عرفته واتعلمت منه... محتاجك... الله یرحمك... لم یدر بشيء حتى أيقظته أمه في الصباح لیذهب إلى عمله).

المهندس طاهر: إيه يا معلم الغیبة الطویلة دي؟... بالحضن يا راجل.
فؤاد: واحشني يا هندسه...

طاهر: إيه رأيك نشرب شاي... ولأ نفطر؟

فؤاد: لا.. فطرت الحمد لله.. الحاجة فطرتني..

طاهر (ینادي): ولا يا مصطفى... مصطفى یا.. مسمار2 شاي من القهوة..

قللي بقى عملت إيه في القاهره؟

فؤاد: أبداً رحنت شفت صاحبي وقضيت اليومين وخلص.

طاهر: بس كده؟... لا. بجد قول ما تكسفش دانا اما بروح القاهره لازم

أقضي يوم... يوم إنما إليه..

فؤاد: يا بختك يا هندسه..

طاهر: إحنا اتحرمننا كتير أوي في حياتنا وشفنا الويل... لما نقضي يوم كل شهر ولا كل ثلاث أسابيع مش حرام يعني نعوض شوية المر اللي شفناه واللي شايفينه... ماأديك شايف حتى الزباين هنا جايه تفتشنا والحكومة بتلعب على الجنيه اللي بنتعب ونشقى فيه ما تقليش في أي حكومة فيها كل أنواع الضرائب وخلافه غير في حكومتنا عارف ساعات وأنا جاي من على الطريق بتاع مصر ألقى 25 % ضريبة على الضريبة... أرجع وأقول إذا هي كانت في الأصل ضريبة... إزاي ياخذ ضريبه على الضريبه... وارجع وأقول لنفسى إنت في مصر يا هندسه..

فؤاد (ضاحكًا):... صحيح مانت في مصر يا هندسه.

طاهر: شوف بقى ياعم الأسبوع الجاي هاخذك مصر معايا وهاوريك مصر بجد..

فؤاد: خلاص يا هندسه... أوامرك الأسبوع الجاي بتاعك... نروح مصر بتاعتك..

طاهر: بس ما تقوليش هانروح لصاحبك..

فؤاد: أوكي يا باشا ...

طاهر: يالاً بقى قدامنا حنتين شغل نخلصهم ونشوف هانعمل إيه؟

(ويمضي الأسبوع سريعًا إلى نهايته، ويتم الاتفاق على موعد الذهاب

إلى القاهرة...)

طاهر: إيه... إنت خايف من العربيه ولا إيه؟... لا إنت مع الهندسه..

فؤاد: لا.. مش قوي يعني..

طاهر: بص في مثل حلو أوي بيقلك حمارتك العارجة تغنيك عن سؤال

اللئيم واديني متعكز عليها... نتأخر براحتنا... نيجي براحتنا...

وأنا حتى عاوز أعلمك السواقه.

فؤاد: أنا عمري ما حلمت إن يبقى عندي عربيه.

طاهر: بص بقى يا سيدي الفاضل... الراجل اللي علمني الشغل... قال

حاجه واحده بس... أن ماعرفتش تحلم إبقى موت أحسن

وكان في واحد قرئت ليه بيقولك ايه.. احلم بالمستحيل علشان

تحقق الممكن.

فؤاد: الله عليك يا هندسه... بس ازاي الموضوع ده يا هندسه؟

طاهر: بص ياعم أي مشروع زي اللي أنا فاتحه ده يكلف مش أقل من

عشرين خمسة وعشرين ألف جنيه.. بص أنا حلمت بيه قبل

ما يكون عندي ألف جنيه والعربيه كمان..

فؤاد: بس الحلم مش كفايه...

طاهر: الحلم ده أول طريق النجاح والحياه... وعلى فكرة مش أي حد

يقدر يحلم ويحقق أحلامه.

فؤاد: ساعات كلامك بيحسسنني إني مع صحابي... علاء وكان في واحد في

الجيش زيك كده برضه صحفي اسمه سعد بس إيه حته

سكره.

طاهر: ياه... صحفي؟... بص ياباشا إحنا كلنا في البلد دي أفكارنا زي

بعضها... مفيش جديد ويمكن من قبل كده مفيش حركة

تقدر تقول عليها مش متوقعه أو أفكار جديدة.. أفكار سوبر...
كلنا بنمشي زي العجلة لما تنزل من حته عاليه تنزل لوحدها
لغاية ماتقف...

فؤاد: إيه الحلاوه دي يا هندسه؟ ...

طاهر: يابنى أنا خبره في الحياه ما تقوليش إن معهد وكده ده أنا
المفروض آخذ دكتوراه بس الظروف... ياعم انت هتنكد علينا
ليه؟... ما تخيلنا نعيش اليوم الي احنا جيينه ده بقه..
فؤاد: حلاوتك يا هندسه... ما تاخذ سيجاره...

(يشعل فؤاد سيجارته وسيجارة لطاهر، وهو يفكر في كلامه
ويتأكد تمامًا أنه ليس بالشخصية الهلامية التي كان يعرفها أو
سمع بها، بل إنه أمام شخصية حقيقية تعرف أهدافها وطموحها،
وتريد تحقيقها وظل مستغربًا من كلام الناس عنه، وتعليقاتهم
على شخصيته، وأفاق على صوته وهو يقول: وصلنا بالسلامة).

فؤاد (يدخل إلى الكازينو...): ... إيه يا عم الحلاوه دي؟... لا لا بالصلاة
على النبي.

طاهر: يابني وهو انت لسه شفت حاجة؟ (يرد التحية على العاملين..)

فؤاد: إنت معروف بقى هنا يا هندسه.

طاهر: يابني.. أهم شيء التركيز... يا صحبي.

فؤاد: التركيز ده بمعنى إيه؟

طاهر (يطلب الطلبات من المتر في المكان): ... التركيز ده بقى ياعم فؤاد
عبارة عن اختيارك المكان والتركيز عليه... يعني أنا لقيت

كباريهات وصالات كثير بس مارتحتش غير هنا... أو بمعنى تاني
يعني... لقيت دماغي هنا... استقرت هنا.
فؤاد: آه... يعني أهم شيء الاستقرار وتركيزك على محل.
طاهر (وهنا تدخل عليه اثنتان من فتيات الليل): ... طبعًا ... يابني
مساء الفل... إزيك ياعبير؟ إزيك يامها؟
مها: ازيك يا هندسه وحشتني والله.
عبير: ايه يا هندسه الغيبه الطويله دي؟
طاهر: ايه يا جماعه ما انتو عارفين الشغل والظروف...
عبير: ربنا يدريك الصحه ياهندسه... مين الأخ؟
طاهر: ده... فؤاد... صاحبي ومعاي في الشغل.
مها: يعني نطمن؟...
طاهر: لا إنتي لازم تتطمني على الآخر (ضاحكًا)... وبعدين انتي إمتى
ماطمنتيش مع الهندسه؟...
عبير: ربنا ما يحرمنا منك يا هندسه... ما تيجي نروح مشتاقين ليك
كثير..
طاهر: طيب نشرب حاجه... ونقوم عيب حتى ندخل ونمشي على طول
كده ده حتى الناس ممكن تقول علينا إن احنا بخله.
عبير: طيب أوامرك ..

(في هذا التوقيت يدخل المتر بالطلبات التي طلبها طاهر ويشربها
ويقومون جميعًا إلى بيت عبير وأمها)

عبير: ايه فؤاد ده؟ صاحبك صاحبك ولا معرفه على الطاير؟

طاهر: أيوه يا شيخه ماتخفيش منه هو لو معرفه على الطاير هعرفه
عليكم برضه؟

عبير: لا أنا مش خايفه منه ولا حاجه أنا حاسه إنه دخل دماغ البت
مها.

طاهر: أنا مش بقولك هي الليلة من أولها... مش أمشي أحسن؟

عبير: ايه يا هندسه إنت زهقت مني ولأ إيه؟

طاهر: لا... لا والله مش قصد أصل إنتي سيباني وعماله تتكلمي على
مها وفؤاد إنتي عارفه ايه باجي هنا علشان أغير جو مش
عاوز نكد... عاوز أفرش...

عبير: ولا يهملك يبقى نفرش ياباشا.. إنت تؤمر.

(وتمر ساعات الليل سريعًا ويستيقظ كل من فؤاد وطاهر
في اليوم التالي، ويأخذ كل منهما حمامه، ويغادران قبيل أذان
الظهر مع وعد من مها وعبير أن يحضرا إليهما في الأسبوع القادم)

طاهر: نفطر بقى ونشيش في أي قهوه...

فؤاد: آه... لحسن أنا ميت من الجوع.

طاهر: أنت مكلتش امبارح وليه إيه ... إحنا أكلنا كتير.

فؤاد: والمجهود كان أكثر ياباشا... (ضاحكًا).

(في المقهى يتناولان إفطارهما ويشربان الشاي)

فؤاد: إحنا هنجي هنا تاني... يا هندسه؟

طاهر: طبعًا... كل الشوق ماخذنا وتبقى العملية مرتاحه إيه المانع

يعني؟.. بس من غير تسيح.

فؤاد: فاهمك يا هندسه... حتى لو ما فهمتكش... هحاول افهمك بس

مها حلوه يا هندسه... ملين.

طاهر: طيب نقوم بقى ياعم الحلو... (ضاحًا).

(..تمر الأيام والأسابيع وينقضي أكثر من ثمانية أشهر زار فؤاد خلالها

علاء ثلاث مرات مع صديقه إسماعيل وكذلك كانت هناك زيارات

شبه شهرية الى منزل عبير ومها مرة واحدة كل شهر تقريبًا ولكن...)

فؤاد: إيه يا هندسه مالك مش عاجبني من امبارح... فيه إيه؟

طاهر: عادل أخويا..

فؤاد: ماله... عادل عمل مشكلة ولأ إيه؟

طاهر: الأسبوع اللي فات كان تعبان خدته عند الدكتور.

فؤاد: آه... لما اتأخرت وسألتك... افكرت... المهم الدكتور قال إيه؟

طاهر: الدكتور طلب تحاليل...

فؤاد: وعملتها ولأ لسه؟

طاهر: عملتها ووديتها للدكتور.

فؤاد: خير والدكتور قالك إيه؟

طاهر: بص في التحاليل وقاللي إنه شاكك إن عنده ورم.

فؤاد (مندهشًا): يا أخي إنت عارف الدكاتره بتوعنا... وبعدين بيقولك
شاكك تروح لدكتور تاني يا أخي ده عادل لسه صغير... أعود
بالله.

طاهر: أنا مسكتش رحى لتلات دكاتره وكلهم شكروا لي في الدكتور اللي
بنروحله وقالوا ده أستاذ في تخصصه ولازم عملية علشان يعرف
إنه سرطان حميد ولا...

فؤاد: لا قدر الله... خلاص إنت لازم تقول لعادل.

طاهر: أقوله إزاي بس؟ ده مبيحبش الدواء ويبخاف من الحقن أقوله
إنت عندك ورم؟ عاوزين يفتحوا دماغك ويشفوا إذا كان الورم
ده خبيث ولّا حميد... (يخبط يده بيده الأخرى).

فؤاد: لا إله إلا الله... والعمل... ناوي على إيه؟

طاهر: العمل عمل ربنا... أنا مخنوق وقرفان... هاروح أنا.

فؤاد: هتروح وانت كده؟... تعالى نتمشى وتهدى بس شويه.

(يركب الاثنان السيارة صامتين حتى الوصول إلى مقهى بعيد من

المدينة ويبدو في حالة سكون مع ظلام الليل)

القهوجي: إزيك يا هندسه إيه الغيبه الطويله دي؟ وحشتنا قعدتك.

طاهر: إزيك يا عم محمد... عامل إيه.. وأولادك عاملين إيه؟

القهوجي: الحمد لله... ماشيه وربنا ساترها معنا والحمد لله.

طاهر: الحمد لله...

القهوجي: أجبلك الشيشة بتاعتك؟

طاهر: آه يا ريت ياعم محمد... وهات لفؤاد كمان شيشه واعملنا اتنين قهوه .

القهوجي: حاضر... منورنا يا هندسه.

فؤاد: ماتصلي على النبي بقى يا هندسه.

طاهر: عليه الصلاة والسلام... أنا خايف على عادل أوي... تعرف انا كنت بفكر في توضيب العربية واتوسع في الشغل ومشي أمورنا ... دلوقتي عادل وعملته أهم منأ حاجه المشكله التوقيت صعب أوي الوقت.. بس الضوفر الي بيظيره عادل عندي بفلوس الدنيا...

القهوجي : الشيشة يا هندسه.

طاهر : إعملنا القهوه والنبي يا عم محمد...

فؤاد : إنت برضه بتفكر إنك توديه مستشفى على حسابك ماتوديه مستشفيات حكوميه... ده آخذ عينيه أكيد عملية بسيطه.

طاهر: مستشفيات حكومة إيه بس؟... لازم الدكتور الي بيتابع عنده وأحجزله في مستشفى خاص ديه دماغه يا فؤاد... وبعدين أنا مش خايف أو قلقان على المصاريف... مش مهم... أنا أرجع اشتغل شيال من تاني.. أبيع لحمي.. أنا قلقان إن عادل مايرجعش زي الأول عادل بتاع زمان دي العمليه في المخ.

فؤاد: يعني إيه الكلام ده؟

طاهر: هو ده الي قالهولي الدكتور... العمليه الي هتعمل هتعمل في جزء حساس من دماغه أي لمسة غلط أو أي نسبة خطأ مش كويسه عليه.. المشكله إن الورم نفسه بيضغط عليه وممكن

يشل حركته في أي لحظة... وصعب يرجع زي الأول... (تدمع عيناه).

القهوجي: اشرب القهوه يا هندسه... مالك يا هندسه؟... إنت مش عاجبني يا بنى النهارده...

طاهر: لا أبدًا مفيش حاجه... إدعلنا إنت يا عم محمد..

فؤاد (شاردًا): ... لا إله إلا الله... طيب إنت ناوي تعمل ايه؟

طاهر: مش عارف أفتح الموضوع معاه ازاي... والدكتور بيقول كل ساعة تأخير فيها خطر على حياته مش عارف... مش عارف.

فؤاد: بقولك إيه.. إحنا نوديه عند الدكتور بكره... ونقعد سوا ونشوف معاه الوضع إيه.

طاهر: إنت هتيجي معايا؟

فؤاد: أكيد يا هندسه... ده عادل زي أخويا.

(ينهي اللقاء ويذهب فؤاد إلى بيته ويجد أمه... ويقبل يديها ويدخل

حجرته يغير ملابسه ويعود إلى أمه)

فؤاد: إيه يا حاجة مالك ألف سلامة عليكي.

الأم: فؤاد يا بنى أنا حاسة إن العمر خلاص... عاوزه أشوف أختك الكبيره وأقعد معها شويه..

فؤاد: إيه يا أمي الكلام ده إنتي ست مؤمنة وبتصلي ... ربنا يدريك طولة العمر..

الأم (ضاحكة بهدوء): يا بنى أنا الحمد لله .. مش خايفة من الموت أنا

خايفة عليكم أنتم مش حاسة أنكم في أمان..

فؤاد: ماتخفيش علينا.. أهم حاجة صحتك. (يحاول أن يخرجها من الموضوع) أمال أخويا سعيد فين؟ بقالي فترة مش شايفه. الأم: ده برضه من الحاجات اللي تعبانى... سعيد أخوك ومحمد وجوز اختك.

فؤاد: يأمي ممكن تفكري في نفسك وملكيش دعوة بحد؟... إنتي ربتهم وكل واحد شق طريقه وحتى اللي اتجوزت شايله همها؟...

الأم: يابني أنا هفضل أخاف عليكم لغاية ماموت...

فؤاد: بعد الشر عليكي... بقولك إيه.. إيه رأيك أجبلك كباب النهارده هاجيبه وناكل سوا... أوعي تنامي..

الأم: يابني أنى مش عاوزة حاجة... أنا عاوزك تقعد معايا..

فؤاد: لا... لا... أنا هاروح أجيب وأجي على طول.

(يذهب فؤاد لإحضار الكباب لأمه وهو في طريقه يحاور نفسه إيه موضوع الموت اللي حاضر حوليك الأيام دي؟ أمك توقلق إنها هتموت... وعادل أخو طاهر وحتى أنت مابقتش تشوف إسماعيل ولا علاء زي الأول... وحاسس إنك بعيد عنهم بس أمك. يصل إلى محل الكبابجي يطلب طلبات ويظل يفكر.. أمك قلبها طيب أوي وإحساسها عالي إنت عارف لما بتحس بحاجة... إيه يا فؤاد؟ يخرب بيتك لا بعد الشر أمي لا لا... إيه القلق اللي انت فيه؟ إنت لازم تبقى جنبها الفتره دي.. لازم. ويعود إلى البيت مع ما طلب من محل الكباب).

فؤاد: بصي بقى يا حاجة أكله إيه... ملهاش حل.

الأم: ربنا يخليك يا بني وما يحرمني منك ولا من اخواتك.
فؤاد: ولا منك يا حاجة.

الأم: بص أنا يافؤاد يا بني عوزاك تخلي بالك من اخواتك... إنت عارف اخواتك كل واحد فيهم شارد في مواله جمعه... الله يعينه آه بيجري على بيته وعياله والبت الكبيره أهو مرتاحة مع ابن عمها. أنا خوفا يا بني على أخوك محمد الكبير مش عارفه مش لاقى نفسه ولا حياته ضايع كده... وتايه وسعيد أهو كل يوم في حال.. شويه كده وشويه كده مش عاجبه حالنا ولا ظروفنا وحياتنا... وطالع فيها وفاكر إن العمده خاله.. واختك الصغيرة جوزها دماغه مش مريحاه... أهو في أيده سبع صنایع... بس المشكله في مخه تابعه وتاعب اختك وتاعبنا معاه...

فؤاد (يشرد... وبعد ذلك يفیق على نهاية كلام والدته): يا أمه إنتي شوفي نفسك انتي وخلي بالك من صحتك دي أهم حاجه وأي حاجه بعد كده سهله هتدبر إن شاء الله... أنا من بكره الصبح بإذن الله... هشوف محمد وهقعد مع سعيد وهروح أشوف جمعه أحواله إيه واطمن على البت الصغيرة وهسافر للكبيرة متقلقيش انتي بس.

الأم: ربنا يوسع عليك يا بني وما يحطك في ضيقة ويهدي عليك الرب وملائكة الأرض يا بني...

فؤاد: (يقبل يدها)... إنتي بس تأمري يا حاجة.

الأم: يا بني أنا عاوزه أروح أشوف اختك الكبيرة أنا صحتي الأيام دي كويسه معرفش الأيام الجايه فيها إيه...

فؤاد: يا أمي خلاص بقى. حددي وأنا أوديكي ولا يهملك وهشوف هناء

علشان تروح معاكي وتقعدي يومين هناك..

الأم: مابلاش هناء يابني لحسن جوزها يتخانق معها.

فؤاد: متخافيش أنا هروح واشوف جوزها وأشوفها بالمره واطمن عليها

وعلى عيلها.

الأم: (تسمع قرآن الفجر)... هقوم انا أتوضى واصلني...

فؤاد: (يقبل يدها)... إدعيلنا انتي بس يا حابه..

الأم: ربنا يقدرك يابني ويهديك ويهديكم.. ويحب فيكم خلقه..

(تذهب الأم إلى الصلاة، وتترك فؤاد ليذهب إلى حجرته ويدخن سيجارته: إيه الحوارات اللي حاصله معاك دي؟... أمك مش مطمئناك عليها ولا على اختك الصغيرة وقلقانه عليها وعلى الكبير حتى اللي شغال ومتجاوز قلقانه عليه والصغير... وأنت... وعادل أخو طاهر والبيت... إيه الأفلام والحوارات دي كلها؟ هتعمل إيه ولأ إيه؟ إنت حتى ممعكش فلوس تصرف على البيت في الأيام اللي جايه وأخو طاهر هيعمل عمليه ولا اتنين، وهيبقى محرج منك... ولازم تشيله في زنقته ما هو ياما شالك برضه... آه يابا... ياه... ياه يابويا محتاج ليك أوي واللله... محتاج أقعد معاك أكلمك كنت بتحل وعلى الأقل مش بتشيلني الهم اللي أنا شايله دلوقتي أعمل إيه بس وأروح فين وأجاي منين؟... أنا بعد ما أخلص أروح أقعد يومين عند علاء في مصر أغير جو شويه وأخد الواد إسماعيل معايا... ياه واللله العيال دول وحشوني أوي... يفيق على صوت والدته توقظه من أجل إسماعيل مع أذان الظهر).

إسماعيل: وله فؤاد... فؤاد... إصحى ياله يافؤاد..

فؤاد: إسماعيل... تصدق واللله كنت في بالي..

إسماعيل: لا يا شيخ بتسأل أوي ياخويا. إنت من ساعة مااشتغلت مع

طاهر بيه ولا حد عارف يكلم أهللك..

فؤاد: واللله إنت وعلاء إمبراح ماسبتوني وعاوزين نروح لعلاء..

إسماعيل: لا ياشيخ... على فكرة زعلان منه أوي... لأنه من ساعة مانجح

ومسك الوظيفة الجديدة بتاعته في الشركة ولا حد فينا راح

عنده... وكلمني أكثر من مره وزعلان خالص...

فؤاد: خلاص نروحله... شوف انت جاهز إمتي..

إسماعيل: أنا لازم أروح خلال الأسبوع ده علشان أعمل فيش سريع
مستجعل يعني.. وأخلص شوية أوراق طلبها من خالي علشان
الوظيفة ...

فؤاد: إيه خلاص ياله هتبقى موظف؟

إسماعيل: وحياتك بعدها بشهر هكون متجوز..

فؤاد (ضحكًا): ... ألف مبروك يامعلم..

إسماعيل: مبروك علينا كلنا... المهم هنروح إمتى؟...

فؤاد: أنا خلال يومين هقولك... وعمومًا خليها الخميس يكون أحسن
نقعد هناك ونيجي السبت الصبح...

إسماعيل: أنا مش هعرف احدد دلوقتي حسب ماخالي يخلص الورق...
علشان لو احتجت حاجه ممكن اقعد للسبت.. خالي قالي
الفرصة دي مش هتكرر ولا عشر سنين.. أو مش هتكرر تاني
خالص... يعنى لو ما أنجزتش يبقى شكرًا.. وانت شايف البلد
عامله إزاي...

فؤاد: خالك عنده حق... خلاص شوف ونبقى نروح سوا... إنت عارف إن
امي شايله الهم لوحدها وأنا خايف عليها أوي الأيام دي.. مش
عارف قلقان وهي مش مريحاني حاسس إنها عارفة حاجه
ومش عاوزه تقولها لي..

إسماعيل: هتقولك على إيه؟... إيه الكلام اللي بتقوله ده؟ والله انا
مافاهم منك حاجه..

فؤاد: متاخذش في بالك.....

إسماعيل: خلاص اتفقنا... أوكى... سلام.

فؤاد: يا بني اقعد معايا نفطر سوا..

إسماعيل: لا يا عم انت عاوز امك تضربني؟... سلام.

الأم: أحضرك يا فؤاد الفطار؟

فؤاد: لا يأمي عاوز كباية شاي بس مش عاوز أكثر من كده..

الأم: يا بني أفطرك...

فؤاد: والنبى يأمى ماتتعبى نفسك... أنا هاخذ دش واخرج على طول...

الأم: ربنا يريح قلبك يا بني...

(يشرب فؤاد الشاي، ويخرج مغادرًا إلى الورشة عند طاهر، ويقابله...

ويكلمه)

فؤاد: إيه أخبارك يا هندسه؟ ...

طاهر: مفيش جديد.. الدكتور طلب مننا نروح عنده الأسبوع الجاي

وبعدها هيحدد معاد للعملية..

فؤاد: إن شاء الله خير يا هندسه...

طاهر: إن شاء الله... قولي الفترة الجاية أحوالك إيه؟...

فؤاد: مفيش أنا بس لازم أخلص شوية مواضيع كده وأروح أشوف علاء

في مصر لحسن زعلان مني أوي..

طاهر: طيب خلاص رتب أمورك على الأسبوع الجاي علشان تكون في

الورشة باستمرار مع الواد مسمار أنا طبعًا هكون مع عادل...

فؤاد: ما تشلش هم يا هندسه إن شاء الله خير...

طاهر: هقوم أنا اشوف أبويا وأمي واطمن عليهم وأقضي شوية مصالح

كده...

فؤاد: براحتك يا هندسه أنا زي ما قلتلك هخلص حتتين الشغل دول

وأروح برضه أقضي مصالحي..

طاهر: خللي بالك من الواد مصطفى مسمار.. الواد ده جدد ويتيم
وبيحبني مع إني بطلع أيمان اللي خلفوه..
(ضاحكاً).

فؤاد: مسمار ده زي أخويا يا هندسه (ضاحكاً) إتكل على الله يا هندسه
وماتقلقش..

(يبدأ فؤاد في إنجاز بعض الأعمال في الورشة، وبعد الانتهاء
يذهب إلى إخوته، إلى أخته... وجمعة... ومحمد، ويهم بعد
الانتهاء من العمل بالذهاب إليهم ويذهب إلى بيت أخته هناء)

هناء: إزيك يا فؤاد وحشتني ياخويا عامل إيه وأمك عامله إيه؟ (بنبرة
عالية)

فؤاد: إهدي بس إحنا كلنا بخير وأمك بخير..
هناء: تاكل ولا اعملك شاي؟...

فؤاد: لا هاكل ولا تعلمي شاي... أنا جاي أطمئن عليكي وعلى عيالك..
هناء: أنا الحمد لله... بخير والعيال بخير..

فؤاد: وغريب عامل معاكي إيه؟

هناء: إنت عارف طبعه.. عصبي شوية بس يرجع أصفى من اللبن
الحليب...

فؤاد: يعني الأمور ماشية... الحمد لله؟
هناء: الحمد لله..

فؤاد: بصي بقى أنا هروح أنا وامك وانتي عندك أختك الكبيرة وأمك
قاللتي أنا عاوزه هناء معايا. رتبي أمورك مع جوزك على
أساس إنك هتغيبى مع العيال ثلاث أربع تيام بالكثير...
هناء: بس..

فؤاد: (مقاطعًا)... شوفي الوضع إيه وأبقى ارجع عليكي تاني (يطرق
الباب وهم جالسون، وتقوم هناء لفتح الباب لزوجها غريب)
غريب: أهلين ومرحبتين... ياعم فؤاد... فينك يا أخي واحشني؟..
فؤاد: وانت كمان واحشاني أخبارك إيه... وأحوالك؟

غريب: مفيش جديد من ساعة ماسيت الحاج سعد وأنا بشتغل
لوحدي مصلحة كده.. وأديها ماشيه..
فؤاد: طيب أنا هسيبك هناء هتقولك موضوع كده وهقوم أقضي شوية
مشاوير ضروري...

غريب: خير..
فؤاد: خير إن شاء الله... هناء هتقولك... سلام..
غريب: طيب أقعد اتغدى ولا اتعشى معايا...
فؤاد: دايماً عامر بيبك يا أبو أمجد... سلام..

غريب: سلام ورحمة الله... خير ياست هناء؟
هناء: مفيش.. كان جاي علشان امي تعبانة شوية... وعاوزه تروح لاختي
في مصر وكانت عاوزاني أروح معاها.
غريب: وماله... ياستي تروحي مع أمك..
هناء: بجد ياخويا؟..

غريب: أيوه يا ستي الأصول ما تزعلش وبعدين فؤاد محترم وماقدرش

ازعله... لكن لو كانت بعنت حد تاني.. عليا الطلاق ماكنتي
رايحة..

هنا: ربنا يخليك يا ابو أمجد وما يحرمني منك يا اخويا.. يارب.
غريب: خدي الفلوس دي خليها معاكي علشان تروحي بيها انتي هتروحي
إمتي؟...

هنا: لما ارتب معاهم بس مش قبل الخميس إن شاء الله...
غريب: على البركة... وأنا هسافر الغردقة ويمكن اقعد هناك أسبوع ولا
اتنين.. أشوف مصلحة هناك كده وأجي...
هنا: تيجي بالسلامة ياخويا... أحضرك لقمة تاكلها؟
غريب: لا ... لا ... بلاش في موضوع كده عاوز أقولهلوك (ضاحكاً)...
(ويذهبان سويا إلى غرفة النوم البسيطة... ويغلقان الباب
عليهما).

(يذهب فؤاد إلى بيت أخيه جمعة تستقبله زوجته)

فؤاد: سلام عليكم.
زوجة الأخ: وعليكم السلام... إزيك يا فؤاد وأخبارك إيه وأخبار الحاجة
إيه؟
فؤاد: الحمد لله كلنا بخير أنا جاي علشان اشوف جمعة هو مجاش
لحد دلوقتي؟...
زوجة الأخ: ما انت عارف شغله ملهوش مواعيد..

(يلتفت إلى أبناء جمعة، ويخرج لهم أموالاً لشراء بعض الأشياء لهم،

مع ترحيب زوجة الأخ)

فؤاد: ربنا يجيبه بالسلامة.. (يهم بالذهاب).

زوجة الأخ: أقعد أعملك شاي ولا أجهلك العشا.

فؤاد: لا ربنا يخليكي بس أبقى قولي لجمعة إني عدت عليه وعايزه

ضروري..

زوجة الأخ: حاضر ياخويا... مش خير إن شاء الله؟

فؤاد: خير... مفيش حاجة هو واحشني بس وواحش أمه..

زوجة الأخ: حاضر ياخويا... طيب اقعد شوية..

فؤاد: لا علشان عندي شوية مشواير كده... سلام.

زوجة الأخ: مع السلامة... سلملي على الحاجة.

(يترك فؤاد بيت أخيه، وينظر في ساعته... لم تتجاوز الحادية عشرة، وهو يعلم جيداً أنه لن يجد أخاه محمداً في هذا التوقيت، ويجب عليه أن ينتظره... ويشعل سيجارته، ويذهب إلى المكان المفضل لجلسته مع أصدقائه في الماضي... لا يعرف لماذا، ولكن يشعر أن قدماه تدفعه إلى هناك.. حديقتهم المفضلة بربوتها العالية).

إيه يا معلم مالك؟.. الدنيا من حواليك عاملة إيه وإيه الحكاية وانت فين بالظبط من الدنيا وعملت إيه؟... أديك داخل على اربعة وعشرين سنة ومعملتش حاجة... أي حاجة يدوب بتأكل وبتشرب... الحمد لله... أنا أحسن من ناس كتير في الأيام الغبره دي... بس انت ما عملتش حاجة... وهو وأنت عاوز تعمل إيه يعنى؟.. على الأقل علاء شاف نفسه في الوظيفة وخلص الكلية... والواد إسماعيل آهو خاله جابله شغلانه في الصحة... إنت هتغير منهم ولا إيه؟... لا لا... الحكاية إني بشوف الأحوال عمومًا بتاعة زمايلي مش بقصد إني أغير منهم وبعدين أنا لسه شغال مع طاهر في موضوع الألومنيوم دانا حتى لسه مش عارف فيه أوي.. وشوف الورشة بتكلف كام إذا كان طاهر اللي بقاله يجي عشر سنين بيقولك كل يوم في حاجة جديدة في الصنعة... إنت بقى هتعمل إيه والقهوة بتاعة أبوك؟... مقفولة ومحدش عامل فيها أي مصلحة.. أبويا... ياه... الله يرحمك يابا... الفاتحة على روحه... ينظر في ساعته تقترب من الواحدة والنصف... لازم اقوم أروح أشوف محمد).

فؤاد : إزيك يا محمد؟...

محمد: إزيك.. خير أمك كويسة في حاجة ولأ إيه؟
فؤاد: أهذا بس.. إنت سخن ليه كده إنت بتسأل يعني؟ (محاولاً
الضحك) طيب قولي أفضّل.. ولأ أمشي؟
محمد: لا تعالى ياخويا...

فؤاد: إيه يا عم أمك بقالها يجي أكثر من شهر ما شفتكش... وبعدين؟
محمد: (يخرج سيجارة يبدأ يلفها بقطع الحشيش) يا عم فؤاد... أنا
وامك مننفعش مع بعض يبقى أنا في حالي وهي في حالها...
ما انت شفت آخر مره فرجت عليا أمت لا إله الله إلا الله..
فؤاد: ما أنت جايب واحده تنام معاها في البيت وأبوك كان ميت
ماكملش شهرين يعنى ينفع؟

محمد: يا عم دي فضحتني... أنا و...ال
فؤاد: إنت برضه الكبير يا محمد وامك عارفة كده وإحنا ما نقدرش
نستغنى عنك يا أخي وبعدين ما حنا كلنا بنغلط وبعدين إنت
اللي حبكتها... هي قلتلك امشي يعني؟...

محمد: (يعطي السيجارة لفؤاد) . لا والله.. وانت كنت عاوزني اقعد تاني
في الحته؟...

فؤاد: يا عم محمد عفا الله عما سلف وبعدين أنا حاسس إن امك الأيام
دي صحتها مش أوي دي حتى طلبت منى تروح تزور أختك
الكبيرة وتاخذ هناء معاها وتشوفك انت وجمعة... والحكاية
دي مش مريحاني.

محمد: بجد ولأ انت بتقول الكلام ده علشان أروح اشوفها؟
فؤاد: ثلاثة بالله العظيم باكلم بجد...

محمد: (متأثراً)... إوعى تكون مقصر معاها ف حاجة... أو نفسها ف حاجة (ويضع يده في جيبه مخرجاً بعض الأموال) خد خلي الفلوس دي معاك..

فؤاد: خلي الفلوس معاك ولأ اقولك إديهلها انت هي مسافرة على الأسبوع الجاي بعد ماكون رتبت مع هناء أختك... وياريت ترجع البيت تاني..

محمد: خلاص بكره هاجي اقعد معاكم وأقعد زي الأول ياغم وخد اعمل حسابك ف عزومة محترمة...
فؤاد: ماشي ياغم الي تشوفه يا كبير... سلام بقى لحسن الوقت يادوبك... وعلشان الحق أجهز الحاجة والغدا..
محمد: سلام ...

(يترك فؤاد غرفة محمد المستأجرة وينظر إليها من بعيد، ويفكر.. حياة محمد هتفضل كده حشيش ومخدرات... ونسوان؟.. ولأ ياترى هيتغير؟ ياه...الفرق بين محمد وطاهر كبير أوي واحد بيعمل كل حاجة بس الظروف تقف ضده وواحد ولا في دماغه حاجة ومقضيها ... وينظر فجأة ليجد نفسه أمام بيتهم القديم الواسع ذي السقف الصاجي الذي يحنو إليه كثيراً... يفتح الباب بهدوء ليدخل مع قرآن الفجر ليجد والدته مستيقظة...)

فؤاد: إيه يا حاجة... أنت صاحيه لغاية دلوقتي؟

الأم: يابني أنا الأيام دي مبيجليش نوم خالص..

فؤاد: إيه يا حاجة انتي تعبانة?... أوديكي عند الدكتور بكره؟

الأم: لا يابني أنا قلقانة مش تعبانة..

فؤاد: يا حاجة متقلقيش بقى.. على فكرة ... هناعا جاية بكرة عشان
تظمنك وتجهز معاى حاجات السفر ومحمد هيتغدى معانا

بكرة أي خدمة ياستي..

الأم: بجد يا فؤاد أخوك محمد جاي بكرة؟

فؤاد: من إمتى يا أمي وانا بكذب عليكي؟

الأم: لا يا بني أنا عارفة بس اخوك.. كان زعلان مني قوي..

فؤاد: ما انتي يا أمي فضحتيه في الحتة هو والسنت اللي كانت معاه
عمومًا إحنا نسينا الموضوع ده... المهم خدي (ويخرج الفلوس

من جيبه) هاتيلوه بقى غدوة حلوه بكرة..

الأم: ربنا ما يحرمنا منك يا بني..

فؤاد: على فكرة محمد دافع معايا في الفلوس دي..

الأم: ربنا ما يحرمنا منكم كلكم ولا دخلتكم عليا ويهديكم على بعضكم
وما يفرقوكم أبدًا ويبعد عنكم ولاد الحرام.

فؤاد: (يقبل يدها) ولا منك يا حاجة...

الأم: (تسمع نداء الفجر)... هقوم أصلي يا بني ... ربنا يهديكم ويبارك
فيكم..

فؤاد: ادعي لينا انتي بس يا حاجة..

(يدخل فؤاد إلى غرفته، ويستلقي على سريره، لا يشعر إلا عندما

تدخل عليه أخته هناعا توقظه)

هناعا: صباح الخير ... ده الضهر أذن يجي من ساعتين.

فؤاد: ياه ... أنا نمت كثير أوي...

هناء: الحمام جاهز والغدا كمان جاهز وسعيد أخوك جوه...

فؤاد: إنتي جبتي عيالك معاكي؟...

هناء: أيوه يا أخويا ما هو غريب مسافر اليومين دول الغردقة ... وقال

سافري انتي مع امك...

فؤاد: طب... الحمد لله..

هناء: والله هو ابن حلال بس عصبي حبتين يا أخويا..

فؤاد (ضاحكًا): ابن حلال مش ابن حلال. إحنا مش عاوزين نخرب

عليكي يا هناء إنتي عارفة تربية أبوكي الله يرحمه.. الست

مالهاش غير بيتها وراجلها..

هناء: الله يرحمه ويسامحه يا أخويا..

فؤاد: يارب... أمال محمد مجاش لحد دلوقتي؟

هناء: مش عارفه..

فؤاد: أمك صاحيه ولا نايمه؟

هناء: صاحية ودخلت تصلي الظهر... بس...

فؤاد (مقاطعًا)... بس إيه؟ قولي يا هناء...

هناء: حاسة كده إن لونها مخطوف مش زي عوايدها... مش عارفه

مالها...

فؤاد: (يشرد بعيدًا بفكره...) إنتي هتقلقيني ليه قومي انتي ساعديها

وجهزي الغدا على بال ما اوصل الورشة كده وأشوف محمد

اخوكي فين..

هناء: مش هتاخد دش حتى؟

فؤاد: لا لما آجي ... سلام.

(يفكر.. أمي لازم تروح للدكتور لازم.. شكلها مش مريحنى... ويصل

إلى الورشة)

فؤاد: إيه يا مسمار... في حد سأل على الشغل بتاعه؟

مسمار: لا يا اسطى...

فؤاد: الهندسه جه النهارده؟...

مسمار: أيوه يا اسطى الصبح جه وخذ حتتين شغل يركبهم.

فؤاد: طيب ما بعثليش ليه؟

مسمار: قال مش عاوز يقلقلك وقال كمان إنت هتكون مكانه طول

الأسبوع الجاي علشان هو يروح من بكره عند الدكتور مع

عادل أخوه وسايب ليك مفتاح المكتب جوه... وقالي لما يجي

يبقى يقفل المكتب.

فؤاد: طيب... روح هاتلي شاي وشوف هتشرب إيه

(يدخل فؤاد إلى المكتب، ويجد ورقة مكتوبًا فيها بعض الأشياء

للعمل، وكذلك هناك فلوس بالدرج، يفتح الدرج ببطء وينظر

إليها ويدخلها في جيب قميصه، ثم يشرّد ثانيًا، ثم يقوم ويهب

واقفًا مع أذان العصر ويعود مرة أخرى للبيت ... ليجد محمدًا)

فؤاد: إيه انتو أكلتوا من غيري؟...

الأم: هو احنا نقدر يابني؟... واللقمة يبقى ليها طعم من غيرك يابني؟

محمد: اتأخرت ليه يا فؤاد؟... إحنا متنا من الجوع يا أخي...

فؤاد: معلى يا عم محمد استحملني يوم ما احنا ياما استتناك...

سعيد: ناكل الأول وبعدين اتكلموا..

(الجميع يجلس على الطاولة القديمة.. يبدأ الطعام)

محمد: أخبارك إيه مع طاهر؟

فؤاد (ينظر إلى محمد وهو يتابع النظرات المتبادلة من أمه ومحمد والتي فهم معناها أن الأوضاع ما زلت غير هادئة ولم يتم موضوع الصلح بينهما فحاول أن يهدئ من الأمور): أبداً طاهر كويس.. بس الظروف مش مساعدة خالص.

الأم: ليه يابني؟... هو مش الشغل ماشي معاه كويس؟

فؤاد: أيوه يا أمي... الحمد لله بس الشغل بتاعنا ده عاوز راس مال.. وراس المال محدود معاه والشغل يدوبك بيصرف عليه وعلى الورشة.. لكن الموضوع الأهم... أخوه عادل...

محمد (مقاطعاً): ... أخوه عادل؟

فؤاد: آه... أخوه.

محمد: ماله؟ ده واد زي العسل...

فؤاد: آه الدكتوراه قالت لازم يعمل عملية ويشوفوا عنده سرطان ولا لا؟

الأم: يا حول الله... يا ضناي يابني... الجدع لسه شباب..

فؤاد: والله يا أمي. إحنا بنقول كده.. بس المرض ما بيعرفش كبير ولا صغير... وعلشان كده يا حاجة قلت أنا ومحمد ناخذك عند

الكتور ونكشف عليكي علشان نطمئن.

محمد: (ينظر إلى فؤاد)... آه إحنا اتفقنا وشوفي هتبقى جاهزة إمتى

علشان نوديكي عند الدكتور.

الأم: بص بقى انت وهو.. أنا لا هروح للدكتور ولا حاجة.. أنا الحمد لله
وأنتوا وفرروا فلوسكم والمكتوب مكتوب.

محمد: يا أمي الكلام اللي إحنا قلناه هيتعمل.

فؤاد: (ضاحكًا)... ورحمة أبويا يا أمي تروحي عند الدكتور ونظمن على
صحتك مش أكثر..

الأم: خلاص لما آجي من عند اختكم الكبيرة إن شاء الله... أقضي أسبوع
ولأ أسبوعين هناك وبعدين آجي أعمل اللي انتوا عاوزينه ...

فؤاد: الله يرضي عليكى ياست الكل وما يحرمننا منك أبدًا

الأم: ولا أنتم ... ويهديكم على بعضكم

سعيد: ما فيش لحمه تاني ولا إيه

هنا: مفيش غير نايب أخوك جمعة ..

سعيد: جمعة مش هيجي يتغدى هاتيليلي أنا أكل وأن جه ... يبقى
نعمله أكل

محمد: مش عارف الواد ده طماع لمين

الأم: خد من نايبى يابني.. انا ما استحملش انتو تكلوا واخوك ما ييقاش
معنا ولا يدوق الاكل كمان ..

(بعد انتهاء الأكل يقوم كل منهم ويتجه إلى الحمام لغسيل يديهم ..

يشير فؤاد إلى أخيه محمد ليدخل حجرته)

محمد (يعطي سيجارة فؤاد): ... إيه حكاية الدكتور دي يا فؤاد

محكتليش عليها قبل كده فيه إيه مالها أمك
فؤاد: أنا نفسي مش عارف فيه إيه ... بس أمك وشها مخطوف وبقالها
فترة تقولى الموت وأبوك ... وعاوزه أطمئن عليكم . وبعدين
موضوع عادل أخو طاهر ده يعني مخوفنى قوي ... قلت
فرصة لما الكلام اتفتح ونطمئن عليها بالمرّة
محمد: عندك حق دى حتى بتخاف من الدكاترة .. وای تعب تقوللك
خدكك حبيتين ريفو وكباية شای وتبقى زى الفل
فؤاد: علشان كده جبتلها الموضوع عايم خالص ومن بعيد ... وأنت
بقى الدور عليك ... لطف الجو معاها زي زمان كده وخليها
تفرفش...

محمد: بس أنا مش عاوزها تفتح الموضوع الزفت ده تاني
فؤاد: ياخي دي أمك وبعيدين ما انت بجح برده يا محمد ... المهم
خش عليها بعد ما تصلي وكلها كده ياخي ... هوأنا برده اللي
هقولك

محمد: عندك حق ... نخش عليها ونشوف الموضوع إيه
فؤاد: ومتنساش تقنعه بموضوع الدكتورّة ده ...
محمد: (يدخل على أمه) ... حرماً يا حاجة ... (ويحاول أن يقبل يدها)
الأم: جمعا ... (تنظر له نظرة طويلة)
محمد: إيه يا أمي في إيه؟... أنا عارف إنك زعلانه مني بس أعمل إيه
الشیطان شاطر..

الأم: يا محمد إنت كبير البيت بعد أبوك وانا يابني خايفة عليك مش
موضوع البت دي هو اللي مزعلني منك... ده موضوع حياتك

كلها يابني المفروض إنك انت الكبير... كبير مش بس بسنك
وعمرك... كبير بعقلك وفكر لمصلحتك ولمصلحة اخواتك وتلم
شملهم...

محمد: يا أمي إنتي جاية تقولي الكلام ده دلوقتي وأنا سني دخل على 30
سنة؟ ما انتي عارفه أبويا كان بيتردني من البيت ويمشيني
أقعد بالشهر واللاتين بره.. وهو اللي كسرتني وسط اخواتي...
الأم: عمر أبوك ما طردك... ولا أقلك إطلع بره البيت إنت اللي كنت
بتمشي من قبل حتى ما تخلص الابتدائي وتخش الإعدادي...
تسرح السرحة... ولا نعرف أراضيك فين..

محمد: ما انتوا ماكنش فيكم حد بيسال عليا..
الأم: أبوك كان بيقول محمد راجل.. يعرف يعتمد على نفسه لغاية ما
خبيت أمله في الإعدادي ومعرفتش تطلع منها واتلميت على
الشلة البياظه بتاعتك اللي أغلبيتهم في السجن دلوقتي حتى
الجيش أديك هربان منه..

محمد: أنا شغال في محل تصوير دلوقتي وصاحبه تمام معايا وماشيه
والحمد لله..

الأم: مش... عاطف عبد المولى؟ (ضاحكة) ... يابني هو عامل المحل
لكيفه ولمزاجه مش علشان يشتغل.. دي حتى مراته القديمة ولا
عياله بيجوله... يابني الراجل بتاع الإزاة والكيف كله بيكرهه
ومحدهش يحس معاه بالأمان هو ده الفرق... وده لو معاه
فلوس الدنيا كلها الفقر أسهل ليه من شرب الميه..

محمد: طيب ما أبويا الله يرحمه كان بيشر ب..

الأم: أبوك عمره ماشرب خمرة هو كان بيقول على الأفيون... دواء وعمره
ما اشتراه وكان في القهوة بيدهوله محبة وعشم وناس كبيرة مع
بعض لكن كان دايماً بيقول الجنيه اللي اصرفه في الحاجات دي
أصرفه على العيال أحسن... عمرك شفت أبوك اشترى الحاجات
دي?... أديك انت كنت أكثر واحد بتقعد معاه..

محمد: بس كنت بشوفه ساعات... بيشر حبشيش..

الأم: مرة أو مرتين انت شفته لكن مش كل يوم ولا يدمنه أو يشتريه.

محمد: خلاص بقى ياأمي ... اللي فات مات ... إحنا ولاد النهارده.

الأم: يا محمد يابني أنا عوزاك إنت واخواتك يبقى أيدكم ف إدين بعض
ما حدش يضحك عليكم في الأيام اللي ما يعلم بيها إلا ربنا...
عاوزه أسيبكم وأنا قلبي مظمن عليكم...

محمد: (يقبل يد والدته) يا أمي ربنا يدليك الصحة وطولة العمر..

فؤاد: (يدق باب غرفة الأم)... إيه ياأمي... من لقي أحبابه نسي اصحابه
ولا إيه?...

الأم: ربنا ما يحرمننا منكم يابني ولا يشمت فيكم عدو ولا حبايب
وتكونوا قد الأيام اللي جايه وتقعدوا عليها..

(وهنا يدخل جمعة أخوهم)

جمعة: السلام عليكم جميعاً..

الأم: اتأخرت ليه يابني؟

جمعة: إنتي عارفة ياأمي شغلنا ملهوش مواعيد... إنتوا كلتوا؟

محمد: أخوك الطفس الصغير أكل أكلك ياجمعه..

جمعة: ياعم خليه ياكل... أهم حاجة القعدة معاكم مش الأكل.

الأم: يابني نايبك عينهولك... بس على قولك ياجمعه يابني بقالنا زمان مقعدناش مع بعض واتلمينا كده... الله يرحمه أبوك كان هو اللي بيلمنا كده..

فؤاد: (مع الإخوة)... الله يرحمه الفاتحة على روحه (أمين)... بصي بقى بحاجة... إنتي تقعدي أسبوع مش أكثر عند فردوس... وبعد ما تيجي إن شاء الله... نروح عند الدكتور ونظبط الموضوع كلها... إن شاء الله.

الأم: إن شاء الله... أنا المهم اطمنت عليكم وبقلكم قبل مأمشى خلوا بالكم من بعض انتوا مالكوش غير بعض... إوعوا حد يفرقكم وخلوا بالكم من سعيد لسه برضه طايش ومش متحمل مسئولته وربنا يهديه..

جمعة: ماتخفيش يأمي إنتي بس خلي بالك من صحتك وابقي سلملنا على فردوس...

(ويتكلم الجميع، ويتذكرون أحداثًا كثيرة كانت بالبيت، ويجلسون مع بعضهم حتى ساعة متأخرة من الليل... وتذهب الأم في اليوم التالي مع الابنة هناء وطفلها الصغيرة تاركة أطفالها الكبار مع سعيد وفؤاد ومحمد في بيت العائلة...)

علاء: ياه... آه إيه قلة الأصل دي ياأخي وحشني والله... إيه بقالك يجي شهرين مشفتكش ولا شفت فؤاد... ونعمه قله الأصل... طمني إنتوا عاملين إيه?... أمك واخواتك وأنت طمني وفؤاد أخبراه إيه؟

إسماعيل: هقولك كل حاجة أنا بايت معاك... ده انا كنت متفق معاه
إن احنا هانجيلك الاسبوع ده علشان اخلص شوية ورق في
المجمع ونقعد مع بعض بس فيه شوية حوارات معاه..
فؤاد: إيه انت مخلصتش ولا إيه؟...

إسماعيل: لا لازم أستنى ليوم الحد... أعمل إيه؟ عاوز انجز.
علاء: معلش يابني إحنا دول عالم تالت... استحمل شويه... بقولك إيه..
تيجي نتعشى بره وناخد سهرتنا؟...

(يخرجان معًا إلى خارج الغرفة، ويبدأ إسماعيل في سرد قصص
عن مدينتهم، وقصة عادل أخي طاهر... ويتحدثون عن الجميع
حتى أذان الفجر... ويتكرر نفس أسلوب العشاء في اليوم التالي، وفي
تذكر الأيام الخوالي، والجلسة على الربوة، والحياة الأفضل لأهل
مدينتهم، ومعرفة الكثير عن أسلوب حياة العالم الخارجي من علاء).

فؤاد: إزيك يا هندسه واحشني... حمد الله على السلامة... طمني عليك
وعلى الأستاذ عادل.

طاهر: أنا الأسبوع اللي فات كرهت السفر والزحمة والسواقة.. مصر
بقت عامله زي الغابة..

فؤاد: بقولك إيه؟ أنا لسه هافطر تفطر معايا؟... مسمار (ينادي على
صبي الورشة) ولا يا مصطفى خد ظبط فطار حرش..

طاهر: الأسبوع الجاي بقى تركز في الورشة علشان أنا من يوم الحد
الجاي هنزل مع عادل واقعد معاه والعملية دي هتخلها
أسبوعين.. عاوزك تسد معايا يابطل إنت شايف الموضوع مش

متحمل..

فؤاد: عيب يا هندسه... رقبتي.

طاهر: تسلم رقبتك ... عمومًا أنا خلصت القرض وهستلمه بكره أو بعده إن شاء الله وأحاول أمشى المصلحة علشان ما نتكشفش في السوق..

فؤاد: علشان كده ... كان الأستاذ بتاع البنك ده لازم هنا.. ياعوذ بالله من ده بني آدم.

طاهر: هنعمل إيه بس؟ ما انت شايف الظروف... ومفيش لي مخرج تاني في ظروف ما يعلم بيها إلا ربنا..

فؤاد: طيب بس كده الأمور بقت صعبة... القرض الأولاني على القرض ده... الدنيا هتدخل على بعضها وهتلاقينا مش عارفين نعمل حاجه..

طاهر: المهم ... عادل والبيت وربنا يدبرها من عنده... هسيبك أنا وأروح مشوار..

فؤاد: والأستاذ بتاع البنك؟...

طاهر: هنعمل إيه؟... أمر الله... سلام..

(يسرح فؤاد مرة أخرى في شخصية طاهر وقدرته على تفهم الأمور والسعي نحو أهدافه حتى وإن كان فيها هلاكه المحقق من أجل أخيه، وهل أخوه سوف يقدر هذه الأشياء؟... وماذا يفعل طاهر بحب أخيه أو عدمه؟ حتى إذا شعر عادل فهل سوف يقوم بسداد هذه المبالغ عن أخيه... أو -لا قدر الله- يتوفاه الله فيكون الموت وخراب الديار ينتظر طاهرًا؟ أكيد أنه لا يحسبها من هذا المنظور.. ينتفض فؤاد من هذه الأفكار وينبه على مسمار أن يفتح الورشة باكراً في حدود التاسعة والنصف، ويذهب إلى البيت ليجد أخاه سعيدًا يداعب أولاد أخته هناء، ثم يتحمم، ثم ينام نومًا عميقًا، وفي اليوم التالي يذهب إلى الورشة ويحضر إليه طاهر ويتركه ليذهب للصرف من البنك وفي المساء يقابل إسماعيل).

فؤاد: حمد الله على السلامة.. إيه عملت إيه؟ خلصت ورقك؟
إسماعيل: آه .. مش كنت جيت معايا وكنت شفت علاء؟... طاهر يعنى إدالك نشيان؟.. ماكنت جيت معايا..

فؤاد: يله انت معندكش دم؟... أسيب الراجل في الظروف دي؟
إسماعيل: ياعم انت هتعمل فيها جمال عبد الناصر؟... هتيجي تتمشى معايا ولا لأ؟...

فؤاد: استنى يا خفيف... جاي معاك...
(يذهب فؤاد مع إسماعيل، ويخبره كيف تعذب في تخليص واستخراج هذه الأوراق السهلة البسيطة وتكلفتها الغالية، ويذهب بعد ذلك كل إلى منزله، وفي يوم الثلاثاء صباحًا، يذهب إلى الورشة كالعادة في العاشرة صباحًا، ولكن قبل الظهر بقليل يحضر سعيد أخوه ليخبره...)

فؤاد: إيه مالك يا سعيد في إيه؟... مالك؟

سعيد: أمك جت مع هناء.. بس شكلها تعبانة أوي... يدوب نزلتها من العربية وجيتلك.. قالتلي اندهلي اخوك فؤاد بسرعة..

فؤاد: أنا هروح على البيت وانت تروح تجيب عربية بسرعة.

(ويذهب مسرعاً إلى البيت، ويجد والدته مستلقية على الفراش)

فؤاد: مالك يا أمي؟... مالها يا هناء؟

هناء: مش عارفه والله مره واحده كده واحنا عند فردوس قالت يالاً بينا نروح... دلوقتي..

الأم: (بنظرة طويلة إلى فؤاد وبصوت رخيم خاشع صادر من الأعماق) .

يا فؤاد يابني... أنا خلاص انت فاكر كلامي ليك علشان لما أقابل وجه كريم أبقى مرتاحه.

فؤاد: (ضاغط على أعصابه بكل ما أوتي من قوة)

يا أمي ماتقوليش الكلام ده إن شاء الله هتبقى زي الفل.

الأم: يابني أنا عارفه وحاسه.. ومؤمنه بقضاء ربنا ودي نهاية كل بني آدم وكل شيء حي... ماداييم إلا وجهه..

فؤاد: (شبه باكٍ... ومتماسك)

سعيد أتأخر ليه؟... شفاه يا هناء.

الأم: (تمسك بيد فؤاد) يابني خلاص أنا حاسه إن المعاد خلاص... خد

بالك انت من اخواتك وخليك جنب محمد ماتسبهوش... أنا

مش خايفه إلا عليه يافؤاد... دي وصيتي ليك يا بني...

فؤاد: يأمي أنتي هتقومي وهتعلمي اللي في نفسك.

هنا: العربية جت مع سعيد بره.

الأم: يا بني ماتتعيش نفسك...

فؤاد: إنتي ماتتعيش نفسك وهتبقي كويسه إن شاء الله.

(يحضن أمه حضناً عميقاً ويرفعها إلى السيارة ويتجه إلى المركز الطبي

المتواضع...)

فؤاد: انزل ياسعيد بسرعة... شوف الدكتور..

(يحضن الأم بكل رقة... وأمه تنظر إليه ولم تعد تستطيع الكلام في

هذه الفترة...)

الدكتور: خير يا جماعة؟...

فؤاد: بسرعة يا دكتور شوف الحاجة الله يكرمك...

الدكتور: (يأخذ بفحص الأم يميناً ويساراً..) للأسف الحاجة دخلت في

مرحلة غيبوبة وده علاجها مش هنا تروحوا مستشفى الجامعه

أو الأميري بسرعة.. الوقت عليه عامل كبير.. أنا هادلکم تصریح

من هنا على الجامعه..

سعيد: أمال المستشفى دي كلها اتعملت ليه وبتعمل إيه؟

فؤاد: إحنا هنتكلم دلوقتني ولأ نعمل الصح وبسرعة؟ حالتها حرجة يا

دكتور ولا إيه؟

الدكتور: تقريباً دي آخر...

(ينظر الدكتور... إلى فؤاد ويلاحظ نظرات عينيه القوية الممزوجة

بالقلق)

... مفيش حاجة بعيدة على ربنا... أهم حاجة تاخدها دلوقتي على

المستشفى... ولأعايز تستنى الإسعاف؟

فؤاد: يالآ ياسعيد اسبقني على العربية..

(يدخل فؤاد بجوار والدته وهناء... وسعيد يركب

بجوار السائق ووالدته تنظر إليه وفي عينيها كل ملامح الأمومة

والتوسل... بالأ يترك إخوته ويبقى على عهده معها... ورابطة

على يديه في غير قدرة على النطق... مما أفقد فؤاداً كثيراً

من تركيزه وقدرته حتى على حملها عند باب المستشفى...)

فؤاد: مش قادر أنزل أمك ياسعيد... معايا (بصوت عالٍ وبنبرة حادة)

فين الدكاترة الي هنا؟

(شبه منهار في مدخل المستشفى، والممرضون والممرضات في حالة

بلاهة لا يتأثرون بهذا المنظر حتى يدخل على غرفة الطبيب)

الدكتور: فيه إيه؟ إنتو إزاي دخلتوا هنا... فين الممرضين؟

فؤاد (بانفعال واضح...): ... اكشف على أمي وبعدين نتفاهم.

الدكتور (أحس أن نبرة التعصب جارفة... وأنه وحده في الغرفة)... حاضر

بس اهدى...

(أخذ ينظر إلى الأم، ويتفحصها وهي ساكنة لا تتحرك وهناء بجانبها
وسعيد حتى السائق، وينظر الطبيب إلى فؤاد...)

إنت ابنها؟

فؤاد: أيوه... إحنا كلنا ولادها...

الدكتور: بص علشان متبهدلش هنا... خد أمك وروح على البيت
بسرعة.. معاك عربية؟

فؤاد: يعني إيه؟...

الدكتور: اسمع كلامي... بسرعة الوقت مش في صالحك... ولازم تبقى قد
الموقف... أنا قلت اللي عندي.

(فؤاد بدون تفكير... ينظر إلى سعيد وإلى السائق، وفي ملح البصر
يعود مرة أخرى إلى العربية... ولكن في العودة كانت الأم بالفعل قد أسلمت
الروح على كتف ابنها فؤاد... وعند العودة يكون محمد في انتظارهم).

محمد: وديت امك فين يا فؤاد؟... أمك جرتها إيه يا فؤاد؟ (باكيًا)

فؤاد: اهدي يا محمد ماتفرجش الناس علينا... (شبه باكٍ) إنت كنت
أكثر واحد على بالها...

(ينظر محمد إلى أمه وهي خارجة من العربة... بين يدي
فؤاد وسعيد ليدخل إلى البيت.. وهو زائغ البصر، وكأنه تائه...
ويصرخ فجأة: أمي... وينخرط في حالة من البكاء الشديد).

فؤاد: محمد... إنت الكبير ماينفمش كده... سعيد هتروح تشوف دكتور
الصحة تجيبه معاك وتيجي بسرعة...

obeikandi.com

(تمر المواقف سريعة حتى أذان العشاء، وفي العاشرة مساء
يقرر الجميع أن يكون الدفن غدًا بعد صلاة الظهر.. ويظهر
إسماعيل ويكون بجانب صديقه فؤاد، وأيضًا مسمار صبي الورشة...
وتحضر فردوس الأخت الكبرى، وزوجها سلامة، وأبناؤهما، وتبدأ
مراسم تشييع الجنازة، وقبل الدفن حضر أيضًا علاء، الكل توجه
إلى المدافن المفتقرة إلى أي مظهر من مظاهر التقدم والمدنية... كان
يومين شاقين على فؤاد، ومحمد، وأخيهم جمعة، لم يذق ثلاثتهم
طعم النوم أو الأكل حتى مساء يومهم الثاني... وبعد انتهاء مراسم
العزاء ولمّ الصوان... جلس ثلاثتهم... فؤاد، وعلاء، وإسماعيل...
علاء: إيه يا فؤاد ما توحد الله... (بصوت حانٍ رابئًا على كتفه)

فؤاد (باكيًا):... كانت بتكلمني وهي حاسة بنفسها ... كانت عارفة إنها
هتتوت..

إسماعيل: يا أخي أمك ست مؤمنة وموحدة بالله وبيقولوا إن الناس اللي
زي كده بتبقى حاسه قبلها بأربعين يوم.
علاء: ربنا يرحمها ويسامحها... أمك ست مؤمنة يافؤاد وأهم حاجة
الدعا ليها... مش هينفع اللي بتعمله ده... قوم معايا ناكل
لقمة انت مكلتش من امبارح.

طاهر: (يحضر في هذا التوقيت... وينزل من سيارته) فؤاد أنا أول ما
سمعت جيت على طول البقية في حياتك (حاضنًا له).. هي
مش كانت مسافرة؟

(أخذ يقص فؤاد عليهم مرة أخرى... طلبها للسفر

وعهدها معه أن يبقى بالقرب من أشقائه ولا يتركهم، ويرعى مصالحهم... وهو يبكي بصوت أجش.. حتى انتهى من قصته).

علاء: طاهر إنت تيجي تاكل معنا لقمة... لحسن فؤاد مكلش من امبارح ولا نام.

طاهر: وأنا مكلتش من امبارح.. عادل من الصبح في العمليات وكانوا بيجهزوا من امبارح..

إسماعيل: طب يالاً بقى لحسن أنا جعت على الريحة.. ونقعد عندنا في البيت..

علاء: لا لا .. نروح المطعم أحسن علشان الأستاذ طاهر لازم يجي معنا.

(الكل يمسك بيد فؤاد، حتى يقوم، ويذهبون إلى مطعم قريب بالمدينة.. مصرّين أن يتناول فؤاد شيئاً ويأكل معهم)

إسماعيل: آمال ياهندسه... أخبار عادل إيه؟

طاهر: والله ياإسماعيل الدكتور قال إن العملية صعبة والعملية دي عبارة عن استكشاف... وقعدت أكثر من أربع ساعات ودي عملية استكشاف زي مايقول آمال -لا قدرّ الله- الموضوع

لوطلع حقيقي مش عارف أعمل إيه؟

إسماعيل: ياأخي الله لا يقدر.. وشوف المثل بيقول إيه أخبار مريضكم ايه يقولوا السليم بتعنا مات وأدي الدنيا..

علاء: تقوم بقى نشرب شاي ونروح على أي قهوة.

(ينتهي الجميع من المقهى، ويذهب كل من إسماعيل وعلاء مع فؤاد، ويلتفت طاهر في حركة سريعة لفؤاد ليضع في جيبه مبلغًا نقدياً، وينظر إلى عينيه مباشرة مشيراً إلى عدم الكلام.. ويتفق أن يذهب طاهر مع علاء إلى القاهرة سوياً.. وفي الصباح يذهب طاهر مع علاء... ويبدأ في حديثهما في سيارة طاهر).

علاء: يعني إيه ظروف البلد يا هندسه؟.. ما فيه ناس بتكسب في الوضع ده..

طاهر: بص يا أستاذ علاء.. الظروف في البلد راичه من سيء لأسواء.. مفيش حركة والكل بيلعب لمصلحته.. تعرف لما باروح الدقهلية وأشوف حركة الشغل بتصعب عليا نفسي... تلاته أو أربع تجار همّا الي مالكين المهنة دي... يفتحوا الحنفية ويقفلوها زي ما هما عاوزين... السوق بتاعهم..

علاء: على فكرة ده مش في الألمونيوم بس... ده في كل حاجة.. حتى السياحة بس المهم انت.

طاهر: أنا؟... ده موضوع عادل ده تعبني أوي. بس يارب يكون على خير ويبقى كويس... أي فلوس تتعوض وأي شغل يمشي الحال أنا مش طمعان في حاجه.

علاء: والعملية دي كلفتك كام؟

طاهر: دي لوحدها داخله تقريباً كده في حوالى خمس تلاف جنيه.

علاء: ياه... معملتهاش في مستشفى حكومي؟ كانت هتبقى أرخص..

طاهر: حكومة إيه ياعم... روح مستشفيات الحكومة أقرب معاد ست

شهور ويقولك انت على قائمة الانتظار... أنا شفت أطفال
عندهم سرطان وناس في أبو الريش والقصر العينى حاسيت
إن مصر كلها عندها سرطان.. المشكلة إن إحنا قال بنعاني من
زيادة في عدد الأطباء... فين هما بقى الأطباء؟... عيل عنده
ستين دماغه عاملة زي الشمامه يستنى الدكتور يعمله عملية
بعد أربع ولا خمس شهور؟... بالذمة ده اسمه كلام وتقولي
حكومة؟.. ده يكون مات ولا جراه حاجه.. إنت بشوف الأجانب
في الأفلام والطيرات واهتمامهم بالبني آدم؟

علاء: على قولك... لك الله يا مصر مما هو آت..

طاهر: هو ده اللي مخوفني... ما هو آت.. مش عارف لو عادل لاقدّرالله
عنده حاجه أعمل إيه وإزاي؟

علاء (مقاطعًا): يا أخي لا قدّرالله... ربنا يسترها..

طاهر: الله كريم... حمد لله على السلامة...

علاء: هشوفك... وده عنواني وأرقام تليفونات الشركة... أي حاجة اتصل
بيا..

طاهر (مقاطعًا):... أكيد يا أستاذ علاء... إحنا خوات وولاد بلد واحده.

علاء: وربنا يشفي عادل ويقومه بالسلامه...

طاهر: يارب.. ده انا نادر اعمل ليله لله..

علاء: إن شاء الله... هنزل انا هنا..

طاهر: طيب أوصلك أي حته انت عايزها؟

علاء: لا انت كده ياباشا تمام... ألف شكر.. متنساش الأرقام معاك.. مع

السلامه

طاهر: لا متخافش أخوك كمبيوتر... ألف سلامة يا أستاذنا.

(يجلس فؤاد في حجرته المطله على صالة البيت وهو يدخن سيجارته
ويقرأ جريدة تبدو قديمة بعض الشيء ويلمح أخاه سعيدًا
وهو يلبس تي شيرت ليخرج)

فؤاد: إيه ياسعيد رايح فين؟

سعيد: هروح أجيب شوية طلبات..

فؤاد: طب خد هات سجاير ليه وشوف أختك فردوس لو عاوزه حاجة
(يعطيه بعض النقود).

سعيد: حاضر...

فردوس (تدخل حجرة فؤاد): إيه يا فؤاد مالك بقالك يجي يومين
مطلعتش من أوضتك؟.. ياخويا ما ينفعش كده..

فؤاد: هعمل إيه بس يا فردوس؟

فردوس: إنت أمك الله يرحمها كانت معتمدة عليك إنك بتنصف
أخواتك... وأنا زي مانت عارف بعيدة عنكم وظروفي
متسمحش أكون هنا باستمرار... بس مش عاوزه أسيبكم وأنا
قلقانه عليكم وقلقانه عليك انت بالذات.. إنت عمود البيت
بعد وفاة المرحوم والمرحومة ودي مش كلمتي... ده كلام أمك
الله يرحمها ويسامحها.

فؤاد (بحسرة): الله يرحمها... تعرني يافردوس... كانت عارفه إنها
هتмот زي ما يكون قلبها حاسس..

فردوس: أمك الله يرحمها ست مؤمنة وموحدة والناس دول كانوا زي
أهل الفطرة علاقتهم بربنا قويه علشان كده... تدعي ليها

بالرحمة وتزرها... بس المهم إنت دلوقتي يا أخويا..

فؤاد: أنا... مش قادر أفكر ولا قادر أعمل حاجة..

فردوس: (صلي ع النبي)... (عليه الصلاة والسلام)... أهم حاجة تطلع من

الجو ده يا أخويا إحنا دخلنا على أسبوعين آه . ده الخمستاشر

بتاعها بكره وانا مش هقولك تعمل حاجة أكثر من إنك تروح

الشغل وتقف جنب الراجل الواقف جنبك في عز مرض أخوه.

فؤاد: أكيد... الموقف اللي عمله طاهر يوم العزا والجنازة ما ينكرهوش

إلا قليل الأصل أو..

فردوس: واحنا يابن أبويا مش كده... علشان كده تقوم تحافظ على

ماله وفلوسه وإن شاء الله كل حاجة هتمشي..

قوم اتوكل على الله على بال ما تاخد دش هكون جهزتلك حاجة تاكلها

ويكون سعيد جابلك السجاير بتاعتك... قوم يا خويا واستهدى

بالله ... واستعيذ من الشيطان.

فؤاد: أعوذ بالله من الشيطان الرجيم

(يهم فؤاد، ويذهب إلى الحمام، وفي تلك الأثناء، تقوم فردوس

بإعداد الطعام له، ويكون سعيد قد أحضر طلباته وسجائره).

فردوس: الأكل جهز ياخويا... بقولك يا فؤاد... أخوك محمد من امبارح

مظهرش. شوفه والنبي ياخويا..

فؤاد: حاضر يافردوس... هروح الورشة الأول واشوفه وأنتي ما تقعديش

هنا أكثر من كده... عيالك وبيتك أولى بيكي وابقي تعالي على

الأربعين..

فردوس: مش وقته الكلام ده...

فؤاد: ده وقته... بيتك وعيالك أولى بيكي بكره بعد مانيجي من الترب

أخلي سعيد يوصلك.. كفايه كده وتبقي تيجي على الأربعين

هو ده الصح والأصول يابنت الأصول..

فردوس: الي انت شايفه ياخويا.

(ينتهي فؤاد من غدائه، ويأخذ علبة سجائره، ويذهب إلى الورشة)

فؤاد: صباح الخير يا مصطفى...

مصطفى: صباح الخير يا اسطى..

فؤاد: حد سأل على الهندسه ولأ في شغل متاخر؟

مصطفى: يا اسطى.. المهندس طاهر بقاله يجي أسبوع مجاش... قاعد في

مصر على طول.

فؤاد: ولا يا مسمار... روح هاتلي شاي وتعالى.

(يشعل فؤاد سيجارته، ويبدأ تفكيره... في أن عادلاً تملك منه المرض

اللعين، وهو لا يعرف ماذا يفعل لطاهر؟ ولا توجد أيضاً أي

أموال معه، ولا يوجد شغل في الورشة.. ماذا أفعل؟ هكذا أخذ

فؤاد يفكر... وقرر من أنه لابد من الذهاب إليه في القاهرة

والوقوف بجانبه حتى النهاية...).

مصطفى: الشاي يا اسطى فؤاد... عاوز حاجه تانيه؟

فؤاد: بص يا مصطفى إنت تفتح زي مانت وتبقى تخلي بالك.. ماشي؟

(يخرج بعض المال من جيبه) وامسك الفلوس دي ولو احتجت
حاجه قولي أو تسييلي خبر في البيت علشان انا هسافر عند
الهندسه في القاهره من بكره.

مصطفى: والنبي ياسطى فؤاد أبقى طمني عليهم.

فؤاد: أنت بتحب الهندسه يا مسمار؟

مصطفى: الهندسه مربييني وأنا عمري ثمن سنين وأنا دلوقتي بقالي ست
سنين معاه... والعشرة ماتهنش إلا على ابن الحرام وبعدين
عمري ما حسيت إني محتاج حاجه وبيعاملني زي أخوه الصغير.
فؤاد: يخرب بيتك يا مسمار... ده انت حساس ياله... ده انا كنت بحسبك
لطخ (يهم بالوقوف) عمومًا أنا ماشي دلوقتي وهطمنك ياعم.

(يذهب فؤاد إلى عنوان المستشفى الموجود بها عادل و طاهر بالقاهرة)

فؤاد: إزيك يا هندسه؟ (حاضنًا لطاهر، وهو في حالة نفسية سيئة).

طاهر: إزيك يا فؤاد... عامل إيه وإيه الأحوال؟

فؤاد: الحمد لله... إنت طمني عليك... وعلى عادل.

طاهر: عادل.. عادل... الله يكون في عونته.. إمبراح بالليل عملوله
العملية الثانية في المخ وقالوا صعب إنه يرجع تاني زي الأول.

فؤاد: إزاي؟

طاهر: العملية دي من العمليات الصعبة دي قعدت حداثر ساعة..

المهم دلوقتي إنه يعيش.. ده الشيء الوحيد اللي يحسني إني

عملت حاجه في دنيتي واحس إن كسبته في الحياه.

فؤاد: إن شاء الله خير... اتغديت ولاً لأ؟
طاهر (ضاحكاً رغماً عنه): أنا بقالي يومين ماكلتش ولا نمت.
فؤاد: طيب أنا ساعة بالكثير أوصل مشوار واجيلك... سلام.

(يخرج فؤاد من المستشفى، ويذهب إلى مطعم يشتري دجاجتين،
وبعض العصائر والسجائر، ويذهب إلى طاهر مرة أخرى... ولكنه قد
أخذ قراراً.. أن يذهب لعلاء ويبيت عنده، ويذهب باكراً للورشة...)

طاهر: ليه بس كلفت نفسك يا فؤاد؟
فؤاد: كلفت نفسي إيه بس يا هندسه؟ ... يالاً بسم الله.
طاهر: الواحد مش جايه ليه نفس.
فؤاد: ياباشا لازم تاكل علشان تقدر تقاوم.. مش ده كلامك؟
طاهر: مش عارف أقولك إيه بس... المهم طمني.. الشغل أخباره إيه؟

(يتحدث معه عن أحوال الورشة، والقروض، ومخططاته في حالة فشل
السداد من البنوك، وينتهي حديثهم عند الساعة الثانية صباحاً).

فؤاد: هسيبك أنا بقى.. هبات عند علاء النهارده وهروح الصبح زي ما
قلتك.

طاهر: ماشي... وماتنساش تقول لعلاء يشوفلي من دلوقتي اللي قتلتك
عليه لو المواضيع قفلت... وزى ما انت فاهم... مش عاوز
اتبهدل يا فؤاد.

فؤاد: ما تقلقش ياهندسه... إن شاء الله كل خير... ومتقلقش... سلام.

(يذهب فؤاد إلى شقة علاء في وقت متأخر مع أذان الفجر... ويفتح

علاء الباب مسغراً)

علاء: فؤاد... إيه يابني خير... مش عوايدك... خير فيه إيه اللي حصل؟

فؤاد: مفيش جيت لطاهر... أخوه عمل العملية وقالوله لازم يقعد تحت
الملاحظة مش أقل من ثلاث شهور.

(وأخذ يحكي له ظروف طاهر بالتفصيل.. ويتناقشان في عدة أشياء

وكيفية تدبير طرق السفر لطاهر)

علاء: يعني إيه.. مافيش أمل يسدد للبنك؟... والعربية كمان... طيب

هيعمل إيه..؟

فؤاد: هو ده اللي قالهولي... وأكد عليه... إنك تشفله سفره في أقرب

وقت وتكون كويسه ومفيهاش تكاليف..

علاء: بص نقوم ننام الساعتين دول.. وهتدبر إن شاء الله.

فؤاد: انت مش هتروح الشغل بكره؟

علاء : لا ياباشا راحة... بس اللي يعرفكم ويشوفكم... يشوف راحة؟

(يبيت فؤاد مع علاء، ويرجع إلى بلدته ليلاً، ويذهب للمنزل ليجد

أخته هناء، وأولادها، وأخاه سعيداً)

فؤاد: إزيك ياهناء... أخبارك إيه وأخبار جوزك؟

هناء: الحمد لله.

فؤاد: وانت رجعت إمتى؟

سعيد: قبل المغرب.

هناء: أجهزلك غدا ياخويا على بال متغير هدمك وتاخذ حمام؟

(يخرج فؤاد من الحمام ويأكل سريعاً، ويذهب إلى سريره، تقدم هناء له الشاي، ويشعل سيجارته، ويظل يفكر... وفجأة! يتذكر أخاه محمداً ولكن يغالبه النعاس حتى يستيقظ في اليوم التالي...)

فؤاد: صباح الخير... يا هناء مصحتيش بدري ليه؟

هناء: يا اخويا انت نمت ما دريت بالدنيا وحاولت أصحيك الصبح...

ولا رديت عليا.

فؤاد: أخوكي سعيد فين؟

هناء: جوه... نايم.

فؤاد: طيب (يخرج مالا من جيبه)... خدي إدي أخوكي سعيد خمسه

جنيه.. وانتي هاتي طلبات للبيت وقولي لسعيد يقب ويغطس

ويشوف أخوه محمد فين... ماتنسيش ياهناء.. سلام عليكم.

هناء: حاضر ياخويا... مع السلامة.

(يهم بالذهاب إلى الورشة)

فؤاد: صباح الخير يا مسمار.

مصطفى: صباح الخير ياسطى فؤاد.

فؤاد: إيه... مفيش إي حاجه؟

مصطفى: مانت عارف البلد... كلها عارفه إن المهندس طاهر مع أخوه
من الأسبوع اللي فات... هي البلد دي ياسطى فيها شغله إلا
الكلام وماحدث بيعمل حاجه..؟
فؤاد: ماهي دي المشكلة لو كل واحد شغال ومش فاضي وملهي في شغله
ماحدث هيبص على الثاني.
مسمار: ربنا يخلي الهندسه... هو اللي بيعلمني.. ويفهمني.. ربنا يخليه
ويشفي أخوه.
فؤاد (داعيًا): .. يارب... طيب روح البيت بتاع أبوه واسألهم لو عايزين
حاجه وجبلهم طلبتهم.. ماتتأخرش.
مسمار: هوا ياسطى.
هاقوم أقطع قاعدتين ثلاجة ولا أقطع المطبخ المكهن... آهو أحس إني
بعمل حاجه... يمكن ربك بيعت.

(يبدأ بالعمل، وبعد أقل من ساعة يأتي زبون ليتعاقد على عمل
فترينات بطريقة معينة لمحل الحلويات الذي سوف يفتحه بعد أقل
من شهر، ويتم الاتفاق بينهما وقر الأيام سريعاً.. ويذهب فؤاد لطاهر).

طاهر: إيه يافؤاد... الأخبار إيه؟

فؤاد: إيه يا هندسه واحشني والله... مفيش جديد؟

طاهر: الواد مفيش خالص.... الورشة أخبارها إيه؟

فؤاد: الحمد لله ماشيه... المهم عادل عامل إيه؟

طاهر: متنساش موضوع علاء علشان لو حصل حاجه... وأخبار الأستاذ

شوقي إيه بيجيلك؟

فؤاد: بالنسبة لعلاء إنت متقلقش... لكن شوقي بقاله يجي فترة

ماشفتوش يمكن بقالي شهر.

طاهر: يبقى ناوي يغدر بي... البنك... حسبي الله ونعم الوكيل.

فؤاد: يا هندسه ماتقلقش.

طاهر: أنا عمال ألبس طوقي يافؤاد... واديك شايف وعارف أنا مجدول

قبل كده وعملت لعبه معاه وأخذت قرض تاني بضمان الأول..

هو مش أصيل.. بس مفيش غيره يعني الصبح... ممكن تلاقي

البنك واخذ حكم عليا ومحبوس... والناس دي شغلها مع

الفلوس خلى إحساسها مات ومعندهاش عزيز.. زي الدكتور

اللي بيتعامل مع الدم.. علشان كده لازم أبقى عامل حسايي.

فؤاد: ماتقلقش إن شاء الله خير(يضع يديه في جيبيه ويخرج بعض

الأموال) وخلي دول معاك .

طاهر: ربنا يسترها... ومنتساش علاء..

(يخرج طاهر من مبنى المستشفى مع فؤاد ويودعه... ويرجع فؤاد إلى منزله ولكن في طريق عودته يفكر في طاهر وفي كل شيء ويحاول نفسه قائلاً: طاهر يجتهد ومع ذلك لا يحالفه الحظ مثلما يقول: إن هناك أناسًا كثيرًا في ذلك... وكما قال هو نفسه في بداية لقائه معه... في ناس تمسك الذهب يصبح تراب وناس تمسك التراب يصبح ذهب مع مجهود قليل، وطرات فكرة خاطفة في رأسه.. هي عندما يسافر طاهر... ماذا يفعل في هذه الفترة؟ وفي أثناء هذا التفكير... يسمع صوتًا قويًا...)

سعيد: فؤاد.. فؤاد

فؤاد (يلتفت لمصدر الصوت، ولكنه كان مازال غارقًا في التفكير): ... إيه

يا سعيد فيه إيه ... مالك؟

سعيد: أخوك.. محمد.

فؤاد: ماله؟... حصله إيه؟

سعيد: الناس بتاعة المركز جم سألوا عليه... مش عارف حصل إيه...

فؤاد: يعني هو فين؟

سعيد: أنا مش عارف..

فؤاد: حد في البيت؟

سعيد: لا ... مفيش ... هناء في بيت جوزها.

فؤاد: طيب أنا هروح المركز... روح أنت واهدا خالص ومحدش يعرف

حاجه... فهمني... مش عاوزين شوشرة.

سعيد: خلاص... فاهم.

(يذهب فؤاد إلى المركز ليعرف ماذا حدث وبالسؤال بطريقه ذكية،
وبمعرفة أمين شرطة كان على صلة مع المهندس طاهر... يسأل بهدوء):

فؤاد: إزيك يا أمين عبد الله؟

أمين الشرطة: إزيك يا فؤاد؟... عامل إيه والهندسه عامل إيه واخوه
عادل؟

فؤاد: الحمد لله... أخوه عادل عمل العملية ومستنيين عليه شهر تاني
علشان يرجع لصحته... بس تعبنا قوي وطاهر... تعبنا معاه

أمين الشرطة: طاهر ده جدع قوي بس الظروف...

فؤاد: إنت هتقولي؟... دي عشرة...

أمين الشرطة: صحيح ... خير إيه اللي جابك؟

فؤاد: أبداً ... في ناس من عندكم جم سألوا على أخويا محمد.

أمين الشرطة: آه ... هو أخوك ... اللي شغال مع الراجل صاحب الاستديو؟

فؤاد: آه... في حاجة؟...

أمين الشرطة: لا أصل قبضوا على الراجل ده ولقيوا عنده مخدرات وفرد

خرطوش وبيعملوله قضية تمام... إنت عارف لما ظابط جديد

بيمسك بقى عاوز يعمل شغل... وأكيد بيدور على اخوك

علشان كده... وحظه وحش لقيوا عنده فرد خرطوش... يعني

قضيتين... وأكيد عاوزين يسألوا أخوك.. وانت عارف إن اخوك

هربان من التجنيد علشان كده لو ظهر يبقى على العنبوكة

على طول... فهمني طبعًا يا عم فؤاد...

فؤاد : آه طبعًا...

أمين الشرطة: تمام ... اقعد اشرب حازه.
فؤاد (ضاحكًا بفتور): ... تسلّم ياباشا... تبقى تيجي تشرفني في الورشة
ياباشا.

أمين الشرطة: تسلّم.. أيوه كده... فين أيام الهندسه؟
فؤاد: ما احنا واحد برضه ياعم عبد الله... سلام عليكم.
أمين الشرطة: مع السلامة.

(يخرج فؤاد من مركز الشرطة في قرابة الساعة العاشرة ليلاً، وكل تفكيره أن يجد محمداً حتى عثر عليه ويخبره فؤاد بالتفاصيل وينبه عليه بعدم الذهاب، وبعد ذلك يذهب فؤاد، ومحمد إلى البيت، ويستيقظ مع أذان الظهر من اليوم التالي ليذهب إلى الورشة)

مسمار: صباح الخير ياعم فؤاد.

فؤاد: قهوه يا مسمار بسرعة.

(يشرب فؤاد قهوته، ويبدأ في عمله بعد ذلك، ويمر حتى يفاجأ

باتصال)

فؤاد: ألو...

طاهر: فؤاد... اتصرف في أي فلوس وهاتها معاك بدون ما تعرف حد أي حاجه..

فؤاد: إيه يا هندسه؟... في إيه ومال صوتك متغير؟...

طاهر: عادل... (ويبيكي...)

فؤاد: خلاص ... خلاص ... طيب عاوز أد إيه؟

طاهر: اتصرف في حدود ألفين... ثلاثة بس بسرعة.

فؤاد: حاضر يا هندسه النهارده هكون عندك إن شاء الله.

(بعد انتهاء مكالمة التليفون، ينطلق فؤاد كالمجنون، وينظر إلى

الورشة، ويذهب إلى أصدقاء طاهر أو من كان عليه مبالغ، منهم من قام بإعطائه، ومنهم من تخابث عليه، ومنهم بالفعل من شعر منه بالعجز،

وبعد أقل من أربع ساعات كان معه المبلغ المطلوب واتخذ طريقه إلى القاهرة ليرى طاهرًا وهو في حالة نفسية لم يره فيها قبل ذلك).

فؤاد: إمسك نفسك مش كده.

طاهر (وهو يبكي): ... مش قادر... مش قادر ده كان ابتدا يتكلم ويفوق ويعرف... ده كان.

فؤاد (يقاطعه): ... ده بتاع ربنا ملناش فيه.

طاهر: طب ليه؟... طب ليه؟... (صارخًا)

فؤاد: لا إله إلا الله... مش كده ياهندسه...

(يدخل أحد عمال المستشفى.. خلاص الإجراءات خلصت لو عايزين تستلموه والعربية هتوديكم لغاية هناك)

طاهر: شوف أمي وهاتها لحسن مش قادر أبص في وشها ولا اشوف أبويا... وهات عربية...

فؤاد: أنا جايب عربيه نخلص الإجراءات وأنزلهم معايا.

(ينظر طاهر نظرة طويلة إلى الأم والأب وهما يجلسان في عربة الإسعاف التي تحمل عادلاً.. ويركب طاهر مع فؤاد وهو في حالة انهيار تام... ويدخلون إلى مدينتهم بعد أذان المغرب تقريبًا ويعلنون أن الدفن سوف يكون بعد صلاة العشاء، وتمت كل هذه الأشياء بسرعة غريبة يفاجأ بها فؤاد نفسه... حتى أن رجال الفراشة ينتهون من عملهم، ويصبح السرادق جاهزًا بسرعة غريبة... والكل في حالة انهيار وذهول من

هذه الميته السريعة والمفاجأة... لشاب في عمر عادل بمرض لعين، وبعد إجراء الجراحة له بنجاح ... ولكن الكل يعلم أن قضاء الله لا رادع فيه...

فؤاد: إنت النهارده لازم تبات معايا...

طاهر: ماقدرش أسيب أمي وأبويا لوحدهم... لازم أبقى معاهم.

فؤاد: بس انت... ماامتش بقالك يجي ثلاث أيام.

طاهر: مش مهم .. أنا بكره ولا بعده هاخذهم المنصورة عند أهل أمي يقعدوا هناك أسبوع أو أسبوعين يغيروا جو لحسن أبويا في ظروفه دي مع الجلطة اللي جتله ممكن يروح فيها هو وأمي وهبقى لوحدي. (يبكي)

فؤاد: لا إله إلا الله .. يا هندسه مش كده... خلاص إعمل اللي انت عاوزه (ماسحًا على ظهره)... يلاً بينا ناكل لقمه بقى... إنت مكلتش بقالك يومين.

طاهر: مليش نفس والله.

(بالفعل، يقوم مع فؤاد، ويذهبان إلى نفس المطعم الذي أكلوا فيه

يوم وفاة والدة فؤاد.. ويتذكر فؤاد)

فؤاد: ياه... شفت ياعم طاهر... الأيام دول ازاي؟ علشان كده لازم نسيبها على الله في المواضع دي...

طاهر: ونعمه بالله..

(يذهب طاهر مع والديه، ويعود بعد يومين، ويكون قد مر على وفاة

عادل أكثر من أسبوع)

فؤاد: إيه يا هندسه مالك؟ إنت جيت ليه بس؟
طاهر: مانت عارف الالتزامات اللي علينا قد إيه.
فؤاد: ربنا يعنا ونسد ماعلينا.

(في اليوم التالي مع أذان الظهر، يدخل محضر من المحكمة، ويبلغ طاهرًا أن البنك رفع ثلاث دعاوى قضائية ضده، وإنهاء الإجراءات فيها مسألة وقت، فلا بد من المصالحة مع البنك، أو السداد في أسرع وقت)

طاهر: شفت ياعم؟... ما حدش صابر عليا خالص..
فؤاد: طيب هتعمل إيه؟...

طاهر: لازم أمشي في اتجاهين... وملهمش تالت... السفر والبعد عن هنا بعد تأمين البيت عندنا وقبل أحكام نهائية... والحل الثاني تسويه مع البنك والتاني ده صعب أوي أديك شايف... وعارف البير وغطاه.

(ينظر بحسرة شديدة إلى الورشة، يفهمها فؤاد أن حلم طاهر بدأ في الانهيار.. وهي مسألة وقت لا أكثر)

فؤاد: ماشي أظبط كده وانزل لعلاء واشوف وصل لحد فين.
طاهر: وأنا هعمل محاولات بكرة في البنك وهشوف ممكن أوصل لإيه...
وعاوزين نخلص كل الشغل القديم ونحاول ونخلص كل الديون

بتاعة الناس فاهمني يا فؤاد؟...

فؤاد: طبعًا... إنت اتغديت ولّا جعان زيي؟

طاهر: هو حد ليه نفس؟...

فؤاد (ينادي على مصطفى): ... مسمار ... ولا يا مصطفى..

مصطفى: نعم ... هات كشري (ويعطي له الفلوس)

(يعمل الجميع في الشغل لوقت متأخر، وكان الروح قد دبت في الورشة مرة أخرى، وفي الصباح ذهب فؤاد إلى علاء، وطاهر إلى البنك.. وفي اليوم التالي يقابل كل منهما الآخر)

فؤاد: مالك يا هندسه؟ شكلك متغير.

طاهر: خلاص يا فؤاد مفيش فايده لازم أجهز نفسي وأمشي مش قابلين بأي حاجه ورفعوا قضايا بكل الشيكات القديمة والقرض الجديد عليه مشاكل... والأستاذ شوقي بيتحقق معاه.

فؤاد: الأستاذ اللي كان بيجليك بتاع البنك؟...

طاهر (ضاحكًا): ... وسمعت إن حولوه على النيابة.. وطبعًا هيقول على كل حاجه...

فؤاد: والعمل يا هندسه؟ ... ناوي على إيه؟...

طاهر: مفيهاش عمل.. لازم أمشي بس أظبط أموري أسبوعين تلاتة بالكثير... واشوف أمي وأبويا الحياة معاهم إزاي وأظبطهم مع أختي وجوزها.

فؤاد: طيب يا هندسه اصبر شويه.

طاهر: أصبر لغاية ملاقي نفسي في السجن؟ ما انت شايف البلد لا

قابضه ولا صرفه كله يشم في كله والناس الكبيرة ولا حاسة
بالناس الصغيرة.. يبقى لازم أمشي والموضوع ده محدش يعرفه
غيرك... فاهمني؟

فؤاد: عارف يا هندسه... ماتقلقش.

طاهر: إنت عارف إني مش خايف.. بس ممكن الناس تسأل واحنا
بنصفي مايحيش حد خالص معايا...

فؤاد: طبعا... معاك

طاهر: هقوم أنا أشوف واحد اسمه مجدي... يعني ليه عم بيسافر
لييا وعارفها كويس أروح أشوفه.. سلام

فؤاد: سلام.

(تمر الأحداث سريعة مع طاهر... حتى لا يعرف ماذا يفعل
وتظل مسألة السفر هي الحل الوحيد الذي لا مفر منه، وفي أقل من
شهر يكون قد هيا الجو العام لسفره... وتم تصفية كل شيء في هدوء...)

فؤاد: خلاص يا هندسه مسافر؟...

طاهر: إنت شايف في حل تاني؟... أديك شايف البلد كل يوم عن يوم
حالها بيسوء وإحنا بنعافر علشان نجيب الجنيه ويدوبك لما
تجيبه الحكومة مش بتهنيك عليه ويروح على ضرائب عقارية
وضريبة مبيعات وكهربا وتليفونات وسجل ورخصه ونظافه...
وأديك شفت أما المرحوم عادل وقع ولا مستشفى حكومي ولا
تأمين صحي إحنا اللي دفعنا كل حاجه... طيب نقعد ليه؟...

ونعمل إيه؟

فؤاد: ياه ... يا هندسه كل ده في قلبك؟

طاهر: إحنا بنحب البلد دي قوي.. بس الناس اللي ماسكنها مش حاسين
بالغلابه اللي فيها وبقوا آسيين عليهم أوي المهم ركز معايا

(أخذ طاهر يشرح لفؤاد ماذا يفعل في الأيام التالية لسفره
حتى وصوله إلى الحدود الليبية، وكذلك طلب منه أن يشكر
صديقه علاء لأنه حاول جاهدًا أن يرتب له سفرة إلى الخليج
ولكن لم تنجح الأمور؛ نظرًا للمبالغ الضخمة التي تكلف هذه
السفرة... وكذلك أوصاه بسؤاله على والديه وأخته وزوجها، وكان
هذا نهاية الحديث الذي امتد حتى الساعات الأولى من الفجر...)

طاهر: خلاص يا فؤاد أظن عرفت كل حاجة لغاية ما أوصل.

فؤاد: خلاص يا هندسه توصل بالسلامة... وأبقى طمني.

طاهر: أهم حاجة أبويا وأممي... همّا صحيح عند أختي... بس برضه
إبقى شفهم وشق عليهم وابقى طمني... وأي فلوس تجيلك
خلال الفترة الجاية زي ماقلتك.

فؤاد: عيب يا هندسه ده عيش وملح.

طاهر: وخلي بالك من الواد مصطفى مسمار.. الواد ده أصيل وجدع...
ما تبخلش عليه بحاجه وزى ما فهمتك..

فؤاد: اطمن يا هندسه والله ما تخاف.

فؤاد: أنا بعرفك علشان يمكن الوشوش ما تتقابلش تاني يبقى انت فاهم

وعارف... والمحامي... بتاع القضية أختي هتبقى تحاسبه...

فؤاد: والله ما تقلق وإن شاء الله خير...

(تظهر الدموع في عيني طاهر فجأة، ويجهش صوته بالبكاء، وينظر إلى المحل بعين الحسرة، ويردد: كان نفسي أعمل حاجه وخسرت كل حاجه... ويقوم بمعانقة فؤاد في نهاية الجلسة حتى تأتي السيارة المتجهة إلى الإسكندرية ومن هناك إلى ليبيا.. ويذهب فؤاد إلى بيته لينام... وفي صباح اليوم التالي يفعل كما كان مخطط له تمامًا... وتدور عجلة الأسبوع حتى ينتهي ومعه ينتهي كل شيء بالورشة كما هو مخطط له، ويذهب فؤاد إلى علاء مع صديقه إسماعيل إلى القاهرة، ويحكي له ماذا حدث مع طاهر بكل تفاصيله ويقضون طوال الليل يتحدثون في هذا الموضوع)

علاء: الله يكون في عونته... صحيح البلد حالتها... (مغمغمًا) في ناس بتكسب مليون جنيه في اليوم وفي ناس مش لاقية العيش الحاف.

إسماعيل: ياه... مليون جنيه... وده يتعد إزاي؟

فؤاد: ولا ياابو مخ تخين إنت مش نقصاك... قوم ياعلاء نخرج نلف شويه أنا مخنوق..

إسماعيل: يا عم الساعة داخلة على ثلاثة الصبح... ناموا

فؤاد: أنا مش جايللي نوم... هتقوم معايا ياعلاء ولا انزل لوحدي؟...

فؤاد: طبعا معاك..

إسماعيل: هنام انا...

فؤاد: ياعم اتخمد هو حد قالك تعالى.
إسماعيل: بس ابقوا هاتوا حاجه حلوه معاكم.

(يخرج علاء وفؤاد، ولكن الكلام يأخذ شكلاً آخر...)

علاء: وانت ناوي تعمل إيه بعد ما سافر طاهر؟
فؤاد: مش عارف والله يا علاء أعمل إيه ما انت عارف البير وغطاه..
علاء: ما فكرتش في القهوة بتاعة ابوك؟
فؤاد: قهوة ايه ياعم؟.. ما انت شايف البلد..
علاء: طيب إيه الحل؟... إيه رأيك تسافر الخليج؟ أنا اتعرفت على ناس
من هناك يقدروا يظبطوك على شغلانه كويسه... وهيبقى
السفر مش غالي أوي..
فؤاد: خلاص إيدي على كتفك... مع إني عمري ما فكرت في السفر بس
هعمل ايه؟

علاء: اللي فيه الخير يقدمه ربنا... المهم انت هتعمل إيه لما تروح؟...
فؤاد: مفيش.. أديني بفتح الورشة وبمشي أموري... لغاية ما تفرج... ما
تشليش هم... المهم انت عامل إيه في الوظيفة الجديدة؟...
علاء: الحمد لله... اترقيت في الشغل وأخذت شغل جديد ووضع جديد
الحمد لله.

فؤاد: الفلوس... أخبارها إيه؟... أهم حاجة الفكة.
علاء: يابني الفكه مفيش منها قلق... المهم أنا عاوز إيه.. الفلوس بعد
كده أنا مش قلقان عليها.

فؤاد: وانت عاوز ايه بقى؟... ما انت بتقول الحمد لله.

علاء: طبعًا الحمد لله... بس الطموح بتاعي معروف من زمان يافؤاد
أنا نفسي أكون رجل أعمال... وبرضه الحمد لله... المجال ده
خلاص بقى هو طريقي... بس الفرصة...
فؤاد: ربنا يكرمك... بقولك إيه ما تيجي نروح الحسين نصلي هناك
ونفطر بالمرة..
علاء: أوامرك ياباشا...

(تدور الأيام سريعًا، وبعد أقل من شهرين تكون قد أغلقت الورشة تمامًا، يتصل علاء بفؤاد ليخبره أن هناك فرصة حقيقية للسفر وعليه تدبير أموره في موعد أقصاه شهر من الآن...)

إسماعيل: طيب هنعمل إيه دلوقتي؟

فؤاد: إنت بتسألني أنا هعمل إيه؟... ما تفكر يله ولا انت لو فكرت تموت؟

إسماعيل: إنت معاك كام؟..

فؤاد: تقريبًا كده تلاته ونص... بعد كل اللي اتجمع معايا ومن البنات..

إسماعيل: يبقى لازم اشوف الحاجه كده معاها كام أو حتى نستلف الباقي.

فؤاد: ياه.. للدرجة دي إحنا كلنا مش معانا تمن فيزا للخليج؟ (ضاحكًا..

بأسى) دا حنا الحمد لله إننا بناكل وبنشرب هنا.. دي الفيزا

جاية متوصى عليها... أمال الناس الغلابة تعمل إيه لو جتلها

فيزا عاديه... تبيع كلاويها؟

إسماعيل: ياعم نلم الموضوع بتاعك وبعدين نشوف موضوع الكلاوي والقلب..

فؤاد: على قولك..

إسماعيل: إن شاء الله هتدبر... مش عاوزك تقلق وبعدين احنا لسه

مشفناش علاء.. اطمئن انت بس.. سلام.

(يتم تدبير المبلغ بصعوبة، ويسلم فؤاد على أخواته البنات قبل ميعاد

السفر، ويودع سعيد ومحمد، مشاعر مختلفة ومتناقضة.. ويلتقي بجمعة في

اللحظات الأخيرة حتى أوصله إلى المطار.. وهناك قابل علاء مع إسماعيل).

فؤاد: إيه ياولاد خلاص ولا إيه..؟

علاء: آه يدوبك...

فؤاد: كان نفسي أبقى حاجه في البلد دي... حاسس إني هامشي ومش

راجع.

إسماعيل: ياأخي ما تقولش الكلام ده.. إن شاء الله هترجع وتبقى أحسن

من الأول كمان...

فؤاد: شفت بقى قد أيه إحنا بنحب البلد دي مع إنها آسيه علينا؟

علاء: هي مش آسيه... الناس اللي ماسكنها هم اللي قلوبهم بقت زي

الحجر.. تعرف إن الخليج بقى المصرف بتاع مصر؟

إسماعيل: هو ده وقت الكلام ده؟ ... (مقاطعًا)

فؤاد: يا حمار.. علاء يقصد إنه لو مكنش فيه دول الخليج وبترول وكده

كان زمان مصر ولعت من زمان... فقر وبطاله ومحسوبيه

ومفيش منفس تاني ليها.

علاء: تسلم يا فؤاد... والله هتوحشني..

(يسلم فؤاد على إسماعيل وعلاء مودعًا إياهما بحرارة، ويركب

طائرته، لينتظره المجهول، ولكن وهو في الطائرة أخذ يتذكر لمحات

حياته منذ نعومة أظافره وصولاً إلى مرحلة الصنایع والعلاقات الغرامية،

وتذكر أبيه وأمه، ومشاهد الوفاة وكأنه أمام فيلم سينمائي، وأفاق

على صوت المذيع الداخلي للطائرة بربط الأحزمة: لقد وصلت الطائرة

إلى السعودية... وفي هذه اللحظة بدأ يتذكر نصائح علاء، وترتيب الأمر

له هناك، وعنوان الشيخ إبراهيم وتليفوناته المكتوبة في الأوراق...
ضابط المطار: هلا.

فؤاد: أهلاً بيك.

ضابط المطار: ليش جاي للسعودية؟

فؤاد: ده مش موسم حج ولا عمره... يبقى ليه؟

ضابط المطار: جوابني بوضوح. (بحزم)

فؤاد: جاي علشان اشتغل هنا (إيه المقابلة الساعدة دي)؟

ضابط المطار: مين كفيلك وين؟

فؤاد: الشيخ إبراهيم... بالرياض.

ضابط المطار: (ينظر إليه متأففاً)... يلاً بالسلامة.

(من أولها.. مقابلة زى الزفت... أمال في مصر كلهم بيتعاملوا
معاملة كويسه؟... ياه.. يا زمن فين أيام عبد الناصر؟... لما كانت كسوة
الكعبة بتطلع من مصر؟... البترول... والفلوس لعنة الله عليهم... يشير
إلى سيارة ويأخذ تفاصيل المكان الذاهب إليه ويلتقي بالشيخ إبراهيم...)

فؤاد (يذهب إلى مقر شركة الشيخ إبراهيم): ... السلام عليكم.. الشيخ
إبراهيم موجود؟...

الموظف: مين عاوزه؟... مين يبغاه؟

الشيخ: بدي أمشي الحين يا طلال.

الموظف: يا شيخ إبراهيم... شخص مصري بده يكلمك.

الشيخ: هلا بيه وبالمصريين.

فؤاد: أنا فؤاد اللي كلمك عليا علاء بتاع شركة السياحة في مصر... فاك

يا شيخ ولأ ناسي؟

الشيخ إبراهيم: فاكرو والله حد ينسى الأحباب؟ (يشير إلى الموظف طلال)
وأبغى منكم تخلصوا أوراق فؤاد الحين ويسلم عمله من باكر
بدون معوقات.

فؤاد: تسلم يا شيخ إبراهيم والله هي دي العروبة.

طلال: معي يا فؤاد..

(يتم استيفاء جميع الأوراق مع فؤاد، ويعلم من طلال أن الشيخ
إبراهيم صاحب مرض عضال، وأولاده ينتظرون موته بين الحين والآخر،
ويعمل فؤاد في محل تابع للمجموعة الاستثمارية الخاصة به، وتمضي الأيام
يتعرف فيها على مصريين موجودين هناك، هو يسكن مع مصريين).

فؤاد: أخبارك ايه يا أبو صدام (صعيدي اسمه عبد السلام شبيب، وله
اسم آخر، وكان يحب أن يُلقب بأبوصدام نسبة إلى ابنه الأكبر
الذي سماه وهو يعمل في العراق).

أبو صدام: الحمد لله تمام... هنعمل ايه بس ماهي مصر لو فيها
العيشه تمام زي هنا كان الواحد يسيب مصر ويجي هنا ليه؟
وهو الوحيد غاوي مرمطة وغربه؟

فؤاد: إنت بقالك كام سنة في السعودية؟

أبو صدام: تقريبًا ست سنين وكنت في العراق قعدت فيها تمن سنين
لكن بعد الحرب عليها أوضاعها تدهورت قمت جيت على
السعودية...

فؤاد: ومارحتش مصر ليه؟

أبو صدام: ولما انزل مصر العيال هتاكل منين؟ (صدام واخواته) ياكلوا

زلط؟

فؤاد: بس يعني الفلوس هنا والمرتبات يعني اللي بتعملوا طول السنة...

يدوبك مصاريف والشهر بتاع الاجازة وخلص على كده؟

أبو صدام: واحنا عاوزين ايه غير عيشه كويسه ونقدر نصرف على

العيال؟ تعرف يا فؤاد ساعات واحنا جايبين وراجعين على

السعودية.. بنستلف فلوس علشان نرجع تاني... ما الحاله في

مصر صعبه قوي.. قوم قوم معايا هعرفك على خليل.. واد

مصرى صعيدي شغال في المعمار بقاله ثلاث سنين مانزلش

مصر من ساعة ماعرف إن مراته ماتت. واعرفك على حسين..

ده برضه بقاله سنتين مانزلش.. ده بقى من المحلة ويشتغل

هنا بس عنده ست عيال مش مكفيهم عيش حاف ومعاه

مرة غيبه غبواه (ضاحكًا)

(يتعرف عليهم، وتنتهي الجلسة سريعًا مع أبو صدام، و خليل،

وحسين، ويذهب للنوم، يتذكر مصر وخصوصًا صديقيه.. ويتذكر

أنه لابد أن يحافظ على أمواله، ويبدأ في الادخار لأنه سوف يجلس

مدة محدودة وليس طول العمر في السعودية، وحددها بخمس

سنوات بحد أقصى... ولكن تأتي الرياح بما لا تشتهي السفن...

فبعد ثمانية شهور تقريبًا يموت الشيخ إبراهيم، ويمسك إدارة

عمله أحد أبنائه، لكنه لم يكن أي حب للمصريين، وتبدأ المواجهة

بينهما ليس معه فقط، بل مع جميع المصريين العاملين معه).

سامان: طلال ... أريد كل ملفات المصريين الموجودين بالمؤسسة.

طلال: أوامرك يا شيخ سامان.

سامان: والله عندنا عدد كبير من المصريين والفلسطينيين ومن سوريا.
طلال: تقريبًا 189 عاملاً وموظف.

سامان: بدي أشوفهم كلهم قبل... (يسكت، ويضحك بهدوء ودهاء)
طلال: إيه يا فؤاد وينك؟

فؤاد: مانت عارف الشغل بقى عامل ازاي بعد ما الشيخ إبراهيم ماتوفى..

طلال: الله يغفر له ويسامحه...

فؤاد: الخير والله قل بعد ما توفى الرجل ده... وسامان ده مسك.

طلال: لا تصيح يا فؤاد بالمكتب...

فؤاد: ياعم ما يخدش الروح إلا اللي خالقها.

طلال: تعلم إنه جامع كل العمال والموظفين العرب بكره وبعده... بده
يشوفهم كلهم... وده قلقني كثير..

فؤاد: بقولك إن الكفالة بتاعتي عند مين دلوقتي؟

طلال: كانت مع الشيخ إبراهيم... دلوقتي أكيد هتروح لسامان وما
اعتقد إن سامان يقدر على موضوع الكفالة أو يستفيد بيها...

أكيد راح يعطيها لواحد يتاجر فيها.

فؤاد: يعني ايه؟... سامان ده ممكن يهدلنا معاه هنا ويشحطنا ولا
إيه؟

طلال: ده يبقى متوقف على مقابلة بكره...

فؤاد: لا أنا لا يهمني مقابله ولا غيره أنا أهم حاجة الكفاله والفيزا
بتاعتي تبقى مع مين... بالأمانة عليك يا طلال تشوفها وداها

لمين أو هيوديها لمين..

طلال: إن شاء الله... أقوم الحين اروح اشوف الأولاد..

فؤاد: سلام...

يذهب فؤاد إلى البيت ليقضى السهرة مع خليل وأبو صدام، ويحاول

عدم التفكير فيما سوف يحدث غدًا).

علاء: ألف مبروك يا ابن الذين... ناوي تسميه إيه؟..

إسماعيل: الله يبارك فيك... (يقبله)... محمد ابويا اللي اختار الاسم...

تعرف يا علاء كان نفسي الولا فؤاد يبقى هنا والله وحشني

خالص .

علاء: ومين سمعك والله وحشني انا كمان... هو انت ما عزمتمش اخواته

محمد ولا جمعة؟

إسماعيل: والله عزمتمهم وسبت خبر كمان في بيت اختهم قتلهم عقيقة

ابن اسماعيل وعازمكم..

علاء: يا أخي سبحان الله إخواته دول مش زيه خالص..

إسماعيل: مش محمد ده اللي جاي؟

علاء: آه والله هو..

(يسلم محمد على علاء وإسماعيل، ويجلس معهما خمس دقائق)

فقط، وبعد أقل من ساعة يحضر جمعة، ويجلس أيضًا نحو عشر دقائق،

ويسلم، ثم يمضي).

إسماعيل: ما تبات معايا النهارده..

علاء : لا يعم اخاف. (ضاحكًا)

إسماعيل: وانت ايه مش ناوي ولا إيه انا حاسس إن الأمور ابتديت
تمشي معاك.

علاء: الحمد لله.. في حاجة شفتها كده وتقريبًا هي الإنسانة الي بدور
عليها..

إسماعيل: طمني.. حلوه؟

علاء: يله ماتبقاش رخم إنت بقيت صاحب عيال وزى ما انت؟ .. بقولك
لسه انا لو فيه حاجه هحكي لمين يعنى؟... سلام يارخم..

إسماعيل: طمني عليك لما توصل بالسلامة.

علاء: إن شاء الله.

(يقف طلال عند مدخل الباب، ويدخل عشرون شخصًا إلى مكتب

سالم... وبعد دقائق يخرجون)

طلال: إيش الأخبار؟

فؤاد: بص يا طلال زي مش كل المصريين كويسين وجدعان برضه في

السعودية وغيرها... وأنا مش عاتب عليه ولا على غيره أنا

عاتب على بلدنا... ومش على بلدنا كمان... على الناس الي

واكله بلدنا.

طلال: إيش بتقول؟...

فؤاد: لا الموضوع ده مالکش فيه... المهم الكفالة عند مين دلوقتي؟

الكفالة بقت هي مربوط الفرس.

طلال: عند واحد اسمه بدر... بس أجارك الله منه... لا يعرف دين ولا

مله...

فؤاد: طيب عمومًا أقابله وارتب معاه...
طلال: لا تروح لوحدك... خدني معك... أطيّب الأمور.
فؤاد: ماشي يا عم طلال... اللي فيه الخير يعمله ربنا.

(ويذهب فؤاد مع طلال عند بدر، ويكون اللقاء كما
توقع طلال... ويمضي عام آخر، يتنقل فؤاد في عدة أعمال،
من بائع في كشك للدواجن في الصحراء، إلى عامل يومية، إلى
صبي نجار مسلح، أي شيء ليقربه من الرجوع، وتكوين مبلغ
يعوضه عن سنوات الغربة عن مصر التي اشتاق إليها كثيرًا..)

أبو صدام: إزيك يا أستاذ فؤاد؟... أمال إيه الغيبه الطويله دي؟ يجي
بقالك شهرين ماحدث شافك... عامل إيه؟
فؤاد: الحمد لله... إنتو واحشني كثير جدًا... أمال فين الرجاله؟..
واحشني والله برضه ...
أبو صدام: دول نزلوا مصر بقالهم أسبوع أو عشر تيام مش قاعد غير
القحف ده (يشير إلى خليل).
فؤاد: وانت عامل إيه ابو صدام؟

(يدخن أبو صدام شيشته، ويبلغه بما تم خلال الفترة الماضية، ويحكي أبو صدام أن هناك امرأة ذهب إلى بيتها ليقوم بعمل المرمت في بيتها، لكنه لم يذهب؛ لأنه أحس بالغدر في نبرات صوتها).

فؤاد: وحلوه يا ابو صدام؟

أبو صدام: ياالله... ملكة جمال اللي يخرب بيت أبوها.

فؤاد: ومارحتش ليه؟

أبو صدام: ماليش فيه.. وبعث القحف ده... (يشير إلى خليل.. ضاحكًا)

(يقضون الليل في حديث طويل، وينتهي اللقاء بين أبو صدام وفؤاد، بوعد من فؤاد بتكرار الزيارة، حيث أصبحت الحياة بالسعودية مليئة بالضغوط والالتزامات، وأصبحت كثيبة بعد نقل الكفالة... وكذلك الانتقال من وظيفة إلى أخرى، وأحس كل منهما بأنهما لم يفعلوا شيئًا، بل يريدان الاحتفاظ بمبلغ قد يكون نواة لأي مشروع بمصر... ولكن ماذا يفعلون؟... ويسلم على أبو صدام ويتركه ويذهب إلى سكنه... وأخذ يفكر في كلامه مع أبو صدام وهو مستلقى على سريره... ولم يفق إلا في اليوم التالي وهو ذاهب إلى عمله...)
(علاء بمطار القاهرة... ينتظر وفدًا من رجال الأعمال من المتعاقدين مع الشركة التي يعمل بها... حيث يلمح نهال، مضيقة الطيران التي أخبر إسماعيل... وجلسا في كافي المطار يتحدثان...)

نهال: علاء بجد أنا عارفه ده هيكلفك كثير دلوقتي...

علاء: أنا عارف.... ومفيش حاجه تغلى عليكى... ماتقلقيش..

نهال: كفاية إني بحبك وانت ظروفك... دلوقتي مش..

علاء: .. بتحبييني يا نهال؟

نهال: إنت لسه بتسأل؟

علاء: خلاص بقى.. أنا رتبت أموري... وأناعلى معادي وجاهز من النهارده.

(يظهر على وجهها علامات الخجل)

(تدب الخلافات بين الكفيل وفؤاد، ويقوم بتغييره بين أكثر من عمل)

فؤاد: إيه؟ أروح لبلد بينها وبين البلد اللي أنا فيها ميت كيلو علشان اشتغل في قهوة?...دانا قهوتنا في مصر ما رضتش افتحها آجي

هنا واشوف الأمرين علشان برضه اشتغل في قهوه؟

بدر: والله ده الشغل الموجود... الحين... وليش بتكلم هيك... ما أنت

كنت في النادي الصحي ومااشتغلت أكثر من ثلاثة أسابيع..؟

فؤاد: أنا لو كنت اعرف قبل ما اروح هناك إيه اللي بيحصل ما كنتش

رحت أساسًا... الحمد لله ربنا سترها معايا.. وانت عارف

النوادي الصحية بتعتكم بيحصل فيها إيه..

بدر: ... (بطريقة صارخة)... بدك تروح ولا ايش؟

فؤاد: هاروح. وعلى فكرة ده مش خوف منك أو سيطرة ده بس علشان

في مصر ما يقولوش عليا بايظ وفشل في مصر وبراهها ومعرفش

حتى يجيب فلوس الطائرة ... وعمومًا اسأل على مصر

كويس... أيام زمان... أيام الملك وعبد الناصر كانت بتعمل إيه

مع السعودية ومش السعودية بس.. كل البلاد العربية علشان
تبقى دول كويسة وتتحرر من الاستعمار والعبودية لولا البترول
يا...

بدر: إيش الكلام... بدك تروح ولا إيش؟
فؤاد: ... (بطريقة مضايقة صارمة)... هاروح

(يعمل فؤاد في الكافي مدة قاربت أربعة أشهر، وهو يحس بالضيق
والممل من حياته كلها... وفي إحدى الليالي الشتوية الطويلة.. يجلس على
سريره ورأسه معلقة بالسقف ويفكر.. إنه قد قارب على الثلاثين ولم يفعل
أي شيء، ويتذكر والده وأمه وأصدقاءه وفجأة! يرن التليفون لسمع صوت
أبو صدام).

فؤاد: ألو... يا أبو صدام ... خير؟
أبو صدام: حسين تعيش انت يا فؤاد... ومش خابر اعمل إيه؟...
فؤاد: ساعه بالكثير وأكون عندك..

(يخرج فؤاد مسرعاً... ويلقي بنفسه في أسرع مواصلة متجهة ناحية
الرياض)

أبو صدام: الحمد لله إنك جيت بسرعة (باكيًا) مش عارف أعمل إيه
ولا اسوي إيه...

فؤاد: مفيش حد اتصل بالسفارة بتاعة مصر في الرياض؟...
سلامة: أنا رحتمت ولسه جاي من هناك... مفيش حد عمل أي حاجة.

أبو صدام: سلامة... سباك معنا من المنصورة (وهو متأثر...)

فؤاد: إيه اللي حصل هناك؟

سلامة: مفيش دخلت قلت عاوز أقابل السفير... قالولي سفير إيه يا جدع انت؟... إنت كبيرك تقابل السكرتير الثالث ولأ الرابع.. المهم دخلت لواحد هناك... قابلني مقابلة بايخه... وقالى إنت اتأكد من موته؟... قتلته لو متأكدتش كنت جيت هنا؟... يا باشا مات واكثر من دكتور قال الكلام ده... رد عليا وقالى.. طيب عاوز إيه؟... قتلته بلده أولى بيه.. ياريت ترجعوه مصر يدفن عند أهله.. قالى العملية دي مش سهله وتتكلف كثير... يمكن في حدود عشرين ألف وإشي فحم حجرى وأبصر إيه وعريية موتى وصندوق... قالى فكر وابتعت لأهله يدفن هنا ولا بيعتوا فلوس..

فؤاد: إيه الكلام اللي باسمعو ده؟... مش معقول ... مش معقول مصر تعمل في ولادها كده...

أبو صدام: يا ولدي مش مصر... الناس اللي في مصر.

فؤاد: طيب هنعمل إيه دلوقتي؟ أنا مش معايا إلا 3200 ريال

أبو صدام: وأنا 1700 ريال

سلامة: وأنا 1400 ريال ... ما انتو عارفين كل ما بنجمع قرش يدوبك بنبعته للعيال في مصر.

فؤاد: طيب هنعمل إيه ونجيب الباقي من فين؟... تقريباً لسه خمستاشر ألف ريال ... الموضوع صعب أوي..

سلامة: المشكلة إن المصريين اللي هنا محدش هيدفع فيهم مش زي

السودانيين ولا الصوماليين ولا الهنود حتى... محدش هيفكر في
اللي مات.

أبو صدام: (باكيًا) صحيح يا سلامة... حسين كان غلبان وما يستهلش
يموت في الغربية بعيد عن أهله وناسه وعياله... في شرع مين
ياولاد؟

فؤاد: وحد الله يا أبو صدام... هنعمل إيه بس؟... الوقت بيمر ولازم
يدفن ماننت عارف... إكرام الميت دفنه.
سلامة: هو ده الكلام المظبوط يا فؤاد... ونبلغ أهله ده ميت بقاله يجي
سبع ساعات..

فؤاد: خلاص الساعة دلوقتي خمسه ونص على الساعة تمانيه نتصل
بأهله.. ونعمل اللازم...
أبو صدام: مفيش حد هيغسله غيري... (باكيًا بحرقه)
سلامة: هو ده الموت وخراب الديار.
فؤاد: معلش يا سلامة لازم نتماسك... وانت تكلم أهله..
سلامة: حاضر يا فؤاد... الله يرحمك يا حسين..

(تمر جنازة حسين سريعة ومتلاحقة، ولا يتحدث فيها شخص أو
يتحرك فيها شيء، ولكن يشعر فؤاد بشيء يتحرك في داخله بعد كل
هذا التعب، وكل هذا الشقاء يموت الإنسان غريبًا عن وطنه بعيدًا عن
أهله؟... وهل سيجد أناسًا يقومون بتغسيله وكذلك سيجد من يصل
عليه الجنازة؟.. أم يكتفون بإلقائه في حفرة وشكرًا لحسن تعاونكم؟
كل هذه الأفكار جرت بدماع فؤاد.. وبعد موت حسين بشهرين،

أصبحت حالته النفسية لا تطاق، وأصبحت الجلسة الأسبوعية مع أبو صدام، وسلامة، وخليل، هي الفاكهة الوحيدة له، وهي التي تجعل الأيام الثقيلة تمر خلال هذه المرحلة.. وكانت هذه الجلسة بينهم).

فؤاد: يا أبو صدام أنا تعبت مش قادر... خلاص.

أبو صدام: يا ولدي إنت بتقول ما كملتش ثلاث سنين وانت يدوبك خلصت ديونك ومعندكش حتى عشر تلاف جنينه يعني لو رحمت مش هتتجاوز ولا تعمل مصحلة.

فؤاد: بص يا أبو صدام... طول ما انا قاعد هنا مش هقدر اعمل حاجة خلاص زهقت... إنت بكره لو فاضي تيجي معايا نروح البنك أحط الفلوس دي وأحولها على مصر...

أبو صدام: طيب والكفيل بتاعك لو عرف انك صفيت حسابك في المصلحة اللي انت فيها مش هيحصل كويس وأكد هيعرف في نفس اليوم.. يا ولدي هنا ما بستخاش حاجه.

فؤاد: أنا مستعد لأي حاجة وبعدين لسه لي في الشركة تقريبًا عشر تلاف ريال كتبت ورقة باسمك هناك وطلال قالي بمجرد ما يوافق عليها سالمان هبعثها لكم وبقالهم يجي أربع شهور لما يحن علينا سي سالمان.

أبو صدام: اللي فيه الخير يا ولدي يعمله ربنا..

(فرح علاء... في إحدى قاعات أحد فنادق القاهرة الفاخرة)

إسماعيل: ياد مش قادر تستني صاحبك؟... طيب انا حمار وانت...

علاء: لم نفسك يا ابن البلغه (هامسًا في أذنيه)... إنت في فرح ولاد ذوات
هنا مش في البلد.

إسماعيل: (ضاحكًا) ... تدفع كام وأنا اسكت؟

زوجة علاء: إزيك يا اسماعيل؟ علاء حكى لي عليكم كتير انت وفؤاد.

إسماعيل: ده بس من ذوقك... والله علاء ده ابن حلال مصفي واحنا
اخواته بالظبط.

زوجة علاء: وأنا اختكم برضه... مفيش فرق.

إسماعيل: ده بس من ذوقك ...

علاء: ما تخلص بقى يا ابن العبيطة عاوزين نكمل الفرحة..

إسماعيل: خليني واقف جنبك شويه... الحريم الحلوه كلها بتيجي تسلم
على مراتك... أنا مش عارف استعجلت واتجوزت ليه بدري؟..
جتنا نيله في حظنا الهباب..

علاء: غور يا ابن الفقرية اقعد جنب مراتك... خلي الليلة دي تعدي على
خير..

إسماعيل: (مغمغمًا) جتنا نيله في حظنا الهباب (يذهب إلى البوفيه،
وتذهب معه زوجته...)

(فؤاد في الشركة...)

فؤاد: بص يا بدر أنا مش عاوز اشتغل... خلاص تعبت من هنا... تعبت
من السعودية كلها من الخليج كله... الراجل اللي انا جيت
عليه مات والله يرحمه... يعني مفيش حاجة تخليني أقعد
في السعودية حتى المصريين يموتوا قدام عينك ومش قادرين
حتى نرجعهم مصر.

طلال: كل الكلام ده زين... طيب دلوقتي إنت كفالتك مع الشيخ سلطان.. شيخ من الشرقية وهو من اليوم يتصرف معاك.. مافي كلام مع الشيخ سالمان.

فؤاد: بص يا بدر... لا شرقية ولا غربية... أنا كان نفسي اعمل حاجه من زمان... هاسألك سؤال واحد وعاوز إجابته... الباسبور بتاعي فين يا بدر؟... يا شيخ بدر؟

طلال: الباسبور تبعلك الحين مع الشيخ سلطان... فؤاد: يعني الباسبور معاه والكفالة؟.. يا أخي إحنا لو عبيد مش هيتعمل معاناه كده. طيب (ويقترب منه) بص بقى قولي... هو الشيخ سالمان في مكتبه؟..

بدر: موجود... بس ليش بتسأل عنه؟

(يدخل فؤاد مباشرة إلى مكتبه ويشتبك مع سالمان.. يستدعي الأشخاص في مكتب بدر الشرطة... وتقوم بحجز فؤاد في غرفة أنيقة مفروشة، ولها حمام أفرنجي... مراعاة للأدمية. وبعد خمسة أيام تقريباً.. يزوره أبو صدام هناك).

فؤاد: إنت عرفت ازاي إني أنا هنا؟

أبو صدام: أنا عرفت من تاني يوم.. بس ما قدرتش أجيلك إلا اليوم.. اعذرني يا صاحبي... إنت عارف الإجراءات هنا.

فؤاد: ولا يهملك أنا متعود على كده... تعرف يا ابو صدام إن السجن هنا أحسن كتير من بره؟...

أبو صدام: ياراجل ده كلام؟ السجن سجن برضه.

فؤاد: والله يا ابو صدام زي ما بقولك... المهم زي ما اتفقنا.. لإني أنا لو اترحلت لمصر تبقى تبعت الفلوس اللي عند سالماني وكمان تروح السكن عندي أنا عاين ثلاث تلاف وربعمية ريال في الدرج بتاع الدولاب.. ومفتاحه اهو.. هو مفاتيح الشقة والأوضة... أمانه عليك ماتنسى ده تمن غربة وعذاب التلات سنين دول مفيش حاجة غيرهم.. لا قدامي ولا ورايا.. والحمد له إني سديت بتاع الناس.

أبو صدام: يا أخي إن شاء الله تخرج من هنا.. فرجه قريب.
فؤاد: إنت بتهرج؟ مصري يضرب سعودي ويخرج بسهولة كده؟ ... ده لو في مصر مش هيحصل.. أنا برضه اللي هتنتفخ... بس لو انا السعودي.. يبقى ماشي..
أبو صدام: بتقصد إيه؟..

فؤاد: لا ولا حاجة.. المهم زي ما اتفقنا في أسوء الظروف انت عارف هتعمل ايه.. والعنوان بتاعي معاك.. متنساش يا ابوصدام مفيش حد ائتمنه غيرك يا أبو صدام..

أبو صدام: إن شاء الله ما تقلقش.. إنت مش عايز أي حاجه؟. أنا جيت لك سجائر وسبتلك فلوس في الخزنة.

فؤاد: والله يا ابو صدام ملهاش لازمة أنا عايش في السجن... أحسن ما كنت عايش بره... آكل بمواعيد وأشرب بمواعيد والنوم بميعاد والمطرح متوضب وآخر فل...

أبو صدام: إنت علشان بقالك لسه فترة قريبة.. لكن لما تقعد فترة طويلة وتحس إنك محبوس ومالكش ذنب مش هتعرف تنام..

عمومًا أقوم انا.. إنت مش عاوز حاجه ياولدى؟...

فؤاد: لا ياابو صدام مع السلامة..

(تمر الأيام يومًا بعد يوم، أسبوعًا بعد أسبوع، ولا يشغل بال فؤاد إلا ذكرياته عن وفاة والده ووالدته، وأصدقائه وإخوته، ظل يسترجع كل هذه الأحداث ويقلب فيها، ويحاول أن يعرف الصح من الخطأ... واستقر على رأي واحد.. يعود إلى مصر ويستقر بها حتى ولو أفرج عنه، ويفكر في الزواج والحياة المستقرة وهو عنده القدرة على فعل ذلك بمصر... إذن فلماذا الغربة؟... ولماذا الشقاء في بلاد الغربة؟... بعد مضي حوالي شهرين، بدأ يشعر فؤاد بضيق السجن وعذابه وأنه محبوس، ولم يرتكب جريمة، وعلم أنه لا بد من أن يتم الستة أشهر حتى يخرج... وسوف يتم ترحيله بعد ذلك، وتمر الأيام، ويذهب أبو صدام لمقابلته مرة أخرى...)

فؤاد: بص ياابو صدام... زي ما فهمتك..

أبو صدام: خلاص والله فهمت وأنا هعمل إيه بس أنا هتصل بالأستاذ علاء صاحبك وأقوله فؤاد هيترحل يوم كذا مفيش مشكلة...

خلاص.. إنت فاكرني اهيل؟ أنا صعيدي صحيح بس واعى..

فؤاد: علشان لما ارجع مصر يا ابو صدام ما تنفخش... مانت عارف.. لما بنترحل.

أبو صدام: يا سلام يا ولاد الواحد خايف من بلده... أكثر من بلاد الغربة.

فؤاد: هنعمل إيه بقى يا أبو صدام... ما انت عارف سلومة الأقرع ما

يعرفش أخوه (ضاحكًا مع أبو صدام)

(يتصل أبو صدام بالأرقام التي أعطاها له فؤاد.. وينجح بالاتصال بعلاء..)

علاء (يتصل تليفونيًّا):.. إسماعيل إنت في البيت؟.. طيب أنا مسافة السكة وأكون عندك.

إسماعيل: فيه يا علاء؟.. فيه إيه مش عوايدك تتصل قبل ما تيجي البيت... ده بيت أخوك..

علاء: ياعم ارحمني خليني اقولك الكلمتين وارتاح.

إسماعيل: فيه إيه يا علاء؟.. قلقتنى.

علاء: واحد اتصل من السعودية اسمه أبو صدام.

إسماعيل: فؤاد جراه حاجة؟

علاء: ياعم اهدا... فال الله ولا فالك قال إن فؤاد محبوس وهيطلع من السعودية آخر الأسبوع مترحل على مصر.

إسماعيل: مترحل؟.... يانهار ازرق... يا ترى عامل إيه دلوقتي يا فؤاد؟

علاء: أنا عمومًا هشوف جاي إمتى وأحاول اعمل اتصالات علشان

مايتهدلش لما يرجع.. المهم هو قالي انه مش عاوز اخواته

تعرف.. فاهمني.. يعنى أنا اعرف بس هيجي على ميناء

السويس ولأ ميناء سفاجا ولازم يانا يا انت نبقى في انتظاره..

إسماعيل: خلاص أنا هفضي نفسي الأسبوع الجاي ماتقلقش انت.

(يمضي أكثر من أسبوعين حتى عبر فؤاد إلى أرض الوطن مرة أخرى

ولكن مرحلاً عن طريق البحر)

فؤاد: يا اخوانا مش كده.. أنا برضه مصري يعني بلاش المعاملة دي...
دي الكلاب اللي جايا معايا بتتعامل أحسن مني..

صول: اخرس بقى ونام على طلعت النهار هنكون في مصر... إهدى
كده .. ولا تحب نسهر عليك؟

فؤاد: طيب ما تفك الحديد... لو المركب غرقت... مش هعرف حتى
أتنفس.

الصول: أحسن علشان تريحنى منك..

(بعد يومين من المعاناة، يصل إلى السويس، ويتم إدخاله مكتب أمن
الدولة بالسويس، فرع الميناء)

صول: خش يا خفيف... بسرعة..

فؤاد: براحه يا عم إنت بتزق في طور؟

أمين الشرطة: إنت بهترج يله ولأ إيه؟... ده انت أيامك غيره.

فؤاد: ياعم معدتش فارقة... أهى كلها أيام.

صول1: خف ياروح أمك... (ويبدأ العقق)

إسماعيل: إيه ياعلاء... فؤاد فين؟... إنت مش قلت إن المواضيع تمام

وأنت ظبطها في سفاجا والسويس؟

علاء: أنا ظبطت كل حاجة في سفاجا... حسب المعلومات اللي جت على

العبارة بتاعته.. بس للأسف العبارة راحت على السويس...

علشان العبارة اللي غرقت وأهالي الناس اللي هناك عاملين

مشاكل في سفاجا... ونزلت هناك بقلها أكثر من يومين...

إسماعيل: الواد فؤاد ده فقري واسمه رزق.. زمانه اتهرى..

علاء: حتى الناس اللي عارفهم محدش فاضي تكلمه حتى... حظه كده
بقى... لازم نستنى ونشوف هنعمل... الناس اللي كلمتهم ...
قالوا مفيش أي بيانات عليه... وأساسًا ممعشوش باسبور...
تقريبًا الراجل اللي هناك... قطع الباسبور بتاعه...

إسماعيل: يا نهار اسود... إيه الجبروت ده؟

علاء: يابني الفلوس بتقوي... وبعدين عارف إنه مش هيواجه أي
مسئولية... يعمل بقى اللي هو عاوزه.. المهم هو دلوقتي لازم
يدخل أمن الدولة ويترحل على القاهرة وبعدين يجي على
هنا... عمومًا انا هتصل بالناس اللي عارفهم.. مع إن الناس
دي.. الواحد بيتلاشها.. بس الظروف.

إسماعيل: وله يا علاء انت مش بتقول إن أخو مراتك عقيد؟...

علاء: انت اهبل ياله... عاوزني أقول لأخو مراتي... إن صاحبي محبوس
في أمن الدولة؟ إنت اهبل؟ ... صحصح دول ناس ليهم مستوى
تفكيرهم... غير لحمة الراس اللي عندك... سلام.

(بدأت آثار الضرب على وجه وجسد فؤاد.. يدخل مع محبوسين

آخرين بالزنزانة)

فؤاد: آه ... ياولاد الكلب... إنتو مش بني آدمين لو كل واحد يخش عليه
لوحده... راجل لراجل أنا كنت ظبطتكم... نفسي أشوف حد
منهم بره... (يتحسس جروحه)

مسجون1: دول ما بتشفهمش غير هنا... وبالليل بس زي الخفافيش... ما
يقدرش يواجهوا ضحاياهم ...

فؤاد: (بتأوه .. آه ... آه ...) مش شايف... إنت بقى اسمك إيه؟...

مسجون1: زكريا السيد حسين... مهندس مدني...

فؤاد: مهندس... وعاملين فيك كده؟... (ضاحكًا) أنا بعرف إن بتوع

هندسة وطب يجيبوا درجات أعلى من ظباط الشرطة.. يعني

المفروض ليك احترامك يا هندسه...

مسجون2: ما هو اتخانق معاه علشان كده... (هاها...)

فؤاد : وأنت؟

مسجون2: أنا مجدي بقطر.

فؤاد: إنت مسيحي؟...

مجدي: أيوه ... مسيحي ... هي مشكلة؟

فؤاد: لا.. أنا عارف إن أمن الدولة كان بيشغل على الإخوان.. الجهاد ...

يعني.

مجدي: (ضاحكًا) تقصد المسلمين بس؟ ...لا وكل الأشكال اللي ليها في

السياسية... بس الموضوع مش كده..

فؤاد: يعني ... أصل انت يعني شكلك مش بتاع بهدله ولا سياسه..

مجدي: لا كل مشكلتي... إنني كنت في العراق عملت هناك فلوس

كثير وفيلا وتقريبًا استقرت 12 سنة هناك... وفجأة حصل

موضوع الكويت ده والحظر... وفجأة حصلت الحرب الثانية

لاقيت نفسي مطارده من السلطات العراقية وقعدت مستخبي

من حته لحته ومن دوله لدوله تركيا سوريا الاردن السعودية

لغاية ما وصلت هنا ومش عارف إيه اللي هيحصل... بيقولني

إني كنت تبع حزب البعث.. طيب مالعراق كلها كنت بعث.

فؤاد: يعني موت وخراب ديار... وانت يا هندسه مشكلتك إيه بقى... ؟
المهندس زكريا: مفيش.. أنا كنت في قطر... كل اللي عملته ضربت المقاول
اللي كنت شغال معاه هي دي كل القضية..
فؤاد: تترحل وتتعامل معاملة الكلاب دي علشان خناقة عادية؟ وشوف
باقي البجاجة... ما هو كل أسبوع في الصيف عندنا في مصر..
يضرَبوا خمسة أو ستة ويرجعوا بلادهم معززين مكرمين
ويمكن في طيران خاص كمان.
المهندس: يا عم فؤاد... إحنا رخصنا على نفسنا علشان كده هما
استرخصونا ومش هما بس العالم كله..
مجدى: على رأيك... أنا أقلهم أنا مش في حزب البعث... بتاع العراق ولا
عمري شفته... يقولولي أبدًا... قتلهم كل واحد دخل العراق
وقعد هناك أكثر من ثلاث سنين ضموا لحزب البعث إجباري
علشان الحرب... وهما عارفين بس لازم يعملوا كده..
المهندس: عارف فاكروني بالسادات أيام زمان... لما كان عبد الناصر عامل
الاتحاد الاشتراكي ولازم الشعب كله يكون فيه... وبعد ما مات
عبد الناصر حبسوا الناس اللي كانت فيه وبعدين عملوا
الحزب الوطني وهكذا... والناس مصدقه وخلص.
فؤاد: يا أخي الواحد بيستغرب على البلد دي ماشيه إزاي مش عارف
يعمل إيه بس..

(يدخل في هذه الحالة بعض الصولات ويقومون بعمل اللازم معهم
من أنواع التعذيب البدني...)

مجدي بقطر: يا أخي تقول ايه بس دي مش إيدين بني آدمين... دي
خف جمل..

فؤاد: الله ينتقم منهم مش عارف ليه بيعملوا فينا كده.... صحيح أمال
المهندس فين؟

مجدي: أكيد اترحل على مصر... ما هو لازم يخرج من هناك عقبالنا...
تبقى تزرنى لما تخرج من هنا.

فؤاد: لما اخرج؟

(يدخل شخص، ويقوم بوضع كيس من القماش على رأس فؤاد حتى

لا يرى)

الحارس: هتدخل على الباشا دلوقتي... البلاطة اللي هتقف عليها..
متتحركش مللي من عليها... والرد على قد السؤال... فاهم

ياخفيف؟

فؤاد: فاهم ياعمنا.

(يدخل على الضابط بعد استئذان الحارس)

الضابط: اسمك إيه؟

فؤاد: ياباشا ما هو كل شيء مكتوب عند سعادتك... وانا تعبت من

الكلام والسلام الي عمال بنزلها واطلعها أعمل ايه تاني بس
ياباشا؟ ياباشا أنا مش حرامي ولا إرهابي ولا عملت حاجة
خالص أنا اتخانقت مع الكفيل بتاعي لإنه بيمص دمي
ومش دمي لوحدي مصريين بالهبل هناك ومش المصريين بس
وجنسيات تانيه كمان... وبعدين ياباشا دي خناقة يعني في
الآخر... مش أكثر

الضابط: وموضوع الباسبور بتاع سعادتك...

فؤاد: ياباشا واحد اتخانقت معاه... وضربته مش لازم يئذيني. ياباشا
تخيل نفسك انت هناك كنت هتعمل ايه؟
الضابط: خلاص بقى يله...

(ينادى للعسكري... رجعه الحبس تاني.. يتحدث الضابط في
التليفون... ياباشا الولد شكله تمام وكل المعلومات التي جت عليهم
تمام... خلاص ياباشا تمام... أوامر معاليك... يترحل بكره على القاهرة...)

فؤاد: ايديه ياأخي عمله زي الكوريك.

مجدي: معلش أهي أيام وتعتدي... وبعدين هنعمل ايه؟

فؤاد: تعرف ياأخي الي مخلي نفسي صعبانه عليا... هو إن الواحد
بيحصله كده في بلده ويتعامل المعاملة دي لكن بره... كان
بيتعامل أحسن معاملة حتى وهو مسجون أنا قعدت يجي
ست شهور في السجن هناك محدش مد إيديه عليا مع إني
كنت ضربت الرجل بتاعهم... ياه... بقلك ما تحكيالي ايه الي
حصل بعد كده معاك؟

مجدي: العراق... شفت خير هناك يافؤاد ...

(وأخذ يحكي له عن أيامه في العراق.. وفي الصباح.. يصطحبه صول

ميري..)

علاء: يا باشا والله الولد كويس جداً. (يتحدث من التليفون)

اللواء: بص ياعلاء... أنا لو مش عارفك كويس... مكنتش قلتك حاجة
من الأول... بس دلوقتي أطمئنك وأقولك إن الولد تمام المسألة
كلها مسألة وقت مش أكثر..

علاء: ربنا يخلي معاليك يا افندم... تأمرني سعادتك بحاجة؟... أوامرك
يا فندم ... والله جميلك مغرقاني يا افندم ... سلام يا باشا..

(أما ضابط المباحث في قسم الخليفة... في القاهرة)

فؤاد: يا باشا.. سعادتك من ساعة ماجيت مصر وانا بلف من حته
لحته ومن سجن لسجن... ياباشا أنا مش قاتل ولا جاسوس
ولاحرامي حتى... كل اللي حصل خناقة ما بين اتنين... ياباشا في
بلدهم هناك معموش معايا كده.. حرام كده ياباشا.

الباشا : وإيه اللي عرفنا... ما يمكن انت مدسوس علينا ولا جاسوس ولا
إرهابي... هه؟

فؤاد : ياباشا مش فيه حاجه اسمها تحريات المباحث.. يعرفوا إمتى
خرجت من البلد ورحت فين وشكلي واسم امي واخواتي
طيب سعادتك بالعقل كده... لو انت دخلت على اخواتك

وهما مش اخواتك ايه اللي يحصل؟... ياباشا الموضوع منتهي

وبعدين مش فيه بصمات وفيش ولا إيه ياباشا؟

الباشا: مش يمكن جماعه ولا حاجه قادره يربطوا دماغك على تنظيم أو حاجه معينه بره؟...

فؤاد: ياباشا أنا أبويا كان قهوجي... وانا كنت بشتغل معاه واترمطت ما بين الشغلانة دي ودي ولفيت وقريت... يعني صعب قوي اللي حضرتك بتقوله... وبعدين سعادتك ما انا جوا البلد... هو انتو لو عازين تجبوني كل يوم حد يقدر يقولكم حاجه ده لو كل ساعة .. مفيش مشكلة يعنى سعادتك..

الباشا: طيب خلاص... يا فؤاد... إنت هتترحل بكره على مركزك... بس اعمل حسابك إنت تحت المراقبه..

فؤاد: ياباشا إحنا طول حياتنا... تحت المراقبه

الباشا: تقصد ايه؟

فؤاد: لا انا بقصد سعادتك إن ربنا شايف ومطلع...

الباشا: عسكري... خده على الحجز.

(يخرج فؤاد من القسم، ويجد في انتظاره أصدقاءه.... يسلم عليهم
بحرارة.. ويأخذه إلى بيته في سيارة علاء، وتمضي الأيام سريعًا.... ويفتح
فؤاد... إخوته)

جمعة: يا فؤاد يا أخويا... أنا عرفت سكتي خلاص شوف انت عاوز تعمل
ايه وناوي على إيه?... أنا خلاص السواقة دلوقتي هي كل
حياتي ورزقي وأكل عيشي... وشوف يا أخويا اللي انت عاوزه
ايه...

فؤاد: أنا مش بقول إني آخذ نصيبكم ولا حاجه.. أنا بس عاوز كل شيء
يمشي تمام في الإجراءات والترخيص والكلام بتاعنا ده... تعرفوا في
السعودية مفيش حاجة اسمها تقديم ملفات في كل حته كده
... انت بتروح البلدية وهي بتخلص كل حاجة في أسبوع بالكثير
... انا تعبت ما بين كهرباء وتأمينات وصحة علشان كده ... انا

عاوز اخلص الحاجات كلها

محمد: خلاص شوف الي عاوزه ايه... واحنا نعمله...

فؤاد: يبقى خلاص... توكلنا على الله

يبدأ فؤاد، ويساعده أخوه الكبير محمد في محاولة تجديد مقهى

والدهم القديم، ويأتي أصدقاء الطفولة)

إسماعيل: والله ياله واحشني قوي... ليك وحشه والله يا فؤش.

علاء: والله العظيم مصر كلها كان طعمها متغير مفيش غيركم بيهون

عليا... محدش اقعد معاه وأفضض غيركم وابقى مرتاح وانا

بتكلم معاهم.

فؤاد: وانتو والله... والبلد مع إنها قاسية قوي دلوقتي بس والله مشفت بلد أحسن منها ولا من عشرت ناسها.

(وأخذ الثلاثة يتحدثون عن ذكرياتهم ومواقفهم خلال السنوات الماضية... وتحدثوا عن زواج علاء من المضيقة، وكذلك تكوين مكتب سياحة صغير، وكذلك أبناء إسماعيل وتفكيره في السفر إلى الإمارات، وكذلك فؤاد في تفكيره وفتح مشروع المقهى، ولكن بنظام جديد وعلى أساس الإمكانيات المتاحة واتصاله بأبو صدام لإرسال الأموال الباقية معه من حسابه السابق في السعودية وبدأ فؤاد في تجهيز المقهى وإنهاء إجراءاته وخلال شهرين يتم افتتاح المقهى ويكون أبو صدام قد أتى من السعودية للافتتاح ويذهب إلى بلدته بعد ذلك وتمضي الأمور في المقهى..)

زبون1: أنا عاوز قهوة فوق المانو بشويه..

فؤاد: مش فاهم حضرتك... فوق المانو ولا تحت المانو أنا هجيب ميزان حساس أحسن...

زبون1: ما تكلمني يا عم براحة... هو انا مش زبون ولا ايه؟

فؤاد : ياعم انا كلامي كده... في قهوة مطبوط وقهوة سادة وعلى الريحة وزيادة... أجبلك ايه؟

زبون: ياعم هات اللي تجيبه.

فؤاد: إيه الشغلانة دي بس يارب؟

زبون2: يا عم انت جايب شاي أنا ما طلبتش شاي.

فؤاد: إنت قلت أي حاجة اشربها وانت شكلك كده ما تشربش غير

شاي... ناوي تشربه ولا ايه؟

زبون3: (يدخل القهوة: والنبي أي حاجة اشربها لحسن معدتي تعبانة...
ينسون.. حلبه.. كركديه.

فؤاد: ياعم قوم خد حاجة من الصيدلية... ماتتعبناش.. ايه الليلة الزرقه
دى يا ربي؟

(ظلت حالة من الضجر مسيطرة على فؤاد لمدة تزيد على
أربعة أشهر حتى استقر الوضع معه بالمقهى... ولكن ما جعله أكثر
اسقرارًا أن صيدلية فتحت على مقربة من المقهى، وتعمل بها سهير
وأصبح برشام الريفو، والأسكين والأسبو يصل معه إلى حد الإدمان
لزيارته المتكررة للصيدلية ولكن بدون أن يتبادل معها الحديث حيث
إنها صارمة أيضًا... لدرجة أن يديه لمست يديها بطريقة غير مقصودة،
نظرت إليه نظرة... كادت أن تقتله... واقتنع بأن الزواج هو خير
وسيلة له حيث إنها هي الفتاة التي تستطيع أن تكمل معه مشواره
مع إتمامه عامه الواحد والثلاثين، كل هذه الحوارات لم تستغرق أكثر
من شهر واحد آخر حتى اتخذ القرار وبدأ يعمل على تنفيذه..)

فؤاد: صباح الخير... يا آنسة ممكن ريفو أو أي حاجة شديدة للصداع؟

سهير: صباح الخير... أجبك حاجة تانية غير الريفو؟

فؤاد: أي حاجة من إيديك تكون كويسه (يحاول لمس يديها وهو يستلم
الدواء)

سهير: بقولك إيه.. إنت فاكرني من البنات اياهم ولا ايه؟

فؤاد: مش قصدي والله أنا سألت عليكي كويس وأنا عاوز أتقدم.

سهير (بابتسامة رضا): ... هو الكلام ده بيتقال هنا ولا في البيت؟
فؤاد: (يحاول لمس يدها مرة أخرى فتنظر له بحدة): هو انا كل ما
المس إيديكي تعملي شغلانة ولا ايه؟
سهير: لما ابقى مراتك هتبقى تلمسني...
فؤاد: طيب حددي معاد في البيت وانا آجي البيت عندكم.
سهير: إن شاء الله.

تذهب سهير إلى البيت وتخبر أهلها، ويقومون بتحديد الميعاد،
ويذهب فؤاد، ويقابل إبراهيم والد سهير، ويتم الاتفاق على كل شيء
وتتم الخطبة والزواج في فترة تجاوزت السنة بقليل.. يحضر الزفاف
أصدقاؤه وإخوانه وفي العام الأول يُرزق بالطفلة الأولى... ويسميا هدى).

فؤاد: حلوة يا محمد.. حلوة... شبهى ... هنعمل ايه نرجعها؟
محمد: دي غسل... انت مضايق؟
فؤاد: لا يا أخى خالص والله ده كله بتاع ربنا.. ورزقهم واسع قوي بس
انت عارف..

سعيد: ألف مبروك يا حاج فؤاد... إمتى العقيقة بقي؟
محمد: هو ده اللي بتاخده من الشيوخ بتوع اليومين دول الأكل والفتاوي
الي على السخان.

فؤاد: ما انت عارف يا شيخ إن الأكل جوه... خش... إنت ناسي إن ده
بيت أخوك مش بيت حد غريب؟
محمد: حاجة تقرف.

فؤاد: ياعم خف عليه شويه ده برضه اخوك.

محمد: ياعم ده واد بايظ ولا ينفع حتى نفسه...أنا هروح القهوة.
فؤاد: ياعم خليك قاعد معايا النهارده... سيبك من الشغل.
محمد: لا قرفان اروح أفش غلي على الزباين شوية.
فؤاد: أنا ساعه واحصلك.

(فؤاد يجلس في المقهى شاردًا، ويتذكر بعض ذكرياته القديمة... وفجأة!
يسمع صوتًا يخرج من سيارة حديثة)

علاء: وله يا فؤاد... فؤاد..

فؤاد: إنت فين يا عم واحشني والله وأخبارك إيه؟.. داهيه لتكون
بخير.. انزل تعالى

علاء: بص يا سيدي إنت عارف طبعًا اتجوزت مين وهي دلوقتي
بتساعدني في الشغل علشان اعمل بيزنس كويس وجوز اختي
فوزية طلح على وظيفة حلوة في السعودية برضه تبع فنادق
هناك وقدرت أظبطه في فندق محترم وابتديت اركز في الشغل
على سفر الحجاج والعمره وهو ده هيبقى تركيزي في المرحلة
الجاية...

فؤاد: تمام الله يفتح عليك من يومك يابني وانت بتحب الشغل.

علاء: ما انت عارف.... بقولك ما تقوم تشوف العربيه بتاعتي ونلف
شوية في البلد.

فؤاد: ألف ... ألف مليون مبروك ربنا يكرمك يا صاحبي.

علاء: قوم بقى بلاش غلاسة تاخذ لفة وبالمرة تشوف حبايبك بتوع

زمان.. وندور على ابو السباع.

فؤاد: ماشي....

(وأخذ علاء مع فؤاد يتفقدان أحوال المدينة رويدًا رويدًا، وذهبوا إلى المقهى القديم لأيام الشباب، وتذكر هناك حكاية المهندس طاهر الذي سافر إلى ليبيا منذ أكثر من سبع سنوات ولا يعلم أحد عنه شيئًا، وتحدث كثيرًا عن المهندس طاهر مع علاء وشخصيته وأسلوبه والتغيير في الحياة الاقتصادية للأسوأ... وحضر إسماعيل وأخذ يتحدث معهم وأخبرهم بوجود عقد للسفر للإمارات، وانتهى اليوم مع أكلة كباب من عند نفس المحل الذي أكل فيه في حالة الوفاة، وتذكرا حالات الوفاة التي مرت بهم، وقرأوا الفاتحة، وفي الثانية صباحًا ترك علاء فؤادًا وقال له: إنه لابد أن يكون في القاهرة في السادسة صباحًا على وعد بقاء شهري... وصل فؤاد إلى منزله في ليلة من أجمل ليالي العمر قضوها سويًا... لا ينقصها شيء على حد قولهم... وتمر الأيام تباعًا)

سهير: أحضر الأكل يا فؤاد؟

فؤاد: آخذ حمام الأول وافوق لحسن تعبان أوي.

سهير: مالك فيك حاجة؟...

فؤاد: لا عادي يعني تعبان شويه.

سهير: طيب على بال ما تخلص الحمام أكون جهزت ليك الأكل...

(تأتي سهير بالأكل، وتترنح فجأة؛ فتسقط الصينية من يدها)

فؤاد: إيه يام هدى مالك؟

سهير: تلاقيه شوية برد ولا حاجة.

فؤاد: ياريت... عمومًا روعي شوفي الدكتور بكرة.

سهير: مالوش لزوم... دول شوية برد.

فؤاد: اسمعي الكلام... البت نامت؟

سهير: آه من العشا...

فؤاد: هخش أنام جنبها وانتي اتغطي كويس.

(وبالفعل، تذهب سهير إلى الطبيب ويخبرها أنها حامل في الشهر

الثاني)

فؤاد: إيه الأخبار ياستي؟

سهير: أنا حامل يا فؤاد... مش عارفه ازاي.

فؤاد (ضاحكًا): يعني انا اللي اعرف ولا ايه؟...

سهير: يعني انت مش زعلان إني حبلت تاني بسرعة كده؟

فؤاد: ياستي ده بتاع ربنا.. وربنا يكرمنا.. في سند ليكم علشان لما اسبكم

أبقى مطمئن.

سهير: إيه الكلام اللي بتقوله ده.. ليه كده...؟ إنت خليت قلبي اتقبض

ليه كده يا فؤاد؟

فؤاد: خليكي جامدة يابت.. ده كلام زي ما بيقوله ابن عم حديث.

سهير: طيب قوم علشان تتعشى... ولا ايه مش ناوي؟

فؤاد (ضاحكًا):... لا ناوي طبعًا.

(وتمر الأيام برتابتها العادية مع أخيه في المقهى، وكذلك مع زوجته..

حتى تلد سهير مولودتها)

سهير: معلش يا فؤاد... جت بنت..

فؤاد: معلش إيه يا عبيطة طيب نرجعها تانى... انتي هبله يابت.. ده
بتاع ربنا. إوعي خليني أشوفها.. بلاش عبط.

(ويأخذ البنت الثانية ويقبلها قبله عميقة، تدل على مشاعر أبوية
حقيقية... لتطمئن سهير وتهداً)

سهير: هنسميها إيه?..

فؤاد: نسميها سمر... ولا أنت إيه رأيك؟

سهير: وأنا لي رأي بعد رأيك يا ابو عيالي؟

فؤاد: خلاص ... على البركة تبقى سمر على السبوع بتاعها اروح أكتبها
واخلص شوية مصالح كمان بالمرة.

(وبالفعل بعد السبوع، يذهب إلى مكتب الصحة، ويكتبها ويقوم

بتخليص عداد المياه وعداد الكهرباء، والتأمينات والشهادة الصحية باسم
أخيه محمد... ويلاقي الأمرين)

محمد: فيه جواب جالنا من الضرائب العقارية.

فؤاد: ياسا تر يارب.... هو في شغل أصلاً علشان ياخدوا فلوس على
المباني؟

محمد: مش عارف الناس دي عايزه منا إيه... ضرائب عقارية وضرائب
... وضرائب على المبيعات وتأمينات ... الناس دي بتفتشنا

ولا إيه

فؤاد: والله يا محمد عندك حق مفيش كلام ... في السعودية ولا أي
دولة تانيه مفيش حتى طوابير هناك ياأخى إحنا سنة ألفين

وتحس إنك لسه في العصر الحجري دفاتر وورق.. تعرف هناك
من خمسين سنة ميعرفوش يعني ايه حكومه دلوقتي تلاقي
عندهم حكومة إلكترونية ونصف إلكترونية وإنترنت ... حاجة
تخلي الأقرع يشد في شعر ودانه (يضحك مع زبون بالمقهى
أصلع)

محمد: يا أخي تحس الجنيه اللي داخلك الحكومة مديناك بجنيه وربع
فؤاد (ضاحكاً): شكلك هتحبسننا... هروح أخلص مشاورين على السريع
وارجعلك..

محمد: متتأخرش علشان عندي... عندي موضوع عاوز أقضيه أنا كمان.

فؤاد: ياعم ... اتجوز بقى... تعبتني أنا ماشي.

محمد: متتأخرش... والنبي يا فؤاد.

فؤاد: حاضر ياعم... حاضر... صدعتني.

(... قام فؤاد بدفع التأمينات والضرائب العقارية.. وكذلك
توقيع العقد لشركة الكهرباء والماء... حيث كانت عقيدته بعد
أن حضر من السعودية... الرجل المحترم لا يركن قرش الحكومة
لأن قطة الحكومة جمل... والحكومة توفر كل مقوماتها لتثبت كل
يوم أنها قوية ولا يغلبها أحد، ولكن على الضعفاء والمستضعفين...
وذهب أيضاً لدفع التراخيص وبمرور الأيام.. تقوى العلاقة بين
محمد وفؤاد ويتذكر كل يوم والدته وهي توصيه على محمد أخيه)

فؤاد: اتأخرت أوي يا محمد ... قلقنتني عليك.

محمد: يا عم ما تخفش على ... أنا تمام .

فؤاد: إنت عارف مين كان عندي دلوقتي؟

محمد: مين ياعم؟

فؤاد: حسن الهلباوي... شيخ البلد ... بيكلمني على موضوع التجنيد

والحكم والحوارات دي..

محمد: وانت قولتله إيه؟...

فؤاد: إنت بتسألني؟ يا محمد... أنا قتلته هنخلص الموضوع ده عن

طريق ولاد عمك.. مانت عارف إنهم ليهم خال عضو مجلس

الشعب هناك... وبعدين انا هسيبك.. برضه تتجسس يعني؟

محمد: أصيل يابن ابويا... أصيل (حاضرًا له)

سعيد: إيه يا ولاد... فرحونا معاكم..

محمد: أهو يا عم اتفضل ... انا مروح يا عم فؤاد.

فؤاد: مفيش حاجة يا سعيد تعالى علشان تتعشى معنا.

محمد: انا اتعشيت اتعشوا انتم.

سعيد: لا أنا عاوز أكلكم في موضوع قبل ما امشي... باختصار كده.. أنا

هتجوز.

محمد: إنت جاي تشاورنا ولا جاي تقولنا؟

فؤاد: إهدا بس يا محمد... إنت اخترت خلاص ولا لسه؟

محمد: إنت باين ماسمعتهوش كويس..

سعيد: لا أنا خلاص اخترت وكمان كلمت الناس.

محمد: شفت يا عم فؤاد... احنا بقى لازمنا ايه؟

فؤاد: طيب يا سعيد ألف مبروك ..ايه المطلوب منا ... ولا انت خلصت؟

سعيد: آه ... أنا خلصت واتفقت على كل حاجة.

فؤاد: تمام.. بس يعني .. إن الناس تقبل واحد بدون عيلته وناسه.. يبقى

ناس مش قد كده .. فاهمني طبعًا.

محمد: اسمع كلام اخوك فؤاد وبلاش الناس دول.

فؤاد: براحتة مدام مقتنع بيهم وهم موافقين عليك... وعمومًا اللي

اتفقت عليه وأكثر إن شاء الله... هو مش صغير يا محمد ده

دخل على 28 سنه.

سعيد: لا يا فؤاد 26 وشويه.

فؤاد: حتى ولو 20 إنت مش صغير ... يعني راجل ... تتحمل المسؤولية

وعمومًا ألف مبروك.

سعيد: ربنا يخليك يا اخويا... إنت عليك الباقي بقى.. فاكر أنا قتلتك

ايه لما جيت تفتح القهوة.. قتلتك ايه؟

فؤاد: قتلتي انا مش عاوز نصيبي..

سعيد: أنا مش عاوزه اقعد فيه ..شوف بقى قدر نصيبي بكام وانا

هبعولك بيع وشرا ونصيبي في البيت كمان.

محمد: أحسن برضه..

فؤاد: فكر في الكلام اللي بتقوله أنا مش هاخذ عليه دلوقتي..

سعيد: أنا قررت... أنا محتاج فلوس ومش عاوز اروح لحد غريب أو حد

من اجواز اخواتكم ياخذ نصيبي.

محمد: ياأخى خلي عندك دم.. انت

فؤاد (مقاطعًا) خلاص... إن شاء الله خير... شوف عبد الهادي ابن

خالتك هو في المساحة ويقدر يتمنه وانا أدفعلك.. وكمان

بالزيادة ياعم.

سعيد: خلاص هقوم انا بقى... علشان الشغل وعندي سفر بالليل.

فؤاد: ربنا معاك.

محمد : يرضيك الكلام ده؟...

فؤاد: يا محمد الناس مخلصين معاه كل حاجة... يعنى هما مرتبين هيعمل ايه وهيدخل ازاي.. فاحنه لازم نمتصه وانت عارف سعيد طايش وكده ولا كده إحنا منظر في فرحه حتى لو مرحناش.. طيب بقى ايه الأحسن ... إن احنا نظهر قدام الناس كويسين وعائلة واحدة ولا مفككين وبيت زباله؟... ايه الي يرضيك ياكبير؟...

محمد: يا عم اعملوا الي انتو عاوزين تعملوه.

فؤاد: أنا دلوقتي يهمني موضوعك انت ده أهم حاجة عندي... نخلص من سعيد والأسبوع الجاي إن شاء الله ... أنزل عند ولاد عمك في الغردقة واخلص معاهم إن شاء الله.. بس اشوف عبد الهادي هيقدر نصيب سعيد بأد إيه علشان ما يفرجش علينا الدنيا وجواز خواتك ينكدوا على اخواتك ونحاول.. نحاول نخلص الموضوع ده قبل ما امشي على الغردقة.

(يذهب فؤاد للغردقة بعد أن ينتهي من قصة شراء نصيب سعيد.. ويتعهد عبد الهادي بتخليص جميع الأوراق الدالة على ذلك ويقضي في الغردقة أربعة أيام ويأخذ جميع الأوراق الخاصة بمحمد، ويأخذ وعدًا من عضو مجلس الشعب بأن الموضوع سوف ينتهي تمامًا في غضون ثلاثة أشهر على أن يكون مجهزًا معه

الكفالة الخاصة، وكذلك أعطاه رقم التليفون الخاص جدًا له...
وتصريحًا بالاتصال به في أي وقت بالليل قبل النهار... لما لمسه منه
من شهامة ورجولة، وبعد مرور أكثر من خمسة وأربعين يومًا)

فؤاد: ألوه... أيوه يا سعادة النائب... أنا فؤاد (بالتليفون)

نائب الشعب: أيوه يا فؤاد ... ايه أخبارك عامل ايه ... وازي الأسرة كلهم
بخير ؟

فؤاد: كلهم بخير ويسلموا عليك... وبيقولك عملت ايه في موضوعنا؟

النائب: يا فؤاد ... عيب عليك ده موضوعي إن شاء الله شهر بالكتير
ويخلص وزى ما فهمتك... وما تقلقش... وبعدين انت بتتصل
بيا علشان الموضوع ده بس ولا ايه؟...

فؤاد: لا انا برضه عاوز أطمئن على سعادتك... بس أنا عارف مشغولياتك.

النائب: يافؤاد ... زي ما قلتك وما تقلقش ويأخى ابقى هاتلك محمول
علشان أكلمك.

فؤاد: ربنا يخليك لينا... سلام.

محمد: إيه الأخبار يافؤاد؟... الراجل ده قالك إيه طمنى؟

فؤاد (ضاحكًا): ... قالي اشترى تليفون محمول...

محمد: ياعم فؤاد هو ده وقت هزار إخلص.

فؤاد: والله قالي اشترى... وبعدين قالي خلال شهر إن شاء الله يكون
موضوعك خالصان.

محمد: الراجل ده مش مريحني خالص...

فؤاد: بالعكس الراجل ده رجولة خالص... وبعدين انت قلقان ليه؟...

الميه تكذب الغطاس

(في هذه الأثناء يدخل أخوهم سعيد... ويلقي السلام ...)

فؤاد: ورحمة الله وبركاته.

محمد: أهلاً يا عم ... عاوز حاجة يا فؤاد؟.. هوصل مشوار هنا...

هجيب طلب.

فؤاد: ماشي متتاخرش ... إيه مالك ياباشا ... مقريف ليه؟

سعيد : بس مزنوق شوية...

فؤاد: طيب فيه معايا 1200 جنيه كنت مخليهم معايا ليك... وهشوف

جمعة وما تقلقش اللي انت عاوزه يا شيخنا... وإن شاء الله

أكثر شوية.

سعيد: ربنا يخليك يا اخويا (حاضناً له) أنا قلت إنك بعد ما ادتيني

نصيبي الدنيا هتبقى مزنقه معاك شوية.

فؤاد: ولا يهملك... ركز انت في فرحك وما تقلقش.

(وبالفعل، بعد أسبوعين تكون قد تمت ترتيبات الفرح على أكمل وجه

وحسب الترتيبات المطلوبة وبعد إتمام الزفاف)

فؤاد: يا محمد أنا نفسي انت اللي كنت اتجوزت... وافرح فيك.

محمد: يا فؤاد انا مش فارقة معايا ... إنت عارف... المهم موضوع

التجنيد ده إوعى تكون نسيته

فؤاد (ضاحكاً): .. أنسى ايه بس ... أنا بكره هكلم الراجل.

(وبالفعل... ينهي عضو مجلس الشعب قضية محمد كاملة مع التجنيد... ويتم التصرف في مبلغ الكفالة وتوثق العلاقة بين عضو مجلس الشعب وفؤاد... ويذهب إليه ويقابله شاكراً له جميله ومعروفه... وتمر ثلاث سنوات عادية لا يعكر صفو هذه الأسرة البسيطة شيء... ويكون فؤاد على اتصال دائم مع أصدقاء عمره.. وقبل رمضان بأربعة أيام يأتي إسماعيل من السفر...)

إسماعيل: إزيك يا فؤاد... سلام عليكم... (زباين المقهى)
فؤاد: الله يخرب بيتك إنت جيت إمتى من السفر؟(حاضناً له)
إسماعيل: جيت امبارح وصلت الساعة 4.5 الصبح.
فؤاد: يخرب بيتك واحشني يابن الملونة.

(يقضي فؤاد وإسماعيل ثلاثة أيام قبل رمضان سوياً... وتتم دعوة إسماعيل في منزل فؤاد، ويتم الاتصال بعلاء لحضور الدعوة نظراً لمعرفتهم بارتباطه في هذه المرحلة، ويذهبون عنده في نهاية رمضان لقضاء يومين بالقاهرة... ويجتمع ثلاثتهم في العيد...)

فؤاد: صحيح يا اسماعيل انت مسافر تاني؟...

إسماعيل: أعمل ايه بس يعني بمزاجي؟... المدة الي قعدتها هناك يدوب اشترت الأرض وعملت الأساسات بتاعة البيت... ما أنا لو قاعدت في مصر مش هلاقي آكل.

علاء: صحيح البلد كل يوم بتغلى وكل يوم في حال... ولازم الواحد يشتغل أكثر من الأول علشان يعمل حاجة لمستقبله ومسقبل عياله ...

في ظروف في منتهى الصعوبة.

إسماعيل: آه والله... الواحد لما يسافر بره بيحس أن احنا زي البني آدمين

مش بنادمين

فؤاد (ضاحكًا): ... فكرتني يابني بأيام الحبس بتاعي في السعودية ومصر

من ست سبع سنين كده ... حسيت نفس الإحساس ويمكن

أوسخ.

علاء: شف بقى يا سيدي كل الدنيا بتطلع لقدام وتلاقينا احنا بنرجع

لورا...

فؤاد: إحنا من إمتى بنطلع لقدام إحنا تقريبًا ماشيين بالقصور الذاتي

... الواحد لما يسمع في الجزيرة والعريية على مصر ... بتصعب

عليه نفسه

إسماعيل: ياعمنا ما يصعبش عليك غالي... انا رحتم ورجعت ولسه

طوابير العيش زي ماهي دي يمكن زادت... أنا جعت ... ما

تقوم... ناكل.

فؤاد: شفت الواد جاب سيرة العيش... جاع الله يخرب بيت فقرك...

(قام الجميع، وذهبوا إلى مطعم شهير على حساب علاء الذي بات

معروفًا فيه، وطلب طالباته المعتادة. وبزيادة لأصدقاء عمره وجلسوا

بالقاهرة ليومين معه، بعد ذلك عاد فؤاد وإسماعيل وقضى أسبوعًا مع

أهله وسافر مرة أخرى.. بعد إعطائه هدية لفؤاد... عبارة عن تليفون)

زوجة فؤاد: مالك يافؤاد... مضايق ليه كده؟... إوعى تكون زعلان على

سفر اسماعيل؟

فؤاد: ده سبب برضه السبب الأهم إني عاوز اعمل حاجة للعيال عاوز
أسبلهم حاجة يتسندوا عليها ومايحتاجوش لحد.

زوجته: إيه يا فؤاد الكلام بتاعك ده؟... ياخويا حسك في الدنيا وربنا ما
يحوجنا لحد أبداً... انت ليه بتخليني اخاف عليك كده؟

فؤاد: يابنتي ماحدث يعرف لا رزقه ولا أجله ... إحنا بس لازم نفكر
بعقل شوية ونبص لبكرة.

زوجته: لا بكرة ولا بعده... قوم يا اخويا اتعشى.

فؤاد: هروح انادي على محمد يتعشى معايا.

زوجته: براحتك... وانا ادخل أنام مع العيال.

فؤاد: طيب ما دام انتي هتنامي ... هاخذ الأكل واروح عند محمد اسهر
معاه شوية.

محمد (يسمع طرفاً على الباب): ... مين ... مين؟

فؤاد: افتح يا محمد يا أخي أنا فؤاد.

محمد: ايه يا عم في حاجة ... خضتني.

فؤاد: يا عم انت بتخاف ليه احنا مش خلصنا من موضوع الجيش...

وخلصنا كل حاجة ولا ايه؟

محمد: لا أنا كنت بطبخ.. ما انت عارف.

فؤاد: طيب اقعد انا جاييلك عشوه ..علشان نتعشى مع بعض واقعد
بقى يا عم كل... والنبي مانقصاك.

محمد: طيب ... هقفل النار على الأكل في المطبخ (يغلق البوتاجاز)

فؤاد: بص بقى يا محمد ... احنا مخلصين كل حاجة... على القهوة...

والبيت... ماشي... وفي جمعية مدتها سنتين تقريباً كده تعمل

تمن تلاف جنيه... هنخش فيها هي هتضغطنا شوية بس احنا
هنعمل حسابها وكمان هنكون خدنا الجمعية بتاعة التتلاف
جنيه ونروح هدين القهوة وبينهما على نضافة ونعمل فيها
نظام جديد وتأجر شقة فوقها لمحامي أو دكتور... إيه رأيك؟
محمد: لا اقوم أعمل كبيتين شاي ... والف سجاره واجيلك كمل أكل
انت ...

فؤاد : انا كنت ... الحمد لله

(بالفعل يعمل الشاي... ويلف سيجارة ويبدأ في تدخينها... ويقدم
الشاي لفؤاد)

فؤاد: ده الموضوع باختصار... ايه رأيك؟
محمد: ماشي ياعم انا معاك ... شوف انت عاوز إيه بالظبط مني وانا
معاك.

فؤاد: انا مش عاوز حاجة... كل اللي احنا هنعمله سياسة ربط الحزام
شوية السنة دي ... وهتشوف الورق بتاع عدادات الميه والنور
اللي في الأوضة اللي جوه ... ونخلص الورق ونبقى جاهزين
ليها.

محمد: اللي انت شايفه صح ... اعمله وقولي على اللي انت عاوزه مني
...

فؤاد: أنا عاوزك تتجوز يا اخويا.

محمد (ضاحكًا): ... بقولك ايه ... نورت على الشويه دول ... قوم علشان
تروح لعيالك .

(وتمر الأيام سريعًا وتمضي قرابة السنة في ظل اتصالات من إسماعيل ولقاءات متفرقة من علاء واتصال بهما... وكل يوم يمر يحاول أن ينهي فؤاد الأوراق والموافقات وتنازلات في خضم الأحداث العادية...)

محمد: مالك يا فؤاد؟

فؤاد: مش عارف النغزة اللي بتجيني بقالها فترة كده ... مش عارف ومعدتي مش قابله أي أكل.

محمد: لازم تروح للدكتور الموضوع ده بقاله فترة معاك...مش صح كده.

فؤاد: طيب ما انا روحت... وهو هو نفس الكلام من شهر إبعد عن المسبكات والأكلات الحراقه علشان القولون.... أكيد عملت كده معايا الطحينة أصل أكلت سندوتش يمكن هو اللي عمل معايا كده.

محمد: لا يا فؤاد لازم تروح عند دكتور كويس... هات التليفون.

فؤاد: هتعمل ايه بس ... قولي؟

محمد: (يقوم بالاتصال بعلاء بالقاهرة) ... أيوه يا علاء أنا محمد والنبي شوف دكتور كويس عندك لفؤاد... لحسن فؤاد معدته بقالها شهرين تعباه قوي ومش عاوز يعمل حاجة... ولا يروح لدكتور كويس...

علاء (يرد عليه... بالتليفون): طيب هو كويس دلوقتي؟

محمد: آه.. الحمد لله.

علاء: خلاص استنى مني تليفون بعد العشا... سلام.

فؤاد: إيه اللي عملته ده يا محمد؟... يا أخي الراجل مشغول.

محمد: علاء صاحبك من زمان هو واسماعيل ومفهاش حاجة يعني...
هو علشان قاعد في القاهرة أكيد يعرف دكاتره كبار هناك...
ويا عم ما تخلهوش يدفع حاجة... لو خايف من دي يعني

(وفي المساء يتصل علاء بفؤاد... ويوبخه على تأخيره في كل هذه
المدة ويتفق معه في نهاية الأسبوع أن يأتي إلى مكتبه في القاهرة،
وبالفعل في العاشرة صباحًا يذهب فؤاد إلى القاهرة، ويكون في
مكتب علاء في تمام الثانية ظهرًا... وتظهر له بوادر مفاجأة حيث
يذهب إلى السكرتيرة... ويخبرها باسمه حتى تظهر بوادر الاحترام
غير العادي... وتخبره بأن الأستاذ علاء ينتظره من الصباح...)

علاء: حمد لله على السلامة..

(ويخبر السكرتيرة بأن كل شيء يكون معدًا في خلال عشر دقائق
وتوحي إليه بالإيجاب)

عامل ايه ياباشا وحشتني القهوة والبلد والناس واسماعيل واخواتك...
فؤاد: وانت واحشني والله ... وامك أخبارها إيه؟..
علاء: بص يا سيدي بقالها سنتين في السعودية مش عاوزه ترجع وقاعدة
مع اختي وجوز اختي هناك... وحجت وعملت كذا عمرة
واتظببت هناك تمام... مش انا قتلتك قبل كده... ولا نسيت؟
فؤاد: ربنا يخليها لك ... وترجع بالسلامة.

(تدخل السكرتيرة... وتشير له... بأن كل شيء معد...)

علاء: تعالی معایا یا سیدی.

فؤاد: هنروح فین؟...

علاء: یاله یا أخي.

(ویدخل علاء وفؤاد إلى قاعة أشبه بقاعة اجتماعات، عليها من كل

صنف ما لذ وطاب.. والكل ينتظر الأستاذ علاء وضيفه... والذي أعد كل

شيء من أجله...)

علاء (للعاملین معه ... یقدم فؤاد): ده بقى صاحبی وصدیق عمري

هو واحد اسمه اسماعیل... دول بقى كنا بنقسم الأكل سوى

والسجائر وكل حاجة أيام الفقر... وكنا بنستلف من بعض

ومكنش فيه سلف یعنی اللي معاه يسد... وكنت ... (یقاطعه

فؤاد)

فؤاد: یاعلاء بیه ... ما تقولش كده...

علاء: ولا بیه ولا سید یا فؤاد... أنا بس حبیت اعرفهم أنا إیه ومعای

مین وعمري ما کرهت أصلي ... ولا ماضیه.. إحنا اشتغلنا

وتعبانا وكافحنا علشان نوصل للوصلنا له لابونا كان وزیر ولاكنه

من اصحاب الاملاك.. عملنه اللي عملناه بعرقنه

(یصفق الجميع، ویقاطعه فؤاد. إنت هتوقعنا فی غلط یاابن.. ویشير

إلى العاملین بالتقدم للطعام)

فؤاد: ايه اللي انت عملته ده بس يا أخي إنت غاوي إحراج؟
علاء: بس ياله ولا إحراج ولا حاجة ده تاريخنا اللي عمرنا ما نخاف منه
ولا ننكسف منه كله كفاح وعرق... قوم قوم علشان افسحك
شوية قبل ما تروح للدكتور.

فؤاد: يابني مش عاوز اعطلك بعد الفضايح اللي انت عملتها دي
والعرق واللي عرقتة.

علاء: قوم .. قوم ... علشان افسحك.. النهارده بتاعك ياخفيف ... قوم.

(وبالفعل يذهب فؤاد مع علاء، ويقوم بجولة في القاهرة
المعز بين القلعة والهرم والحسين... ويذهبون إلى الدكتور في
تمام الساعة الواحدة صباحًا ويلتقي بهم الطبيب، وهو يعرف
علاء عن طريق مكتبه الذي قام بالحجز به عند العمرة،
وبعد الكشف الطبي على فؤاد... أجرى مع علاء حديثه...)

الطبيب: إنت كشفت قبل كده عند مين حاول تفتكر إمتى بالظبط؟
فؤاد: كشفت عند دكاترة عندنا في البلد وأسمائهم ورشتاتهم موجودة
معايا (ويخرجها للطبيب)

الطبيب: طيب بص بقى يا أستاذ فؤاد... إنسى كل العلاج وكلام الدكاترة
الي انت رحى عندهم وقمى على العلاج الي كتبتهولك ده
وبعد شهر من دلوقتى تعمل حسابك إنك هتعمل شوية
تحاليل وأشعات مهمة بس بعد ما نشوف نتيجة العلاج.

علاء: يا دكتور ما يهملكش... انت قول بس عاوز ايه واحنا نعمله.

الطبيب: لازم التدرج الي هعملوا ده علشان نحدد الحالة بالظبط .

فؤاد: هي الحالة خطيرة ولا إيه؟.. انت شايف إيه يا دكتور؟.. إنت
قلقتني (شبه مبتسم بتعجب)
الطبيب: رقم تليفوني معاك ... وأي حاجة اتصل بيا وأهم شيء تحافظ
على برنامج الأكل اللي كاتبهولك.

(ويخرج فؤاد وعلاء من عند الطبيب ويستغرب فؤاد من حديث
الطبيب الجدي...)

فؤاد: ايه يا عم الدكتور اللي انت موديني عنده ده؟... شوية تعب في
القولون ولا المعدة عملي فيها راس وزة.
علاء: يا فؤاد ده من أحسن عشر دكاترة في مصر في التخصص ده وبعدين
يا عم خليك مع الكداب... إنت هتبات معايا النهارده.
فؤاد: لا ياعم أنا هروح على البيت العيال وحشوني... ومحمد والقهوة
بقالي يوم في القاهرة أكنه شهر أنا بزهدق من الدوشة هنا..الله
يكون في عونك.

علاء: إنت اتعودت خلاص يله علشان.. اوصلك على البلد.
فؤاد: لا ياعم إنت توصلني لغاية الموقف بس وانا أكمل.
علاء: طيب الساعة داخله على 3 صباحًا نقعد على قهوة لغاية الفجر
نروح نصلي الفجر في الحسين ومشي.
فؤاد: مش عارف يا علاء كنت عملت إيه من غيرك؟
علاء: ياد ماتقولش كده احنا اخوات.

(ويذهب علاء مع فؤاد إلى المقهى ويتذكرون الأحداث،

ويتندرون على إسماعيل، ويدعون له بالصحة والعافية، وكذلك علاء، يتذكر أمه الموجودة في السعودية عند أخته وزوجها الذي يعمل مسئولاً عن فندق للحجاج، ويتذكر مرضه الذي ظهر فجأة وهو حلقة الوصل الآن بين أعماله في مصر والسعودية... ويهمون لصلاة الفجر، وبعد ذلك يوصله إلى موقف سيارات الأجرة... ويذكر فؤاد الطريق من بداية حياته وبناته وزوجته، وأخاه والمقهي ووالدته، وأباه وطاهرًا، وأبا صدام، وأصدقاء التجنيد، كل ذلك يمر أمامه كشريط السينما في أقل من ساعة، منذ خروج السيارة من الموقف حتى وصولها إلى بلده... ويفاجأ بصوت سائق السيارة مطالبًا بجملته الشهيرة... حمد الله على السلامة... الأجرة يا اخوانا)

محمد: ايه يا عم فؤاد.. الغيبة دي؟ طيب اتصل بيا قول إنك هتبات.

فؤاد: يا عم غيبة ايه بس الموضوع مش مستاهل خالص ... المهم العيال عاملين ايه؟

محمد : كله تمام يا عم بس انت طمني عليك.

فؤاد: الدكتور طلب شوية تحاليل وشوية فحوصات وهبقى تمام ... هروح أنا أشوف العيال لحسن وحشوني.

محمد: روح يا عم الله يساهلك (ضاحكًا)

الزوجة : حمد لله على السلامة.. طيب اتصل قول إنك هتبات.

فؤاد: (يقبلها) ... العيال... وحشوني (ينظر إليهم وهم نائمون)

الزوجة: البنات نايمن هجهزلك الأكل..

فؤاد: جهزي الحمام الأول ... عاوز استحمى ... وبعدين آكل.

الزوجة (بعد الانتهاء من الطعام) ... أنا هروح اعمل أشعة على اللي في

بطني واعرف ولد ولا بنت.. نفسي يكون ولد علشان ..
فؤاد: إوعي تعملى كده... احنا ما بنعترضش على إرادة ربنا وافرضي إنها
كانت بنت هنقول ايه احنا مش عاوزينها ولا نرجعها تاني ولا
نبدلها من السوبر ماركت?... اهدي كده واعقلي كله بتاع ربنا
ده ملناش دخل فيه.. واحنا اتكلمنا في الموضوع ده قبل كده..
ومش عاوز كلام فيه.

الزوجة (تبدأ بالبكاء): ... أنا نفسي أخلفك ولد إنت نفسك في ولد..
فؤاد (وهو يقترب منها حاضنًا لها): ... ياسهير هي أكله نفسي فيها ولا
مرة نفسي أنام معاه?... ده لحمي ودمي.. إنتي مالك إحلويتي
كده ليه؟ (ويضحك وهو يقبلها ويداه تلمس جسدها بنعومة
ودفاء... رويدًا رويدًا... حتى يذهبها إلى فراشهما... وتمر الأيام
سريعًا ...)

سعيد: فؤاد فين يا محمد... (في المقهى)

محمد: عاوزه ليه انت مش اتجوزت وخلفت؟

سعيد: يا محمد أنا عاوز فؤاد ضروري في مشكلة مش هيحلها غيره

محمد: ... مشكلتك حلها انت يا أخي... إنت لازم تتعيني معاك؟..

سعيد: هو كل ما اكلمك تقطمني كده؟

فؤاد (يأتي من خارج باب المقهى): ... ايه يا محمد في ايه يا سعيد؟

محمد: الباشا جبلنا مشاكله وجاي ...

سعيد: يا محمد انت بتعاملني ليه كده؟

فؤاد: مش عاوز زعيق هنا ... تعالى ندخل البت ... (يدخل المنزل

المجاور للمقهى)

سعيد: مراقي خدت العيال وسابت البيت ومشيت.

فؤاد: اهدى كده وفهمني الحوار على الهادي.

سعيد: البت من ساعة اخوها ماسافر بره وهي بتتنطط عليا وبتطلب مني حاجات غريبة انا دخلي ما بقاش يغطي البيت وبقيت اعمل مشاكل مع الراجل اللي شغال معاه وحاسس إني مضغوط.

فؤاد: هسألك سؤال واحد وترد عليا... البت محترمة ومالهش في اللوع ... والدوران؟

سعيد: لأ من النحية دي محترمة.

فؤاد: هي فين دلوقتي؟

سعيد: هي عند أهلها دلوقتي.

فؤاد: تقدر تسيبها قد ايه؟

سعيد: عادي يعني.. ممكن اسيبها..

فؤاد: خليها عند أهلها أسبوعين تلاته لحد ما حد من أهلها يتكلم..

علشان نعرف نرد عليهم انت وراك ايه بكرة؟

سعيد: مفيش حاجة..

فؤاد: تيجي معايا نعمل شوية أشعات طلبها مني الدكتور وقبل رمضان

ما يهل إن شاء الله تكون المدام في بيتك يا حاج ولا يهملك.

سعيد: انت تعبان ولا ايه ؟

فؤاد: ماتقلقش شوية تعب بسيط كده.. بس الدكتور مدوخ أمي بقاله

يجي أربع شهور.. والولية شكلها ممكن تولد في أي وقت

الأسبوعين دول.... المهم هتنام مع محمد ولا هتروح؟

سعيد: لا هروح ... هو انا اعرف اناام معاه؟

(ويذهب فؤاد مع سعيد لعمل الفحوصات والأشعات حتى يكون
اليوم الأول في رمضان وكعادة المقهى القديم مزدحم بعد الإفطار بأهل
الحي الكائن به المقهى)

محمد: فؤاد... الراجل أبو مرات سعيد جاي على هنا.

فؤاد: محمد ماتتكلمش انت وأكئك مش معانا... إحنا عوزين نحل
بالعقل والنبى إهدى

محمد: يا عم ماليش دعوه أنا ... إخلصوا مع بعض.

(يدخل والد زوجة سعيد المقهى... ويلقي السلام على الجميع...)

فيظهر له فؤاد)

فؤاد: أنا هنا ياعم الحاج ... اتفضل .. كل سنة وانت طيب.

والد الزوجة: يصح برضه يا فؤاد اللي عامله سعيد ده؟...

فؤاد: هو سعيد عمل حاجة لا سمح الله يا حج؟

والد زوجة سعيد: آه سايب عياله بقاله فترة ولا بيسأل فيهم..

فؤاد: هو مقلش لمراته تمشي.. هي اللي سابت البيت.. ومشيت.. صلي

على النبي كده ياعم الحج.. اللهم صلي عليه.. سعيد اخويا لما

راح يتقدم ليكم انتوا وافقتوا بيه من غير ما تدوروا وتسألوا

على كبره.. وانتوا كنتوا عارفين ظروفه وكنتوا طايرين بيه ومع

ذلك ما حدش فينا اتكلم والي انتوا طلبتوه اتوافق عليه حتى

إيجار شقة جنب بيتكم مع إن إيجارها كان غالي وافق عليه...
والد الزوجة لسعيد: يا فؤاد احنا ما بنتكلمش على كده أنا بتكلم على
المعامله وأحوال سعيد اليومين دول.

فؤاد: بص يا حاج أنا عارف كويس ظروف اخويا ولازم بنتك تقدر
ظروفه.. وهي صاحبت عيال دلوقتي... ومش هقولك إن أخويا
فاشل بس بيحاول وأديك شايف الظروف... وعلى فكره سعيد
أجر شقه هنا جنبنا إيجارها مرتاح شويه وخلص من الشقه
التانيه ونقل كمان العفش وانت عارف ياعم الحاج إن الست
بنت الأصول لازم تعيش في طوع جوزها وتعيش معاه على
الحلوه والمره معاه مفيش مشكلة معهوش أهو بيتقضى واحنا
كلنا فاتحين بيوت ولينا ظروفنا.. وولاد الأصول ميطلعوش سر
بيتهم برة... ولأ إيه يا حاج؟ .. عمومًا لو انت شايف إن سعيد
غلطان في حاجة أنا أربيه...

والد الزوجة: عمومًا يا فؤاد هرد عليك.. سلام عليكم (تارگًا القهوه).

فؤاد: منتظرك ياعم الحاج (وعليكم السلام ورحمة الله.... يلتفت في
القهوة) محمد ... يا محمد ... ابعت حد يروح ينده سعيد
من أي حته.

محمد: هو حصل ايه؟...

فؤاد: مش مهم دلوقتي ... المهم عاوز سعيد.

(وبالفعل بعد أقل من نصف ساعة كان سعيد ومحمد وفؤاد ... في

المقهى)

فؤاد: اسمع الكلام كويس ... هتروح دلوقتي شقتك وتجييب منها كل حاجة وانا هروح اتفق على شقة في عمارة الحاج عبد الله ابو المجد تلم عزالك وتغير الكالون... وتجييب كل حاجة بسرعة.

سعيد: طيب أفهم حصل ايه؟...

فؤاد: مفيش وقت لخص.. وانا هروح اخلص مع الحاج عبد الله في الشقة.

محمد: اخلص بقى يا عم سعيد واسمع الكلام.

(وبالفعل يتم ما أرداه فؤاد... والمطلوب من سعيد قبل أذان الفجر وفي عصر يوم الثاني من رمضان وهم جالسون أمام المقهى تأتي عربة غربية لتقف أمام المقهى وينزل منها علاء... وتكون زوجته بجواره)

فؤاد: علاء .. حمدالله على السلامة .. حمدالله على السلامة يامدام (يوصي هامسًا أخاه محمدًا على إفطار احترامًا لعلاء وزوجته) اقعد خير انت مش الوقت ده كنت بتام فيه زمان .. فاكر .. نروحلك بعد العصر في رمضان نلاقيك اخ.. يا حاج علاء: يابني انت فاكر إني بنام دلوقتي وكده؟... ده كان زمان تصحى الصبح وتشد الستارة ومعها الشمس وبالليل تشد الستارة يجي الليل... القاهرة علمتني مفيش ليل ولا نهار...

فؤاد: اقعد يا عم الشاعر.. اقعد

علاء: لا جاي اشوف البيت بتاع امي علشان قالتلي هتيجي بعد العيد الكبير تقعد فيه وعاوز أوضبه علشان لو دخل عليا موسم الحج مش هبقى فاضي وقلت النهارده فاضي أروح

اشوف وارجع القاهرة انام ... الولىة شبطط فيه.أصلها حامل
وفي السادس وبتزهق لما بتتعد لوحدها... المهم اركب نروح
نشوف البيت.

فؤاد: ألف مبروك (يقبله ويحضنه) ألف مبروك يامدام.

(وبالفعل، يذهب علاء، وزوجته، وفؤاد إلى المنزل، وبعد ذلك
يذهبون إلى البيت لتناول الإفطار، ويطلب من علاء أن يبقى معه، لكي
يذكره بمواعيده، ويكون هذا هو اللقاء الأول بين زوجة فؤاد وزوجة علاء)
(ومع نهاية الشهر الكريم، يكون فؤاد قد أكمل كورس العلاج،
وكذلك الطلبات التي طلبها منه الطبيب، وكان على اتصال معه، وكرر
معه العلاج... وكالعادة مع بداية أيام العيد يأتي الإخوة إلى المنزل
الكبير أخوات فؤاد الثلاثة... الأخت المقيمة معهم بنفس المدينة..
أما الأخت الكبيرة فيتم الاتصال بها... ويبدأ فؤاد رحلته العلاجية
بعد هذه الإجازة ولكن قبل مرور اليوم الثالث من العيد..)

سعيد: يا فؤاد الراجل بعثلي تاني... أعمل ايه؟

فؤاد : خلاص حدد له معاد ونروحله سوى... ماهو لازم برضه يحس إن
بنته عزيزة مش هما مدلوقين علينا.

سعيد : (فرحًا) ... ربنا يخليك لينا يا اخويا... (ويذهب للاتصال بهم).
محمد: الواد ده كله مشاكل.

فؤاد: سيبك منه يا محمد أنا نفسي أفرح بيك انت.

محمد: يا عم ما تتعبناش... أنا هروح اشرب سيجاره ... صحيح انت
اتصلت بالراجل بتاع مجلس الشعب وعيدت عليه؟ لحسن

بقالك فترة ما اتصلت بشيه ولا بصاحبك..

فؤاد: كويس إنك فكرتني وهتصل برضه بعيال خالك وبسعد وابو
صدام... والله كلهم واحشني.

(وفي اليوم التالي، يذهب فؤاد مع سعيد ويعيد زوجة سعيد على أن
تبدأ صفحة جديدة بينهما.. ويذهب في اليوم التالي إلى القاهرة بعد أن
يكون قد اطمأن على سعيد وحياته الزوجية)

فؤاد: إيه رأيك بقى يا باشا في المكان ده؟..

سعيد: جميل يا باشا..

فؤاد: بص بقى ياسيدي.. الفترة اللي فاتت كنت حاسس إنك مسيطر
والدنيا ماشيه وحب وتفاهم وكده.
سعيد: هي.. بس الظروف.

فؤاد: الست اللي بتحب جوزها ياعم سعيد ماتعلنش سر جوزها..
وتبقى صيناه في بيته وعياله.. المهم مش دي القصة.. القصة
يابن والدي إن الست لازم تحس إن معاه راجل.. راجل ياعم
سعيد يعني يتشاور يتناقش يحب لكن القرار في الآخر بتاعه..
وصوته من جلده والست بتعته بتجبه وبحترمه وبتخاف عليه
وهي حاسه معاه إنه راجل جوه البيت وبراه والست تحب
إن جوزها يبقى عند كلمته ويبقى عارف ظروفه وإمكانيته..
فهمني يا خويا؟

(في حجرة الطبيب.. في القاهرة)

الطبيب: بص يا فؤاد ... إنت راجل شكلك مؤمن بالله.

فؤاد: لا إله إلا الله... يا دكتور الداخلة دي ما طمنش انت محسسنى إني

هموت خلاص (ضاحكًا)

الطبيب (يحاول أن يكون لينًا): بص يا فؤاد الموضوع اللي عندك ده

مفيش حد اشتغل فيه في مصر قبل كده بس انت ربنا بيحبك

... في دكتور هيجي من ألمانيا هيقعد أسبوعين هنا في المستشفى

العسكري وده خبير من سبع خبرا على مستوى العالم في الكبد

والقنوات المرارية.. أنا كل اللي هعمله معاك إن أحافظ على

حالتك مستقرة وتمشي على العلاج اللي بدهولك ومفيش

تهريج أو دلح في الموضوع ده لأن الحالة حرجه..

فؤاد (وهو يستغرب ويحدق في الطبيب): يا دكتور أنا كويس والحمد

لله ... وباكل وشمشي كويس و ...

الطبيب (مقاطعًا): كل الكلام ده زي الفل ... الموضوع اللي عندك ده مش

سهل... المهم إن احنا اكتشفنا مرضك علشان نقدر نقاومه...

مش عاوزك تخاف بس عاوزك تبقى منظم في حياتك في كل

حاجة... ومفيش حاجة بعيدة على ربنا.

(يترك فؤاد الطبيب وهو لا يدري هل قدماه تحمله؟... هل

يزحف على الأرض؟ ... هل هل... ويتذكر بناته وزوجته... وأخواته

كل ذلك يتم أمامه على هيئة شريط السينما... ولم يدرك إلا عند

أذان الفجر فدخل يصلي الفجر وهو في المسجد تذكر أن من لم

يت بالسيف مات بغيره، وبعد ذلك انتفض، وأشار إلى تاكسي

لموقف السيارات المتجهة إلى بلدته.. ليصل في السادسة صباحًا

ليجد أخاه محمدًا جالسًا أمام البيت وملفوفًا ببطانية وينتظره.
بنظرة سريعة ينظر إلى السماء ليجد أن الليل بدأ في الانجلاء..

محمد: إيه يا عم اللي أخرك كده؟ انا ما نمتش في الليله التلج دي.

فؤاد: تعالي بس اعملي شاي... وقولي اطمنت على العيال قبل ما يناموا.

محمد: إيه مالك يا فؤاد... فيه إيه؟

فؤاد: مفيش حاجة ... أنا شكلي باين عليه حاجة ولا إيه؟

محمد: انت مخبي عليا إيه.. الدكتور قالك إيه؟

فؤاد (بدا متأثرًا): .. الدكتور قالي إن في مشكلة خطيرة وعلاجها صعب

وكل اللي هيعمله إنه يحاول تكون حالتني مستقرة لغاية ما

يجي الخبر الألماني يشوف الحالة وهو اللي يقرر بعد كده ..

إيه اللي يتم وطريقة العلاج.

محمد (مندهمشًا): يعني إيه انت زي الفل... قالك إيه؟

فؤاد: هو ده الكلام اللي قاله... وقالي ما تجهدش نفسك وتابعني كل

أسبوع لغاية لما نقابله.

محمد (يقوم بحضنه): ... يا اخويا انت زي الفل... إنت زي الحصان.

فؤاد (وهو يبكي): محدش يعرف أي حاجة في البيت ولا اخواتك حتى...

لغاية مانعرف ايه الموضوع ... هقوم انا اشوف البنات وامهم

دول امانه في رقابتك من دلوقتي.

محمد (وهو متأثر): متخفش يا اخويا انت معايا وانت اللي هتربيهم

مفيش غيرك هيربيهم إن شاء الله.

فؤاد: سلام (يهندم من ملابسه حتى لا تظهر عليه ملامح الإعياء)

علاء: يا دكتور يعني مفيش علاج في مصر بأى مصاريف؟ (في التليفون)
الدكتور: يا أستاذ علاء إنت عارف مقدار معزتك عندي قد إيه بس
حقيقي لو فيه حل أنا مكنتش سكت...

علاء : يعني إيه يا كتور؟

الدكتور: لازم نستنى رأي الخبير الألماني... وطبعًا علشان تعرف معزتك أنا
حجزت معاه معاد بالفعل لفؤاد.

علاء: اللي فيه الخير يقدمه ربنا.. سلام (ويفكر في الذهاب إلى فؤاد)

فؤاد: صباح الخير يا محمد... مالك؟(في المقهى)

محمد: إنت ايه اللي خرجك؟... إنت خليك في البيت.

فؤاد: ما انت عارف أنا محبش قاعدة البيت يا حاج ... إفردها بقى
وخليني اشتغل... وبعدين ايه اللي مصحيك بدري كده؟... ده
الضهر لسة ما أدنش.

محمد: هو انا بنام خالص الأيام دي؟

فؤاد: إمسك نفسك... البنات جاين (يمسك البنتين وبدفء) بص بقى...
تسمعي كلام عمو ما حدش يريبكم لا جدكم ولا ستكم ده ...
هو ده اللي تحترموه وتعملوله ألف حساب ويكسر دماغكم
كمان.

محمد : حرام عليك يا أخي إنت بتعمل فينا ليه كده؟(باكيًا وتارگًا
المقهى)

(يكمل فؤاد حديثه مع صغيرته ويعطيها نقودًا وتنصرفان ويذهب

للمنزل عند محمد فلا يجده)

فؤاد: حمد الله على السلامة.. (مستغرباً)

علاء: إيه ياعم معادك بعد أسبوع مع الخبير يعني لازم نروق قبل ما تروح وعازين نقعد مع بعض.

فؤاد: ربنا ما يحرمني منك يا علاء... إنت تعبت كتير معايا الفترة اللي فاتت .

علاء: بس ياله بلاش خيابه... أمي هتيجي بعد الحج إن شاء الله... هروح اشوف البيت خلص وله لسه... وبعدين ايه مش هتغدني عندك ولا ايه؟.. وصي الأول على الغدا ونشوف البيت ونرجع نتغدا علشان هتنزل مصر معايا النهارده .

(يبدأ الطبيب المعالج في تحضير فؤاد لكشف الخبير.. ويراه الخبير ويرى التحاليل، ويحدد له ميعاداً للعملية.. ويعطي له مهلة للحجز في المستشفى.. ويقوم علاء بكافة الترتيبات ويذهب فؤاد حتى يرى زوجته)

فؤاد (ينادي على صبي المقهى الجديد أخي مصطفى مسمار الأصغر):

... عمك محمد لسه مجاش يا خالد؟

صبي المقهى: لا هو في البيت من العصر بس قالي ما تقلش لحد.

فؤاد: طيب خلي بالك أروح أشوفه وآجى (يذهب لمحمد)

فؤاد: انت يابني بتزعل مني ليه بس؟... انت اللي هتريهم وتعلمهم

وتجهزهم... دول ولادك سواء أنا ميت ولا حي أنا ما قدرش

آمن لحد تاني عليهم.. دول لحمك انت.

محمد: يا أخي إنت ليه عاوز تزعلني منك وتضايقني؟

فؤاد: ده بتاع ربنا ياخايب لو عايش... خلاص... مت يبقى عملين
حسابنا وهمًا في إيدك انت وأمانة في رقبتك... وانا عارف إنك
قدها... (يبكي محمد مرة أخرى ويحضن فؤاد... ويبكي بحرقة)
وبعدين أنا الفترة الجايه هبقى في مصر والمصاريف هتبقى
زيادة... دول تلاته.. وفي حاجات عاوز أرتبها معاك قبل ما
امشي.. يعني الحمل هيبقى جامد عليك...

علاء: ما يهملكش الفلوس يا دكتور لو في مستشفى استثماري يبقى
أوكيه انت عارف احنا هناخد وقت طويل علشان نحجز في
مستشفى عسكري واحنا مدنيين.

الدكتور: مش مسألة الفلوس بس يا أستاذ علاء المسألة كمان إمكانيات
لازم المستشفى العسكري وهو ما بيرحش أي مستشفى دي
مستشفى القوات الجوية... وده الحجز فيها هيبقى أصعب
كمان.. يا جماعة الموضوع مش سهل زي ما اتتو متخيلين لأن
بعد ست شهور أو سنة بالكثير فيه عملية تانية لازم تتعمل
بس العملية دي تمهيديه للعملية الثانية.

علاء: اللي فيه الخير يعمله ربنا... أهم حاجه نحجز في المستشفى.
الدكتور: هو ده المهم دلوقتي... ولازم كمان فؤاد يظبط على العملية وده
دوري بقى مع الخبر.

علاء: يعني ايه؟... فؤاد مش هيروح دلوقتي ولا ايه؟
الدكتور: لا تروحو النهارده وبعد بكره فؤاد يعمل حسابه إنه هيقعد في
المستشفى لغاية ميعاد العملية.

(يذهب فؤاد مع محمد وعلاء، ويأتي إلى منزلهم، ويقضي باقي اليوم مع زوجته وأولاده، ويوصي عليهم وعلى عمهم محمد، ويتصل بأخيه سعيد، وجمعة ليحضروا إليه، ويراه الجميع قبل عودته إلى القاهرة، وفي ظهر اليوم الثاني، يدق جرس التليفون يكون حمد ابو صالح عضو مجلس الشعب يطمأن عليه)

عضو المجلس: ايه يا بني ما حدش يسمع صوتك؟ واحشني والله.

فؤاد: لا مفيش والله أنا بس

(ويحكي فؤاد له تفاصيل مرضه، ويخبره بمشكلة في حجز المستشفى، ويطمئنه عضو مجلس الشعب أنه خلال يومين، سوف يحضر له الموافقة على إجراء العملية في المستشفى العسكري ولا يقلق، وأنه سوف يزوره في المستشفى، وبالفعل يصدق النائب في كلامه، وخلال اليوم التالي تأتي الموافقة مع دهشة علاء وأخيه محمد، ويأتي النائب ليزور فؤادًا في المستشفى ويطمئنه ويبقى معه على اتصال حتى بداية العملية، وبالفعل يجري فؤاد العملية، ويجلس في فترة نقاهة بعدها في المستشفى لأسبوعين.. وعليه أن يعرفه خطورة هذه العملية، ولا يجهد نفسه لأن كبده لا يتحمل الكثير الآن.. هناك عملية أخرى كبيرة.. ويذهب فؤاد للبيت...)

زوجته: حمد الله على السلامة نورت بيتك ربنا ما يحرمنا منك أبدًا.

فؤاد: ولا انتم...

محمد: نورت بيتك يا فؤاد ياخويا.

سعيد: الدنيا كلها نورت.

(ويحكي معه كل من محمد وسعيد، وفي الليل يأتي جمعة، وأخته هناء
وزوج أخته)

زوجته : كان نفسي أجبلك ولد.

فؤاد: حتى وأنا تعبان عاوزه تضيقتني ... ياهبله هو انت اللي بتجيبني
ده... ربنا مش رايد.. يبقى خلاص... سييك من الكلام الخايب
ده وطمنين عليكي.

الزوجة: أنا كويسه الحمد لله... بس

فؤاد: من غير بس ولا حاجة... انت عارفة عمهم محمد هو اللي..

الزوجة (باكية): ... ربنا ما يحرمانا منك ولا من دخلتك علينا..

فؤاد: ده كلام لازم تسمعيه وتعرفيه... ومش هتكلم فيه تاني.. وفي حاجات
لازم أظبطها مع محمد.

الزوجة: اللي انت شايفه يا اخويا.. انا ليه كلمه بعد كلمتك؟

(وبالفعل يذهب فؤاد مع محمد لإنهاء جميع الأوراق المختلفة)

ليتمكن من تحويل بعض الأشياء باسم أخيه محمد، ويؤجل بعض هذه
الأوراق لبعد انقضاء العيد الكبير حتى يرتاح فؤاد الذي يظهر عليه بوادر
المرض، ولا بد له من الراحة... وقبل العيد بثلاثة أيام.. يأتي إسماعيل من
السفر)

إسماعيل: واحشني يا فؤاد واحشني والله.... كنت خايف.

فؤاد: خايف اموت ومتشوفنيش ... يا عم ده بتاع ربنا.

إسماعيل: يا أخي فال الله ولا فالك... شوف التلفون ده بقى جايهولك

مخصوص... وفي حاجات ثانية عجبنتني بعتهالك مع ام العيال...
على البيت.

فؤاد: يا عم اسماعيل أنا بس عاوزك تبني البيت بتاعك وترجع تقعد في
مصر تاني.

إسماعيل : ياراجل بلاش خيابه هو اللي عاش بره عاوز يرجع تاني؟

(ويأتي العيد ويجتمعون في بيت فؤاد.. وتمر الأيام سريعًا، ويجلس
إسماعيل أكثر من شهر ونصف ويريد الرحيل، ويصر فؤاد على الذهاب
لوداعه في المطار لشعوره الداخلي بأنها المرة الأخيرة لرؤية صديقه
إسماعيل وشعورهم بذلك هم أيضًا، ويبكي ثلاثتهم في المطار كثيرًا)

إسماعيل: إوعى يا فؤاد... تسبنا... والنبي يا فؤاد.

فؤاد (يبكي وهو مبتسم): أسبكم واروح على فين؟ ياله التأشيرة بتاعتي
مفيهاش عودة يا خفيف...

إسماعيل (باكيًا): إحنا بنحبك قوي يا فؤاد... بنحبك.

علاء (باكيًا ولكن يحاول أن يكون متماسكًا): ... ياله يا اسماعيل الطيارة
بتاعتك خلاص ياله علشان متأخرش وبعدين لازم أوصل فؤاد

للدكتور... وأرجع واستنى امي واختي وجوزها.

إسماعيل (يحتضن فؤادًا بشدة... باكيًا): ... كل يوم هتصل بيك واطمن
عليك.

فؤاد: يا حاج ما تكلفش نفسك كل يوم هرن عليك. لو مرتتش تعرف إني
خلصت (يحاول الضحك. من البكاء)

علاء: ياله يا اسماعيل ... ياله يا أخي المطار كله بيتفرج علينا.

إسماعيل: سلام ... سلام ... (ينظر نظرة أخيرة لفؤاد ويجري مسرعاً).

(يذهب علاء مع فؤاد بعد توديعه لإسماعيل إلى الدكتور لمتابعة حالته، ويقرر الطبيب حجز فؤاد بالمستشفى نظراً لتدهور حالته في الآونة الأخيرة، ولكن بعد إصراره وإلحاحه على علاء يرجو الطبيب قراره إلى أن يأتي هو بنفسه بعد يومين أو ثلاثة بعد أن يكون قد أنهى أمره بالبيت والمقهى، وبالفعل يوصله علاء للبيت على وعد أنه سوف يأتي ليأخذه للمستشفى، ويرجع علاء إلى المطار لاستقبال أمه وأخته وزوجها الذي اتضح أنه يعاني أيضاً من مشاكل في الكبد... وأشار الأطباء هناك إلى أنه يجب عودته إلى مصر في أسرع وقت، حتى لا يجهد نفسه، ومناخ السعودية لن يساعده على الشفاء، لكنه يزيد في شدة مرضه.. كل هذا علمه علاء وهو يوصلهم إلى منزله.. لكنه واجه إصرار الأم أنها تريد أن تذهب إلى بيتها القديم لتريح فيه أعصابها بعيداً عن ضوضاء القاهرة... ووافق علاء على أن يأخذهم عندما يذهب ليحضر فؤاداً...)

زوج أخت علاء» إبراهيم «: الدكاترة في السعودية لما تعبت قالولي ارجع

مصر أحسن وخليك في هدوء وتبعد عن الجو هنا والمشاكل

... طيب هو فيه حد يقدر يعيش من غير مشاكل؟

علاء : يا أخي ريحك أسبوعين أو ثلاثة ولا حتى شهر... مع الأولاد دول

يمكن حتى ما كنوش بيشفوك هناك.

إبراهيم: ما انت عارف يدوبك خلص موسم الحج والحاجة قالت ننزل

وحشتني مصر أوي وبيتها القديم... وكانت كل شوية تفكرنا

بالمرحوم خالك... وجمائله... وابوك الله يرحمه.
علاء: الله يرحمه ويسامحه.. يرحمهم جميعاً ويسامحهم .. ويرحمنا.

(وهنا يصل علاء إلى منزلهم القديم مع أخته وزوجها وأولادها وأمه... ويجلسون يتذكرون أيام الطفولة والصبا، ويتذكر الأحداث مع الأب خلال مراحل مختلفة حتى مطلع الفجر، ويقوم الجميع، ويؤدون صلاة الفجر، ويحضر علاء إفطاراً للجميع، وبعد ذلك يتركهم ليذهب إلى القاهرة... لعمله والذهاب مع فؤاد)

فؤاد: إيه اللي جابك بس يا عم علاء انت كفاية عليك شغلك انت مامتمش بقالك ثلاث تيام.. من اسماعيل لايه لأمك واختك لعيال اختك .. وترجعلي تاني.. ده كتير.. والله كتير عليك أوي
علاء: انت لسانك ده مش عاوز تلمه حتى وانت تعبان؟

فؤاد: يابني يموت الزمار ولسانة بيلعب (ضاحكاً) بلاش التانية.. خليها لسانه.. فاكر ياله يا علاء.. فاكر؟
علاء: هي دي أيام تتنسي؟... طيب ياله ياباشا.
فؤاد: هوصل البيت.

سهير: ايه إنت هتمشى دلوقتي؟
فؤاد: علاء مستنيني بره... (يحضن بناته... والابنة الصغيرة على ذراعها)..
عاوزك تنفذي كل اللي اتفقنا عليه.
(ويحضنها برفق وملامح الإعياء ظاهرة عليه... ويتركها بعد نظرة لبناته..
ليركب السيارة مع علاء).
فؤاد: حمد الله على سلامة امك واختك.. ايه مالك؟

علاء: أنا قلقان أوي على (إبراهيم) جوز اختي الدكاترة في السعودية
قالوا إن الكبد عنده تعبان وفي كليه عنده مش شغاله وابتدى
يعاني مشاكل في حنت تانيه في جسمه.. (وفجأة لاحظ أن فؤاداً
يبدو شاردًا وتذكر حالاته) وانت تعبني وامي تعباني واختي
اقولها يأمي طيب باقي نعايا النهارده.. تقولي لأ عاوزه بيتي
.. أكن بيتي بيت يهود مع إن مراتي كانت مستنياها والله
وعاوزه تقولها إنها حامل وفرحها وحلفتني مااقولها.. وهي
اللي تقولها.

فؤاد: مراتك دي بنت حلال.. الستات دول رزق.
علاء: كل واحد بياخذ نصيبه.

(وقمر السيارة حتى تخترق شوارع القاهرة لتصل إلى المستشفى)

علاء: طبغًا محدش سأل عليك وأنا نمت زي القليل ماصحتش غير النهار
أو بمعنى أصح من ساعتين بالظبط.

فؤاد: محمد كل ثلاث ساعات يتصل بيه والبنات وامهم بيكلموني كل
يوم وسعيد وجمعه هيجولي النهارده .. ده حتى ابو صدام
اتصل بيا وقالي أنا هجيلك وإسماعيل كلمني أول ماجيت
المستشفى واتقفت إني هرن عليه.

علاء: ايه ياعم .. انت هتدخل الانتخابات ولا ايه؟.. ده انت النهارده زي
الفل.. الله أكبر عليك.

فؤاد: إوعى تفتكر إني خايف من الموت أنا بس صعبان عليه العيال...
ومحمد أنا عارف إن المسئولية كبيره عليه والحياه صعبه..

وبعدين محدش مات وقلنا بيحصل ايه هناك..
علاء: ياعم بلاش الكلام الخايب ده ... أنا هقوم اتصل بالبيت عند امي
واشوف اختي وجوزها... عاملين ايه... مش كانوا احسن لو
قاعدوا في القاهرة ... معايا كان احسن؟
فؤاد: مانت عارف امك زينا مش متعودة على الإيتيكت بتاع مصر ولا
دوشة مصر وبعدين... امك عاوزه تحس انها سيدة القصر..
محدش مشاركها فيه (ضحكًا مع علاء)
علاء (مقاطعًا بالضحك...) تصدق أنا ابن كلب لو قلتك حاجة تاني
هروح اتصل بيهم يا خفه وارجعلك.

يدق جرس التليفون المحمول أكثر من مرة ولكن يفتحه في هذه
المرّة)

فؤاد: يابني انت مش لسه متصل أول امبارح؟
إسماعيل: يا أخي انت معندكش شوية من الاحمر؟... برن عليك افتح
أنا عاوز اغرم يا عم.
فؤاد: يابني ما انا برن عليك تعرف انا لسه عايش... ولأ البعيد ما
بيفهمش؟
إسماعيل: ما انت قلتلي إنك في المستشفى وصوتك مش مريحني وانا
قلقان عليك.

فؤاد: أغنيك احسن ولا بلاش رخامة واقفل.. سلام.
إسماعيل: يا أخي انت دايمًا كده؟
فؤاد: يا لله يلا علشان متغرمش كثير.. سلام.

إسماعيل: ابقى افتح التليفون (سلام).

علاء (يدخل مسرعًا):.. فؤاد هروح أنا اجيب (إبراهيم) جوز اختي..
أغمى عليه من ساعتين وجابلوا الدكتور.. عمومًا أنا حجزت
ليه هنا في الأوضة اللي جنبك.. وهجيب معايا صور الأشعات
والتقارير اللي جايها من السعودية علشان يبقى كل شيء
جاهز لما يجي. مش عاوز حاجة أجبهالك معايا؟
فؤاد: سلامتك.

علاء: عمومًا أنا كده كده هفوت على محمد في القهوة.

(وبالفعل في اليوم التالي يحضر إبراهيم زوج أخت علاء إلى المستشفى
وتقوم بعمل جميع الفحوصات والتقارير الطبية وتبدأ علاقة صداقة قوية
تجمع الاثنين، ولا يُعرف لماذا هذا الارتباط السريع بينهما وكأنهما يعرف
كلاهما الآخر منذ الطفولة... أو أن كلاهما يعلم أنه في محطته الأخيرة ينتظر
قدره الأخير، وأن أيامه معدودة وهي التي تفصلهم عنها... وكلاهما مؤمن
بقضاء الله وقدره... حتى أن علاء بدأ يمازحهما بهذه العلاقة والصداقة
القوية التي لم تكمل الشهر الواحد... ولكن آثار التعب والإجهاد تظهر يوميًا
على وجهيهما... حتى قبل أن يكتمل الأسبوع الرابع، أصر فؤاد على الذهاب
إلى البيت...)

الدكتور: صعب يا فؤاد تروح دلوقتي.

فؤاد: يا دكتور ما تتعبش نفسك أنا هروح اشوف العيال واطمن عليهم
وارجع على طول مفيهاش حاجة يعني.

الدكتور: بس ده فيها خطر على حياتك وصحتك ..

فؤاد: يادكتور حياة مين خليها على الله... انت عارف وأنا عارف المسألة كلها مسألة وقت.

الدكتور (يُصدم للحظات ولكن يفكر بسرعة): خلاص يا فؤاد هسيبك تروح البيت بس في خلال 48 ساعة تكون راجع تاني انت عمومًا ارتاح النهارده وبكره هاكتبك على خروج. فؤاد (وهو يحاول أن يتحقق من كتابته): ... ألف شكر يا دكتور.

(فؤاد وهو يذهب إلى غرفة إبراهيم بصعوبة.. يدق جرس تليفونه)

فؤاد: أيوه سعادتك.. أنا تمام والله بس هروح اشوف العيال وحشوني أوي البيت والقهوة والناس.

النائب: بس صحتك.. والمشي خطر عليك.

فؤاد : كله بتاع ربنا واحنا ملناش فيه.

النائب: خلاص يا فؤاد أنا هتصل بيهم واخليهم يخرجوك.

فؤاد: لا متتعيش نفسك أنا خلصت وهمشي على بكره اقعد مع العيال ويشوفوني واشفهم.

النائب: خلاص يا عم أنا يومين وأكون بالقاهرة.. مش عاوز حاجه؟

فؤاد: ربنا ما يحرمنا منك ... مع السلامة

إبراهيم: ايه يابني اللي قومك من السرير وجايلى وانت تعبان كده؟ (في غرفة إبراهيم)

فؤاد: أنا حاسس إن خلاص المسألة مسألة أيام.. ساعات.. هروح البيت

اموت في حضن عيالي وأهلي أنا زهقت من هنا.. ومدام كده

ميت كده ميت يبقى نموت في وسط الناس اللي بنحبهم

ووشهم يبقى آخر حاجة بنشوفها.

إبراهيم: عندك حق.. إنت عارف إني متربط في الأجهزة وما قدرش امشى..
أنا لو همشى كنت روحت .. ياه دا البني آدم ده ثقيل أوي.. بص
أنا حتى لو روحت مش هقدر أروح البيت العيال هتبقى
حالتهم زي الزفت لو شافوا أبوهم مش قادر يخش دورة الميه
وبطنه منفوخة من الاستسقا...

فؤاد: يا أخي.. متقلش الكلام ده.. ده ربنا بيخفف علينا.. الواحد كل ما
يفكر في حياته اللي فاتت مش عارف بيحس إنه معلمش
حاجة صح وحاجات كتير عملها غلط.. بيحس إن الموت قريب
منه ومش خايف مع إن الواحد مش مؤمن أوي يعني يدوب
على قد الصلاة والمصحف دلوقتي لكن الأول.. كان يدوب صلاة
الجمعة ده إذا لحقها. بس الحمد لله كنت بصوم.

إبراهيم: المسألة مسألة عقيدة وإيمان وبعدين طول ما احنا بعيد عن
الكبائر يبقى ربنا هيسترها معانا.

وأخذ الكلام معهم حتى ساعات الفجر الاولي هذا اليوم وكأنهما
يقولان لبعضهما إنه ربما هذا يكون هذا هو اللقاء الأخير وفي الصباح عند
أذان الظهر يذهب فؤاد بمساعدة محمد إلى غرفة إبراهيم.. ويقبله، ويبيكي
كلاهما بكاءً مريراً.. وكان يعلم كلاهما أنه ممن الممكن أن لا يلتقيا ثانية..

إبراهيم: خلاص.. ماشي

فؤاد: ما انت عارف ده مش همزاج حد.. كله مكتوب ومحدث يقدر
يهرب منه.

إبراهيم: أستناك ولا...؟

فؤاد: ما انت عارف.. ده مش بتاعنا (ويحضنه ويبكيان معًا حتى أن
محمدًا أخذ يبكي معهما حتى ظهر علاء).
علاء: ياله ياعم فؤاد علشان أوديك وارجع لإبراهيم.
فؤاد: ياعم انت ما تتعشب نفسك انا هروح مع محمد.
علاء: عليا الطلاق.. ما حد يروحك غيري.. ياله يا محمد.
فؤاد: طيب ياعم بلاش طلاقات.. لوسمعتك المدام دلوقتي كنت هنروح
في داهية.

(ويذهب ثلاثتهم إلى البلد، ويبقى فؤاد في منزله، ويذهب علاء
إلى بيت والدته وأخته، ويرتب مع أخته لتذهب معه لرؤية زوجها.. وفي
العودة... في صباح اليوم التالي... يخرج فؤاد بعد مغيب الشمس إلى المقهى
ليسلم على جميع الناس ومظاهر المرض واضحة عليه، ويحكي معهم، ويفرح
كثيرًا عند سماعه صوت إسماعيل في التلفزيون، وكذلك يتصل به أبو صدام..
وفي اليوم المحدد للعودة مرة أخرى للمستشفى حسب اتفاق علاء..)

علاء: إيه يافؤاد... انت مش عاوز ترجع المستشفى ليه..هو شغل عيال
ولا إيه؟

فؤاد: ياعم علاء.. الدواء باخده هنا والنوم هنا زي النوم هناك يبقى
مستشفى ليه بقى؟... أنا هنا وسط عيالي وأهلي وناسي
علاء: بس الأكل والنظام في المستشفى..

فؤاد: الأكل هنا متظبط... والنظام هنا برضه.. المسألة إني حاسس إنها
مسألة ساعات مش أكثر.

علاء: يا أخي انت بتعمل ليه كده؟...انت بتعذبنا كده.. محسسنا

بالعجز مش قادرين نعمل حاجة. (ويبيكي ويرتمي في حضنه)
فؤاد: بس ياله يا عيل انت راجل.. الله يكون في عونك هتلاقيها منين ولا
منين من اختك ولأ عيالها وجوزها؟.. هو عارف زيي بس انت
عارف إن الفراق صعب.. قوم.
علاء (يحضن فؤاد طويلاً ويقبله) ويتركه
سهير « زوجة فؤاد»: ايه بس انت زعلته ليه؟
فؤاد: علاء ده ونعم الأخ... ربنا يقويه على اللي في رقبته ويكرمه ...
ناديلي محمد عاوز اطلع بره اتخنقت من السرير وهاتيلي
البنات.. يقعدوا مع عمهم شوية.
سهير: ماهم كل يوم بيقعدوا معاه.
فؤاد: اسمعي الكلام.. ماتتعبنيش أكثر ما انا تعبان.
سهير: حاضر يا اخويا.. إهدا انت كده وانا هاعملك كل حاجه.

(ويستمر حاله على هذا المنوال ثلاثة أيام أخرى في لقاءات مع سعيد
وإخوته حتى الأخت الكبرى أتت وهي مريضة أيضاً لزيارته وأخته هناك
وزوجها واتصالات يومية من إسماعيل واتصالات كل ساعتين تقريباً من علاء
ولكن في اليوم الثالث بعد دخول المنزل في المساء بعد منتصف الليل بقليل..
لم يقدر على التنفس فتذهب سهير لتبلغ محمد، ويذهب محمد مسرعاً
إلى المركز الطبي الموجود في بلده في الثانية صباحاً، ويتصل بإخوته على
المحمول ليأتي جمعة وسعيد اللذين تركاه منذ ساعات قريبة ويأتي كل واحد
مسرعاً).

محمد: ايه يا دكتور ماله فؤاد؟

الطبيب: دي غيبوبة شديده... والجسم مش قابل أي شيء.

محمد: طيب نعمل إيه؟...

الطبيب: العمل عمل ربنا مش بإدينا حاجة.

جمعة: ناخده على طول على مستشفى الجامعه دلوقتي.

الطبيب: أي حركة بتعجل (موت) يقضيها الطبيب.

محمد (باكياً): يعني إيه مفيش فايده؟

الطبيب: مفيش حاجة بعيده على ربنا.. سلام عليكم.

جمعة: (يحاول التحرش بالطبيب ولكن سعيد ومحمد يمنعانه) اعمل

حاجة... اتصل بالإسعاف اعمل أي حاجة. إنت هتسبنا كده

وتمشي؟

الطبيب: أنا فعلاً اتصلت بالإسعاف وخلال دقائق هتكون هنا.

محمد: ألف شكر يا دكتور.

الطبيب: ربنا معاكم ... سلام.

(تأتي عربة الإسعاف في الثالثة فجرًا في ليلة شتاء باردة، ويوضع فيها

فؤاد... ولكن عند دخوله المستشفى الجامعي لم تتسلمه المستشفى...

فقد فارق فؤاد الحياة ووجهه مبتسم، وفي ذات اليوم فارق إبراهيم

الحياة في مطلع فجر نفس اليوم، وقد أوصى كلاهما بأن تكون مقبرتهما

متقاربتين، وكان عزاؤهما واحدًا بعد صلاة الجمعة في ذات اليوم بنفس

السرادق بذات المكان، ويأخذ الجميع العزاء بعد جنازة مهيبة ويُتلقى

العزاء... ويتصل إسماعيل على علاء وينهار من البكاء.. وتظهر بنات

فؤاد الثلاث يحتضنهن محمد وعلاء، ويبلغ علاء أنه وقد ولدت زوجته

في خضم هذه الأحداث ولدًا وأسمياه فؤاد.. لكي تستمر الحياة...)

١ ط ٢٠١٥/٢٢٠٨١

الترقيم الدولي / ٣ - ٩٩ - ٣٥١١ - ٩٧٧ - ٩٧٨